

యోహాన్

యోహాన్ లిహి కీత చొకొట్టు కబుర్

ఇద్ పుస్తకున్ బారెత గొస్తి

లిహి కీతాన పొరొల్: యేసు కిరిస్తునోర్ సిస్యల్ ఆయ్యల్ యోహాన్.

లిహి కీత సాల్: కిరిస్తు సకమ్ మొదొడ పిడితగ లిహి కియ్యల్ జర్గిత.

ముకె గొస్తి: యేసుయె బగవంతనోర్ మరి ఆందుర్. వోరె బగవంతన ఆత్మ సక్తితె, ఇద్ దునియతుర్కున్ వూర పాప్పల్ బచి కియ్యె, మాయ్నన రూప్నె వాతొర్ ఆందుర్. సిరిష్ వోర్ యేసున్ పొరొ బాప్-బక్తితె బరొస ఇర్వలిరె, బగవంతల్ మన్వల్ స్వర్గనగ సొంద పరంతెర్.

ఇవ్ పొరొ వెప్తా తీర్ నిరుపన్ కియ్యె, లెక సెలెంగ్ అచొంగ్ మయ్యతంగ్ కామ్మ కీతొర్. నమునత్ యేతున్ ఆంగుర్ రసతున్ దాత్ మార్కుస్వల్, తీస ఆట్ (38) సాల్కనల్ రోగితె మన్వన్ చొకొట్ కియ్యల్, పుటి-గుడ్డిన్ నదుర్ సియ్యల్, సాతొర్ లాజర్తున్ నేండుస్వల్, సియుంగ్ హజర్క్ మాందితున్ జేవున్ దొస్వల్, సమ్మర్త యేతున్ పొరొ తాక్వల్. అని “నావ పొరొల్ సూడ్సి ఆయొ బతి, ఇవ్ కామ్మున్ సూడ్సి తెర్ నా పొరొ బరొస ఇరట్. అహన్ ఇర్కిట్తె బస్కెట్ జీవతె స్వర్గనగ బగవంతన్ సంగ మందంతిట్” ఇంజెర్ బోద వెహ్చొర్. ఇవ్ గొస్తిన్ బారెతె ఇదెనగ లిహి కీసి మంత.

బగవంతన వచన్ మాయ్నన రూప్ యేత్వల్

1 కలి గడె మాయ్నక్ మునెనె వచన్ ఇన్వల్* మత్తొర్. బగవంతన్ సంగ వోర్ వచన్ ఇన్వల్ మత్తొర్. వోర్ వచన్ బగవంతలె ఆందుర్. ² వోర్ వచన్ ఇన్వల్ మొదొడలె బగవంతన్ సంగ మత్తొర్. ³ కలిత సమ్మెతున్ బగవంతల్ వోర్ వచన్తున్ హిందలె గడి కీతొర్. వోర్ సెల్వ ఉంది గిర్ వస్తు గడె మాయ్నకి. ⁴ వోన్ జీవ మంత. అద్ జీవ సమ్మిర్కున్ వేడ్చి సీత. ⁵ వేడ్చి సికటితగ బహన్తె పారంతయొ, అహ్నె పర్జతంగ్ దిల్కనగ వోర్ వేడ్చి సీసెర్ మంతొర్. బతి బస్కెట్కె అద్ వేడ్చితున్ సికటి* పిహ పరొ.

⁶ బగవంతల్ వొరొర్ మాయ్నన్ సారి కీతొర్. వోన పొరొల్ బాప్తిస్మ సియ్యల్ యోహాన్.* ⁷ అద్ వేడ్చితున్ బారెతె తన వెహ్చొల్ గవతున్ కేంచి, సమ్మిర్ వోర్ వేడ్చితున్ దాత్నొన్ పొరొ బరొస ఇరనిర్ ఇంజెర్ వాతొర్. ⁸ అద్ వేడ్చి సియ్యల్ యోహాన్ ఆయొర్. బతి వేడ్చితున్ దాత్నొన్ బారెతె, వెహ్లా వాతొర్ వోర్, సిరిష్ గవదారల్ ఆందుర్. ⁹ ఇద్ దునియతుర్కున్, బోరై జీవత సతె వేడ్చి సీసెర్ మంతొరొ, వోర్ వాసెర్ మంతొర్.

¹⁰ వోర్ వచన్ ఇన్వల్ ఇద్ దునియతె వాతొర్. వోన కెయ్యెనె బగవంతల్ సమ్మె గడి కియుస్తొర్. బతి ఇద్ దునియతుర్ వోర్ కరల్ బోర్ ఆందుర్ ఇన్వల్ వొడ్కి కియ్యకి. ¹¹ వోర్ తన్వర్గ వాతొర్, బతి వూర్ ఇజయేల్ లోకుర్* వోన్ వొప్పకి. ¹² తెర్ బతి, బోర్-బోరై తన్వ పొరొ బరొస ఇరైరొ, వూర్ సమ్మిర్కున్ బగవంతనుర్ మరి-మియడ్ ఆయ్యె

* 1:1-2 వచన్ ఇన్వల్ ఇత్తెకె యేసు కిరిస్తు ఇంజెర్ అర్తమ్. * 1:5 బగవంతన సరి-మారగ్ బూలె మాసి పాప్పంగ్ కామ్మనె నించి మన్వల్ దునియ. * 1:6 వేర్ అపొస్తుల్ యోహాన్ ఆయొర్. * 1:11 యూదుల్క ఇంజెర్ గిర్ కేయంతెర్.

అదికార్ సీతార్. ¹³ ఆడ్-మాడ్సోన్ మరి-మియడ్ జల్మ ఆతపినయ్ మేందోల్ అని నెతుడె వూర్ జల్మ ఆయ్యకి. బతి బగవంతల్ వూర్కున్ నేమి కీతతున్* హిందలె వోసుర్ మరి-మియడ్ ఆతెర్.

¹⁴⁻¹⁵ వోర్ వచన్ మాయ్యల్ ఆసి, దర్పుత్ పొరొ వాసి, మా నడ్డుమ్ పిస్తార్. బాప్తిస్మ సియ్యల్ యోహాన్ వోర్ వచన్ బారెతె, “నా పెజెటల్ బోర్తె వాంతార్ ఇంజి వెహ్తానా, వోర్ వేరె ఆందుర్. వేర్ నాకున్ తెర్ మొదొడలె పిసి మత్త కాడ్కి, నాకున్ తెర్ డగుర్ ఆందుర్” ఇంజెర్ జోర్తె గవ వెహ్తార్. వోర్ వచన్ మాకున్ బగవంతన బర్పుర్ సతెమున్ అని బర్పుర్ పెర్మత-దయతున్ తొహ్తార్. ఇద్ సత్ అని పెర్మత-దయతున్ సూడ్కి, బగవంతన మయ్యతున్ కరి కీతల్. బగవంతల్ తన్వోర్ వొరొరె మన్వల్ మరిన్ సీత మయ్య ఇదె ఆంద్. ¹⁶ వోన్ బర్పుర్ పెర్మత-దయతున్ హిందల్, మరట్ సమ్మిర్ ఆసిర్వాదున్ పెజెయ్ ఆసిర్వాద్ యేచ్చెర్ మంతల్. ¹⁷ అవ్ బవ్ ఇత్తెకె, మొదొడ ఆసిర్వాద్ తన్వ ఇచ తీర్ పర్జి పిసనిర్ ఇంజెర్ బగవంతల్ మోసెన కెయ్యె, దర్మత కానున్ సీసి మత్తార్. బతి ఇంకె, రెండవ ఆసిర్వాద్ యేసు కిరిస్తున కెయ్యె అద్ కానున్ తెర్ చొకొట్టుంగ్ పెర్మత-దయ అని సతెమ్ ఇన్వలికున్ సీతార్. ¹⁸ బోరె బస్కెనె బగవంతన్ సూడ్కి. బతి బస్కెట్ బాబోన్ సంగ మన్వల్* వొరొరె మరి ఆయ్యల్, మాకున్ బగవంతన్ బారెతె వెహ్చ తొహ్తార్.

బాప్తిస్మ సియ్యల్ యోహాన్ గవ

¹⁹ యెరుసలెమ్మల్ యూదుల్కునుర్ అదికారిర్, మోక వేర్ కిరిస్తు మందర్ ఇంజెర్ పూసి కియ్యె, కటొడలిర్కున్ అని లేవియుల్కున్* యోహాన్తగ సారి కీతెర్. ²⁰ తె యోహాన్, “నన కిరిస్తున ఆయ్యెన్” ఇంజెర్ మకుస్వక్ వూర్కున్ గవ వెహ్తార్. ²¹ అస్కె వూర్, “తె నిమె బోని ఆంది? యేలియ* పర్వత్తని కి?” ఇంజెర్ పూసి కీతెర్. తె, “నన ఆయ్యెన్” ఇంజెర్ ఇత్తార్. “మంజె బవిసత్తె వాంతార్ ఇంజి వెహ్తార్ వోర్ పర్వత్తని కి?” ఇంజెర్ వూర్ పూసి కీతెర్. బతి యోహాన్ “నన ఆయ్యెన్” ఇంజెర్ వెహ్తార్. ²² అస్కె వూర్, “అసల్ నిమె బోని ఆంది? మాకున్ సారి కీతుర్కున్ మమొట్ జవబ్ సియ లాగర్. నీ బారెతె బతల్ వెహన ఇంతియె అద్ మాకున్ వెహ” ఇంజెర్ యోహాన్తన్ పూసి కీతెర్. ²³ తె యోహాన్, “యెసయ పర్వత్తల్ మొదొల్ వెహ్తాపినయ్, «బగవంతల్* వాయన్ సాటి సరి సుద్రి కీమ్మ» ఇంజెర్ బోడి గుటనగ కిలివల్ లేంగ్ ననయ్ ఆందున్” ఇంజెర్ వూర్కున్ వెహ్తార్.

²⁴⁻²⁵ అస్కె సవల్కు పూసి కియ్యె వాతుర్గట్ కహితుర్ పరిసయ్యల్కు, “నిమె కిరిస్తుని ఆయ్యె, యేలియని ఆయ్యె, బవిసత్తె వాయ్యల్ పర్వత్తని గిర్ ఆయ్యె. తె నిమె బద్ అదికార్దె బాప్తిస్మ సీసెర్ మంతి?” ఇంజెర్ యోహాన్తన్ పూసి కీతెర్. ²⁶ తె యోహాన్, “నన యేతె బాప్తిస్మ సీసెర్ మంతిన్. బతి నా పెజెటల్ వాయ్యల్ మీ నడ్డుమ్ మంతార్. మిరట్ వోన్ వొడ్కి కియ్యిట్. ²⁷ నా పెజెటల్ వాయ్యల్ నాకున్ తెర్ డగుర్ సక్తివంతల్ ఆందుర్. వోనంగ్ చెపుల్కున పటి రెహ్లా గిర్ నన కామి సియ్యెన్*” ఇంజెర్ వెహ్తార్. ²⁸ ఇవ్ గట్టుంగ్ యోహాన్ బాప్తిస్మ సీసెర్ మత్తార్ అద్ యోర్దన్ లవిడున్ సిడయింగ్ బాజ్ మన్వల్ బెతనియ ఇన్వల్ చహర్తగ జర్గతంగ్.

యేసుయె బగవంతనోర్ మరి ఇంజెర్ వెహ్చ తొహ్తల్

²⁹ దుస్రా నేటి యోహాన్ తన్గ వాయ్యల్ యేసున్ సూడ్కి,

“ఇచుల! వేరె దునియతురంగ్ పాప్పున్ కాంచి వోయ్యల్ బగవంతన గొరె పిల ఆందుర్. ³⁰ ఇదెన్ మునె, ‘నా పెజెటల్ బోర్తె వాంతార్ ఇంజి వెహ్తానా, వోర్ వేరె ఆందుర్. వేర్ నాకున్ తెర్ మొదొడలె పిసి మత్త కాడ్కి,* నాకున్ తెర్ డగుర్ ఆందుర్’ ఇంజెర్ వేన్ బారెతెన్ వెహ్చ మత్తాన్. ³¹ అసల్ వోర్ బోర్

* 1:13 బగవంతల్ తన్వ ఆత్మ వూర్ ఇర్తతున్ హిందల్ మరి-మియడ్ ఆతెర్. * 1:18 ఇత్తెకె బాబో బగవంతల్ అని మరి యేసు వొరొరె ఇంజెర్ అర్తమ్. * 1:19 లేవియుల్కు ఇన్వలిర్ లేవిన కాన్దాన్తర్ ఆందిర్. వీర్ బగవంతన మందిర్తన్ బవి కీసెర్, కటొడలిర్ కియ్యలిక్ కామ్మినగ మదల్ కియ్యలిర్ ఆందిర్. * 1:21 యేతె బాప్తిస్మ సియ్యల్ యోహాన్తన్ తెర్ తొత్తార్ పర్వత్తల్ ఆందుర్. కిరిస్తు వాయన్ మునె వోర్ పర్వత్తల్ మల్పి వాంతార్ ఇంజెర్ యూదుల్కు బరొస కీంతెర్. * 1:23 బగవంతల్ సెతెతె పర్పు. * 1:27 వోర్ బెయ్ డగుర్ మూల్కల్ ఆందుర్. నన వోనోర్ దాసిన ఆసి మన్లె గిర్ కామి సియ్యెన్. * 1:30 కలి గడె మాయన్ మొదొలె వచన్ రూప్తె పిసి మన్వల్ యేసు ఆందుర్.

ఆందుర్ ఇన్వోల్ నన వోన్ వొడ్కి కీసి మనాన్. బతి ఇజ్రయేల్ లోకుర్కున్ వోర్ తన్వ వొడ్కి అరుసీనుర్ ఇంజి బాప్టిస్మ సీతోన్. ³² అస్సెనె హోబర్ కోలె మాసి, బగవంతన పవిత్ర ఆత్మ ఉంది పారెవత్ దాత్ యేసున్ పొరా రెయ్యల్ సూడ్తాన్. ³³ యేతె బాప్టిస్మ సియ్యె నాకున్ సారి కీతోర్ వోర్ బగవంతలె, 'బోన్ పొరా పవిత్ర ఆత్మ పారెవత్ దాత్ రెయ్యి ఉద్వల్ సూడంతియె, వోరె లోకుర్కున్ పవిత్ర ఆత్మతె బాప్టిస్మ సియ్యల్* ఆందుర్' ఇంజెర్ వెహ్చార్. అహాన్ వెహ్చాక్ ఇత్తెకె, వోన్ నన వొడ్కి కీసి మనాన్.

³⁴ ఇద్ సమ్మె సూడ్సినె, 'వేరె బగవంతనోర్ మరి ఆందుర్*'

ఇంజెర్ బాప్టిస్మ సియ్యల్ యోహాన్ యేసున్ బారెతె గవ వెహ్చార్.

యేసునుర్ మొదొడుర్ సిస్యలిర్

³⁵ దుస్రా నేటి దుపరిత నాలుంగ్ నేత్తెకె యోహాన్ అని వోనుర్ ఇవిర్ సిస్యలిర్ గిరె అగనె నిల్సి మత్తెర్. ³⁶ అదె వకత్తె యేసు అగటల్ వీడ్చెర్ మత్తార్. వోన్ సూడ్సి, "ఇచుల! బగవంతన గొరె పిల" ఇంజెర్ యోహాన్ సిస్యలిర్కున్ వెహ్చార్. ³⁷ అద్ కేంచి వూర్ ఇవిర్ సిస్యలిర్, యేసున్ పెజెయ్ సొత్తెర్. ³⁸ తె అస్సె వూర్ తన్వ పెజెయ్ వాయ్యల్ సూడ్సి, యేసు పెజె మల్సి, "మీకున్ బతల్ పహ్లా?" ఇంజెర్ పూసి కీతోర్. తె వూర్ "గురుజి*! నిమె బగ మందంతి?" ఇంజెర్ పూసి కీతెర్. ³⁹ తె యేసు, "వాసి సూడట్" ఇంజెర్ ఇత్తార్. అస్సె లగ్-బగ్ పోదెక్ నాలుంగ్ నేత్తెర్ మత్త. తె వోర్ మన్వల్ జాగతగ సొంజి, అంటిత్క అగన్ మత్తెర్. ⁴⁰ యోహాన్ గొస్టి కేంచి యేసున్ పెజెయ్ సొత్తుర్ ఇవిర్గటల్ వొరొన పొరొల్ ఆంద్రెయల్. వేర్ సీమెన్-పేతుర్తోర్ తముర్ ఆందుర్. ⁴¹ వేర్ ఆంద్రెయల్ తన్వోర్ తాదల్ సీమెన్-పేతుర్తున్ బేటె మాసి, "దాద! కిరిస్తున్* సూడ్తామ్" ఇంజెర్ వెహ్చార్. ⁴² అని వోన్ యేసునగ పియ్యి వాతోర్. తె యేసు వోన్ సూడ్సి, "నిమె యోహాన్తో* మరి సీమెన్తి ఆంది. బతి ఇంగెడల్ నీకున్ కెపా* ఇంజి కేయనిర్" ఇంజెర్ ఇత్తార్. వేన్ పేతురు గిర్ ఇంతెర్#.

యేసు పిలిపున్ అని నతనియేల్తున్ కేయ్యల్

⁴³ దుస్రా నేటి యేసు గలిలయ యేరియతె సొన్లె నిర్నయ్ కీతోర్. తె నడ్డుమ్ పిలిపున్ సూడ్సి, "నా సంగ వర" ఇంజెర్ యేసు కేయ్యెర్. ⁴⁴ వేర్ పిలిప్, ఆంద్రెయల్ అని పేతురు మువిరై బెత్తయిద చహర్తుర్ ఆందిర్. ⁴⁵ పిలిప్ నతనియేల్తున్ మహ్మాల సొత్తార్. వోర్ బేటె మాత పెజె, "మోసెన దర్మత కానున్తగ అని దుస్రుర్ పరవత్తులిర్ లిహి కీతనగ బోన్ బారెతె లిహి కీతెరా, వోర్ మాకున్ బేటె మాతోర్. వోరె నజరేత్ చహర్తోర్ యోసెప్పొర్ మరి యేసు ఆందుర్" ఇంజెర్ పిలిప్ వెహ్చార్. ⁴⁶ అద్ కేంచి నతనియేల్, "ఎహ! నజరేత్తుల్ బతయ్ చొకొట్పు పుటరియ్?" ఇంజెర్ పిలిపున్ పూసి కీతోర్. తె "వాసి సూడ" ఇంజెర్ పిలిపు ఇత్తార్. ⁴⁷ తె నతనియేల్ యేసునగ వాసెర్ మనెకె వోన్ సూడ్సి, "ఇచులట్! వేర్ కరల్ ఇజ్రయేల్ జాతితోర్ ఆందుర్. వేన్ కపట్ బతయ్ సెలె" ఇంజెర్ వోన్ బారెతె యేసు వెహ్చార్. ⁴⁸ తె నతనియేల్, "నా బారెతె నీకున్ బహన్ టావ?" ఇంజెర్ పూసి కీతోర్. తె యేసు, "పిలిపు, నీకున్ కేయ్యక్ మునె, నిమె అంజారి మరత్ బూడ్ మనెకెన్ నీకున్ సూడ్తాన్" ఇంజెర్ వెహ్చార్. ⁴⁹ అస్సె నతనియేల్, "యే గురుజి! నిమె బగవంతనోర్ మరిని అని ఇజ్రయేల్ లోకురొర్ రాజని ఆంది!" ఇంజెర్ జవబ్ సీతోర్. ⁵⁰ తె యేసు, "నీకున్ అంజారి మరత్ బూడ్ మనెకెన్ సూడ్తాన్ ఇంజెర్ వెహ్చాతున్ హిందలె, బరొస ఇర్నెర్ మంతి కి బతల్? ఇవెన్ తెర్ డగుక్ కామ్మి సూడంతి. ⁵¹ అవ్ బవ్ ఇత్తెకె, హోబర్ కోలె

* 1:33 పాప్తె తాక్కులిర్ లోకురంగ్ దిల్కున్ ఆత్మ సక్తితె పవిత్ర కియ్యల్ ఇంజెర్ అర్తమ్.

* 1:34 బగవంతల్ నేమి కీతోర్ వోర్.

* 1:38 గురుజి సెలెతె «రబి».

* 1:41 కిరిస్తున్ హెబ్రీ బాసతె మెసయల్ ఇంతెర్. ఇదెన అర్తమ్ పర్జతున్ బచి కియ్యె, బగవంతల్ నేమి కీసి, సారి కియ్యల్ రాజల్. వేన్ సాటి యూదుల్క సూడ్చెర్ మత్తెర్. * 1:42 వేర్ యేతె బాప్టిస్మ సియ్యల్ యోహాన్ ఆయెర్. * 1:42 ఇవ్ రండుతె పొరొల్క అర్తమ్ బండ.

1:42 మత్తయి 16:18

మాయ్, స్వర్గనాథ బగవంతుని దూతల స్వర్గనాథ మాయ్నగ* బూడ్ రెయ్, వర్వల్ మిరట్ సూడ్కిట్.# ఇద్ సతెమ్ ఆండ్ ఇంజెర్ వెహార్.

యేతున్ ఆంగుర్కన రస కియ్యల్

2 ఇద్ జర్సి రండ్ రోజ్క్* ఆత పెజె, గలిలయ యేరియత, కాన ఇన్వల్ చహరై, ఉంది మర్మి-పొరొల్ జర్త. యేసున అవల్ అగ మత్త. ² అవ్ మర్మిగ యేసున్ అని వోనుర్ సిస్యలిర్కున్ గిర్ కేయ్ మత్తైర్. తె అగ వూర్ సొత్తైర్. ³ అద్ జేవున్ ఆంగుర్కన రస మార్త. తె అవల్, “వూర్ ఆంగుర్ రస మార్త” ఇంజెర్ యేసున్ వెహ్. ⁴ తె యేసు, “నాకున్ బారి వెహంతి వో? నన బోన ఆందున్ ఇన్వల్ వొడ్కి అరుస్వల్ వకత్ అజన్ వాయెయె” ఇంజెర్ అవన్ వెహార్. ⁵ అస్కె అవల్ సర్బరెయ్ కియ్యలిర్ సంగ, “వోర్ వెహ్ తీర్ కీమ్” ఇంజెర్ వెహ్. ⁶ యూదుల్క్ సుదుడ్ కియ్యల్ కామున్ సాటి, అగ నారితంగ్ బండనంగ్ సారుంగ్ సోరంగ్ మత్తంగ్. ఉంది ఉంది సోర యేడుంగ్-ఆట్ బిందెన యేర్ పియ్యదుంగ్. ⁷ యేసు, “అవ్ సోరన్ యేతె నిహట్” ఇంజెర్ సర్బరెయ్ కియ్యలిర్కున్ వెహార్. తె వూర్ అవ్ సోరంగ్ సిగ సిగ నిహైర్. ⁸ అస్కె యేసు, “ఇంగె మిరట్! ఇచుసి ముడుసి జేవున్ ఇంతజమ్ కియ్యస్వనగ వోమ్” ఇంజెర్ వెహార్. తె వూర్ వోతైర్. ⁹⁻¹⁰ వోర్ ఇంతజమ్ కియ్యస్వల్ యేతల్ మారిత అద్ ఆంగుర్ రసతున్ సవద్ సూడ్కైర్. అద్ రస బగటల్ వాత అని బహన్ తయర్ ఆత ఇన్వల్ వూర్ సర్బరెయ్ కియ్యలిర్కున్ టావ. బతి వోర్ ఇంతజమ్ కియ్యస్వన్ టావ సెతె. తె వోర్ మాయ్ నొవన్ కేయ్, “దుస్రుర్ సమ్మిర్ మొదొల్ చొకొట్ట రస* వెడిసి, మాందితున్ నిస వర్త పెజె, చప్పి ఆంగుర్ రస వెడియంతైర్. బతి నిమె ఆక్రి వేరి గిర్ బెయ్ చొకొట్ట రస వెడ్వసీతి” ఇంజెర్ ఇత్తైర్. ¹¹ ఇహిన్ యేసు గలిలయ యేరియత కాన ఇన్వల్ నాటె అద్ మయ్యత కామ్ కీసి, తన్వ సక్తితున్ తొహార్. అదెన్ సాటి వోనుర్ సిస్యలిర్ వోన్ బరొస ఇరైర్.

¹² అద్ ఆత పెజె యేసు, వోన అవల్, తముక్ అని సిస్యలిర్ మీరె మాసి కపెర్నహోమ్ ఇన్వల్ చహరై సొత్తైర్. అని కహి రోజ్క్ వూర్ అగన్ మత్తైర్.

యేసు మందిర్తగ సొన్వల్

¹³⁻¹⁴ యూదుల్క్న పస్క ఇన్వల్ సడ్ కరుమ్ వాత. తె యేసు యెరుసలేమ్ సొత్తైర్. అగ యెవ్ పెజె, బగవంతున మందిర్తగ యేసు సొత్తైర్. అద్ మందిర్త ఆవ్రతగ బలిదాన్ సియ్యై కోందన్, గొరెన్ అని పారెవన్ వొమ్మలిర్ బేపరిదార్క్ అని దుస్రా దేస్సంగ్ కొతన్ బద్ది కియ్యలిర్ గిర్ అగ ఉచ్చి మత్తైర్. ¹⁵ అద్ సూడ్కి, యేసు నోడెనె చాటున్ మోడి కీసి గొరెన్, కోందన్ అని సమ్మిర్కున్ మందిర్తల్ పూడి సీతొర్. వూర్ కొతంగ్ బద్ది కియ్యలిరంగ్ కొతన్ రీక్సి, వూరంగ్ టేబల్కున్ ఉల్లి కీతొర్. ¹⁶ వూర్ పారెవంగ్ వొమ్మలిర్ సంగ యేసు, “నావోర్ బాబొన రోతున్ హోటుమున్ దాత్ కియ్యట్. ఇవ్ సమ్మిన్ ఇగెటల్ బహి వోమ్” ఇంజెర్ వెహార్.

¹⁷ అద్ సూడ్కి, “నీవ రోతున్ పర్జ వెతె మాని కియన ఇంజెర్ ఆస కీత కాడ్కి, దుస్రుర్ నాకున్ బెయ్ ఉల్ల ఆసెర్ మంతైర్#” ఇంజెర్ దర్మ-గ్రంతనగ లిహి కీసి మంత ఇంజి, సిస్యలిర్ యాది కీతైర్.

¹⁸ బతి యూదుల్క్నుర్ అదికారిర్ యేసునగ వాసి, “నీకున్ బగవంతుల్ అదికార్ సీసి మత్తైకె, మాకున్ ఉంది నిసని తొహా?” ఇంజెర్ పూసి కీతైర్. ¹⁹ తె యేసు, “ఇద్ మందిర్తున్ ఉల్లి కీమ్. తేన్ నన తిరిసి మూండ్ రోజ్క్నె దొహంతొన్” ఇంజెర్ వెహార్.

* 1:51 మాయ్న రూప్యె వాతొర్ వోర్ బగవంతునొర్ మరి. * 2:1 కహి జాగంగ్ మూండ్ రోజ్క్ ఇంజెర్ మంత. * 2:9-10 యూదుల్క్ ఆంగుర్కనల్ రస తెడ్కి, వెతె రోజ్క్ ఇర్పి, సొవుసంతైర్. అద్ కల్టన్ దాత్ మారిత పెజె ఉంటెర్.

1:51 పుట్గడ్కి 28:12 # 2:17 కీర్తన్కన 69:9

²⁰ అద్ కేంచి యూదుల్క్ గుల్ ఆసి, “ఇద్ మందిర్తున్ దొహ్లా చాలిస్ సారుంగ్ (46) సాల్క్ పియ్. నిమె మూండ్ రోజ్కెనె దొహ్లా పరంతియ్?” ఇంజెర్ యేసున్ ఇత్తెర్. ²¹ బతి యేసు తన్వ మేందొడ మందిర్తున్ బారెతె ఇద్ గొస్తి వెహ్తార్. ²² సిస్యలిర్, యేసు సాసి-నేండ్ర పెజె, ఇదెన్ హేతు కీసి, దర్మ-గ్రంత్ నగ లిహి కీసి మన్వడున్ అని యేసు వెహ్త గొస్తితున్ పారా బరొస ఇర్తెర్.

మాయన దిల్లగ మన్వల్ యేసున్ టావ

²³ పస్క సడ్డంగ్ దివొస్కున్ రొపా యెరుసలెమ్మగ, వోర్ యేసు కీతంగ్ మయ్యతంగ్ కామ్మున్ సూడ్సి, వెలెటిర్ వోన్ బరొస ఇర్తెర్. ²⁴⁻²⁵ బతి యేసు వూర్కున్ నమ్మకి. బారెతె సమ్మిరంగ్ దిల్కున్ తన కరి కియ్యల్ ఆత కాడ్కి, దుస్రుర్ బారెతె యేసున్ బోరె గవ వెహ్ లాగొ.

నిమె ఉండె మల జల్మ యేత లాగర్

3 పరిసయ్యల్కన బాజ్నోర్ నికొదేమ్ ఇన్వల్ యూదుల్క్ నోర్ ముకె అదికారి మత్తార్. ² వోర్ ఉంది రాత్తు యేలతె యేసునగ సాంజి, “గురుజి, ‘నిమె బగవంతనగటల్ వాతొని ఆంది’ ఇంజెర్ మాకున్ టావయె. బారెతె, నిమె కియ్యలిక్ మయ్యతంగ్ కామ్మ బగవంతన సాత్ సెల్వ బోరె కియ పరొర్” ఇంజెర్ వెహ్తార్. ³ అస్కె యేసు, “వారొర్ పూన జల్మ యేత బీగర్, బగవంతన రాజ్మగ ఈస యేత పరొర్.* ఇద్ గొస్తి సతెమ్ ఆంద్” ఇంజెర్ నికొదేమున్ వెహ్తార్. ⁴ అస్కె నికొదేమ్, “బుడియల్ ఆతొర్ మాయల్ బహన్ జల్మ యేత పరనుర్? ఉండె ఉంది జోక అవన పీటె నేంగ్ని జల్మ యేత పరనుర్ కి బతల్?” ఇంజెర్ యేసున్ పూసి కీతార్. ⁵ తె యేసు, “వారొర్ యేతె అని ఆత్మతె# జల్మ ఆయ బీగర్, బగవంతన రాజ్మగ నేంగ పరొర్. ఇద్ గొస్తి సతెమ్ ఆంద్” ఇంజెర్ వెహ్తార్. ⁶ “అవల్-బాబొ మేందొడున్ జల్మ సియ పరంతెర్. బతి ఆత్మతున్ బగవంతన ఆత్మ జల్మ సియ పరంత. ⁷ అదెన్ సాటి, ‘పూన జల్మ యేత లాగర్’ ఇత్తెకె నిమె గుల్ ఆయ్. ⁸ వడి తనకున్ ఇస్టమ్ వాత అద్ బాజ్మల్ వాంత. మిరట్ అద్ వడిత ఆవజ్ కేంజంతిట్ బతి, అద్ వడి బగటల్ వాంతయె, బేకె దాంతయె ఇన్వల్ మీకున్ టావ సెలె. అహ్నె బగవంతన ఆత్మతె జల్మ ఆయ్యల్ గిర్ మందంత” ఇంజెర్ యేసు వెహ్తార్.

⁹ తె నికొదేమ్, “ఇద్ బహన్ జర్గిమడ్ మందర్?” ఇంజెర్ యేసున్ పూసి కీతార్. ¹⁰ అస్కె యేసు, “ఇజయేల్కనోర్ డగుర్ గురుని ఆంది. ఇదెన్ బారెతె నీకున్ కరె మాయె కి?” ఇంజెర్ ఇత్తార్. ¹¹ “మాకున్ కరె మాత అదెన్ బారెతె అని సూడ్తున్ బారెతె వెహంతామ్. ఇద్ గొస్తి సతెమ్ ఆంద్. బతి మావ గవతున్ మిరట్ నమ్మిట్. ¹² నన మీకున్ ఇద్ దునియతంగ్ గొస్తిన్ బారెతె వెహ్తెన్ బరొస కియ్యిట్. తె స్వర్గంగ్ గొస్తిన్ బారెతె వెహ్తె బహన్ బరొస కీకీట్?” ఇంజెర్ వెహ్తార్. ¹³ “స్వర్గనల్ రెయ్ వాయ్యల్ స్వర్గనోర్ మాయల్ ఆయ్యల్ నాకున్ తపుసి, దుస్రా బోరె పారా స్వర్గనగ సాన్మకి. ¹⁴ మోసె బోడి గుటనగ పితుడ ఉంది తరస్ కీసి, డంగల్ కటెతగ బహన్ లిమ్-లోమ్ కీతారా,# అహ్నె స్వర్గనోర్ మాయల్ ఆయ్యల్ నాకున్ గిర్ మొద్దగ టాంగి కియ లాగర్. ¹⁵ అహన్ కీతెకెన్, నా పారా బరొస ఇర్వలిర్కున్ బస్కెట్ పిస్వల్ జీవ పుటంత.

¹⁶ “బగవంతల్ దునియతుర్కున్ బెయ్ లాడ్ కీత కాడ్కి, తన్వోర్ వారొరె మన్వల్ మరిన్ ఇద్ దర్పిరతగ సారి కీతార్. వోన్ పారా బరొస ఇర్వల్ హర్ వారొర్ నాసెడమ్ ఆయ్యకెనె, వూర్కున్ బస్కెట్ గిర్ పిస్వల్ జీవ పుటన ఇంజెరెన్తె ఇహిన్ కీతార్. ¹⁷ దునియతుర్కున్ సిక్స వాట్లె బగవంతల్ వోర్ మరిన్ సారి కియ్యకి బతి, బచి కియ్యెనె సారి కీతార్.

¹⁸ “వోన్ బరొస ఇర్వన్ సిక్సత తన్వ మనొ. బతి బరొస కియెర్ వోన్, బగవంతనోర్ వారొరె మన్వల్ మరిన్ బరొస కియ్య కాడ్కి, ఇదెన్ మునెనె వోన్ సిక్సత తన్వ ఆత. ¹⁹ బారెతె వోర్ దునియతుర్ సమ్మిర్గ వేడ్చితున్ పియ్ వాతార్.

* 3:3 గ్రీకు బాసతగ, “బగవంతన రాజ్ సూడ పరొర్” ఇంజెర్ మందంత.

3:5 యెహెజ్కెల్ 36:25-28 # 3:14 ఇసాబ్బు 21:9

బతి లోకుర్ తమ్మంగ్ కామ్మ కరబ్బంగ్ కీనెకె, సికటితె మన్నెనె పసంద్ కీతెర్. అద్ తస్వత కారన్ ఇదె ఆంద్. ²⁰ కరబ్ కామ్ కియ్యల్ హర్ మాయ్ వేడ్చితున్ పసంద్ కియ్యెర్. తన్వంగ్ కరబ్ కామ్మన్ మకుసి ఇరన్ సాటి, వోర్ వేడ్చితగ వాయెర్. ²¹ బతి సత్తె తాక్వల్ తన్వంగ్ కామ్మ బగవంతన కెయ్ జర్గెసెర్ మంతంగ్ ఇంజి, అవెన్ బహి తొహ్లా, వేడ్చితె వాంతార్” ఇంజెర్ వెహార్.

యేసున్ బారెతె యోహాన్ గవ వెహ్యల్

²² అద్ ఆత పెజె, యేసు అని వోనుర్ సిస్యలిర్ యూదయ యేరియతగ సాంజి, పర్జతున్ బాప్తిస్మ సియ్యుసెర్, కహి రోజ్క్ అగనె మత్తార్. ²³ సలిమున్ కరుమ్మ అయ్యెన్ ఇన్వల్ జాగతగ కూబ్ యేర్ మత్త కాడ్కి, అగ యోహాన్ బాప్తిస్మ సిసెర్ మత్తార్. ²⁴ తె లోకుర్ సాంజి బాప్తిస్మ యేచ్చెర్ మత్తెర్. ఇద్ గట్టు యోహాన్ జేల్తగ అర్వక్ మునెన్ జర్గెత. ²⁵ ఉంది దియ యోహాన్తుర్ సిస్యలిర్కున్ అని యూదుల్కన జాతితోన్ నడ్డుమ్ సుదుడ్ ఆయ్యల్ రివజున్ బారెతె జట్-పట్ లాగ్. ²⁶ తె వూర్ సిస్యలిర్ యోహాన్తుగ వాసి, “గురుజి! యోర్దన్ లవిడున్ హంద బాజ్, నీ సంగ బోరై మత్తారా అని నిమె బోన్ బారెతె గవ వెహ్తయె, వోర్ ఇంకె బాప్తిస్మ సిసెర్ మంతార్. సమ్మిర్ వోన్గన్ సాంజెర్ మంతెర్” ఇంజెర్ వెహార్. ²⁷ తె యోహాన్, “స్వర్గన్ బగవంతల్ సీతెకెన్ తప బోరై బతయ్ యేత పరార్. ²⁸ ‘నన కిరిస్తున ఆయ్యెన్. బతి వోన్ మునె సారి కీతార్ వోర్ కబ్రియన ఆందున్’ ఇన్వడున్ మిరటె గవ మంతిట్. ²⁹ నమునతున్ మర్మినగ నొవ్రల్ ముకె ఆందుర్ ఇంట్. వోరె నొవ్రినార్ మూల్కల్ ఆందుర్. వోర్ నొవ్రన్ కరుమ్, వోనార్ సోప్తల్ నిల్చి మన్లె, అని నొవ్రల్ వెహ్త తీర్ కియ్, వోన్ వెలె ఆనంద్ లాగంత. అదె తరికతె నన వెలె కుసితె మంతాన్. నావ ఆనంద్ బర్పుర్ ఆత. ³⁰ బారెతె నాకున్ చుడుర్-పాన్ వాయన అని వోర్ యేసున్ డగుర్-పాన్ వాయన.

³¹ “స్వర్గన్ వాతార్ వోర్ సమ్మిర్కున్ పారాడార్ ఆంతార్. మరట్ దర్తురిత్ పారాడుర్ ఆందట్ అని దర్తురిత్ పారా జర్గెవలిక్ గొస్టిన్ బారెతెన్ వడ్కుంతట్. బోరెయ్ స్వర్గన్ వాతారా, వోర్ సమ్మిర్కున్ పారాడార్ ఆంతార్. ³² వోర్ అగ సూడ్తున్ కేంజ్తున్ బారెతె గవ వెహంతార్. బతి వోన గవతున్ బోరై వాపుర్. ³³⁻³⁵ బగవంతల్ తన్వోర్ మరిన్ లాడ్ కీత కాడ్కి, సమ్మె అదికార్ వోన కెయ్ హల్లి కీతార్. వోన్గ తన్వ ఆత్మతున్ బర్పుర్ సీత కాడ్కి, వోర్ సిరిప్ బగవంతనంగ గొస్టింగ్ వెహంతార్. బోరై వోన గవతున్ వాపంతారా వోర్, బగవంతన్ బారెతంగ్ యేసు వెహంగ్ గొస్టింగ్ సతెమ్ ఇంజి తాహంతార్. ³⁶ బోరై బగవంతనార్ మరిన్ పారా బరొస కీంతారా, వోన్ బస్కెట్ పిస్వల్ జీవ పుటంత. బోరై వోన్ పారా బరొస కియ్యెర్, వోన్ బస్కెట్ పిస్వల్ జీవ పుటా. బతి బగవంతన సోంగ్ వోన్ పారా నిల్చి మందంత” ఇంజెర్ బాప్తిస్మ సియ్యల్ యోహాన్ వెహార్.

కుహితగ యేసు వెయ్యెన్ సంగ వడ్కివల్

4 యోహాన్తున్ తెర్ అదిక్ సిస్యలిర్కున్ యేసు తయర్ కీసి, వూర్కున్ బాప్తిస్మ సిసెర్ మంతార్ ఇంజెర్ పరిసయ్యల్క కేంజెర్. ² (కరల్ బతల్ ఇత్తెకె, యేసు బాప్తిస్మ సియ్యకి. బతి వోనుర్ సిస్యలిర్ సిసెర్ మత్తెర్.) ³ ఇద్ గొస్టితున్ యేసు కేంజ్ పెజె, యూదయ యేరియతున్ సుటి కీసి, గలిలయ యేరియతె సాన్లె పెసితార్.

⁴ బతి ఇంకె సమరయ యేరియతున్ వీడ్చి సాంద లాగర్. ⁵ అహాన్ అద్ సమరయ యేరియతల్ వీడ్చి సాంజెర్ మనెకె, యాకొబ్ తన్వోర్ మరి యోసెపున్ సీత, ఈసత బొమిత్# కరుమ్ మన్వల్ సుకరు ఇన్వల్ చహర్తగ యెవ్తార్. ⁶ అగ యాకొబ్ కాచుస్త కుహి మత్త. లంగ్గల్ తాక్సెర్ వాత కాడ్కి, యేసు అవిసి దుపరిత యేలతె అద్ కుహిత్ బగ్ ఉచ్చి మత్తార్. ⁷⁻⁸ అద్ వకత్తె, వోనుర్ సిస్యలిర్ కానె యేల్లె చహర్తె సాత్తెర్. అద్ గట్టుతెన్ సమరయ జాతిత ఉంది వెయ్యె యేర్ వోయ్, కుహితగ వాత. తె యేసు, “బాయి, నాకున్ ఉండన్ సాటి యేర్ సీమ్” ఇంజెర్ అద్ వెయ్యెన్ తల్కెతార్.

⁹ యూదుల్క అని సమరయ జాతితుర్ అలగ్ పిసెర్ మందిర్. అదెన్ సాటి యేసున గొప్పి కేంచి అద్ వెయ్యె గుల్ ఆసి, “యెయా! నిమె యూదుల్కన జాతితోని ఆంది. నన సమరయ జాతితోన ఆందున్. ఉన్లె యేర్ సీమ్ ఇంజి, నాకున్ బహన్ తల్కంతి?” ఇంజెర్ యేసున్ ఇత్త. ¹⁰ అద్ కేంచి యేసు, “ఉన్లె యేర్ సీమ్’ ఇంజెర్ తల్కవన్ బారెతెన్ ఆయి అని బగవంతన వరమున్ బారెతెన్ ఆయి నీకున్ టావ సెలె. ఇవ్ టావ మన్మడ్ ఇత్తెకె, నిమెయ్ ఉల్ల అదెన్ నాకున్ తల్కన్ది అని నీకున్ జీవ వాలె యేర్ సీందున్” ఇంజెర్ తాన్ సంగ వెహ్తార్. ¹¹ అస్కె అద్ వెయ్యె, “సాబ్! నిహ్గా యేర్ చేంది కియ్యె పొహ్రాయ్ ఆయి నోడెయ్ ఆయి సెలె. ఇద్ కుహి బెయ్ కోల్ మంత. అద్ జీవ వాలె యేర్ నీకున్ బగటల్ పుటర్? ¹² మా తొత్తార్ బాబొ యాకొబ్ ఇద్ కుహి మాకున్ సీతార్. ఇద్ కుహిత యేర్ తన, తన్వర్ మర్క్ ఉటెర్ అని వూరంగ్ పియంగ్-కాల్క గిర్ ఉట్టంగ్. నిమె యాకొబున్ తెర్ డగుని కి బతల్?” ఇంజెర్ యేసున్ పూసి కీత. ¹³ తె యేసు, “ఇద్ యేర్ ఉన్వల్ హర్ వారార్ ఉండె వట్కంతార్. ¹⁴ బతి నన సియ్యల్ యేర్ ఉన్వన్ బస్కెట్కె వట్క వసా. నన సియ్యల్ యేర్ బస్కెట్ జీవతె మందన్ సాటి, వోన్ రొపా బస్కెట్ గిర్ పొంగ్గెర్ మన్వల్ జలత్ దాత్ మందంత” ఇంజెర్ వెహ్తార్.

¹⁵ తె అద్ వెయ్యె, “సాబ్! బస్కెట్ యేర్ వట్క్వక్నె అని చేంది కియ్యె వాయ్యక్నె, అద్ యేర్ నాకున్ సీమ్” ఇంజెర్ యేసున్ తల్కత. ¹⁶ అస్కె యేసు, “నిమె సాంజి, నీ మాడ్సన్ కేయ్యి, తర” ఇంజెర్ వెహ్తార్. ¹⁷ తె అద్ వెయ్యె, “నాకున్ మాడ్సా సెలార్” ఇంజెర్ వెహ్తా. అద్ కేంచి యేసు, “హో కరలె, ¹⁸ మొదొల్ నీకున్ సియ్యర్ మాడ్సర్ మత్తెర్. ఇంకె నీ సంగ మంతార్ వోర్, నీవార్ మాడ్సా ఆయెర్. బాయి, నిమె మత్త అదెన్ కరల్ వెహ్తా” ఇంజెర్ అద్ వెయ్యెన్ ఇత్తార్.

¹⁹ అస్కె అద్ వెయ్యె, “సాబ్! నిమె పర్వత్తని ఆంది ఇంజెర్ సమ్మె మాసెర్ మంతాన్. ²⁰ తె నాకున్ ఇద్ గొప్పి వెహ: మమొట్ ఇద్ గెరాజిమ్ గుటత్ పొరా పార్తన-వింతి కీంతామ్. ఇగెనె మా తొత్తార్ గిర్ పార్తన-వింతి కీతెర్. బతి మీ యూదుల్క సిరిప్ యెరుసలెమె కరల్ పార్తన-వింతి కియ్యల్ జాగ ఇంజెర్ బారి వెహంతిట్?” ఇంజెర్ యేసున్ సంగ ఇత్త. ²¹⁻²³ తె యేసు, “బాయి! బోన పార్తన-వింతి కీంతిట్ ఇన్వల్, మీ సమరయతుర్కున్ టావ సెలె. బతి బోన పార్తన-వింతి కీంతామ్ ఇన్వల్ మాకున్ టావ. బారితెకె మా యూదుల్కనగటలె బచె మాయ్యల్ కార్య వాయ్యల్ మంత. అద్ వకత్తె ఇద్ గుటత్ పొరాన్ ఆయి, యెరుసలెమ్మగన్ ఆయి, మిరట్ బాబొ బగవంతన పార్తన-వింతి కియ్యట్. బతి కరల్ పార్తన-వింతి కియ్యలిర్ తమ్మ ఆత్మతగ సత్తె పార్తన-వింతి కీంతెర్. అద్ వకత్ ఇంకె వాసిన్ మంత. ఇద్ నన వెహ్తా గొప్పిత్ పొరా బరొస ఇర. తనకున్ పార్తన-వింతి కియ్యలిర్ ఆతుర్ మందన ఇంజెర్, బాబొ బగవంతల్ సూడ్సర్ మంతార్. ²⁴ బగవంతల్ ఆత్మ రూప్సె మన్వల్ ఆత కాడ్కి, పార్తన-వింతి కియ్యలిర్ తమ్మ ఆత్మతగ సత్తె వోన పార్తన-వింతి కియన్” ఇంజెర్ అద్ వెయ్యెన్ వెహ్తార్. ²⁵ అస్కె అద్ వెయ్యె, “కిరిస్తు* వాంతార్ ఇన్వల్ నాకున్ టావ. వోర్ వాత పెజె, సమ్మిర్కున్ సమ్మె కుల కుల వెహంతార్ బెరె” ఇంజెర్ యేసున్ వెహ్తా. ²⁶ తె, “ననయ్ వోన ఆందున్” ఇంజెర్ యేసు తాన్ వెహ్తార్.

²⁷ అదె వకత్తె వోనుర్ సిస్యలిర్ అగ వాతెర్. వోర్ యేసు ఉంది వెయ్యెన్ సంగ వడ్క్వల్ సూడ్సి, బెయ్ గుల్ ఆతెర్. బతి, «నీకున్ బతల్ పహె?» ఇంజెర్ అద్ వెయ్యెనె ఆయి, «నిమె అద్ వెయ్యెన్ సంగ బారి వడ్క్వతి?» ఇంజెర్ వోర్ యేసునె ఆయి, వూర్గటల్ వారార్ గిర్ పూసి కియ్యకి.

²⁸ అద్ వెయ్యె బుడ్డితున్ అగనె సుటి కీసి, చహర్తె సాత్త. ²⁹ అని పర్జతున్ సంగ, “ఇంకె వేరి నన కీత సమ్మెతున్ బారెతె వెహ్తార్. వోరె మాయ్యల్ మోక కిరిస్తు ఆందురెయ్ బతలొ? మిరట్ వాసి సూడట్” ఇంజెర్ వెహ్తా. ³⁰ తె వూర్ చహర్తల్ పెసిసి యేసు మన్వల్ జాగతగ వాసెర్ మత్తెర్.

³¹ అద్ గట్కతె వూర్ సిస్యలిర్, “గురుజి! జరతెర్ తిన్” ఇంజెర్ యేసున్ జుల్మ కీతెర్. ³² బతి యేసు, “మీకున్ టావ సెలె అద్ చంది తిందన్ సాటి, నహ్గా మంత” ఇంజెర్ వెహ్తార్. ³³ తె సిస్యలిర్, “గురుజిన్ తిందన్ సాటి, బోరె చంది

* 4:25 కిరిస్తు హెబ్రి బాసతె మెసయల్ ఇంతెర్. ఇదెన అర్తమ్ పర్జతున్ బచి కియ్యె, బగవంతల్ నేమి కీసి, సారి కియ్యల్ రాజల్. వేన్ సాటి యూదుల్క సూడ్సర్ మత్తెర్.

తతెరెయ్ బతలొ?” ఇంజెర్ తమ్మ తమ ఇత్తెర్. ³⁴ అస్కె యేసు, “నాకున్ సారి కీతొర్ బగవంతన ఇవ పియ్యి తాక్వల్ అని వోన కామున్ బర్చుర్ కియ్యలె నావ చంది ఆసి మంత. ³⁵ నమునతున్ మిరట్, ‘వావై విజ వీత్త పెజె, ఉండె నాలుంగ్ మహినె పంట కొయ్యె వాంత’ ఇంతిట్. బతి వహుక్కెకె సూడట్. ఇంకె అద్ పంట కొయ్యెన్ తయర్ మంత*” ఇంజెర్ మీకున్ వెహ్చార్ మంతొన్. ³⁶ “పంట కొయ్యలిర్కున్ ఇంకె బూతి పుట్టెరెన్ మంత. బస్కెట్ పిస్వల్ జీవతగ లోకుర్కున్ తర్వలె, అద్ పంట కొయ్యలిర్కున్ పుట్టల్ పండి. ఇదెన్ హిందల్, విజ వీత్వలిర్ అని పంట కొయ్యలిర్ ఆనంద్మె మంద పరంతెర్. ³⁷ ‘విజ వీత్వల్ వొరొర్ అని పంట కొయ్యల్ ఉండె వొరొర్’ ఇన్వల్ సాస్తుర్ కరల్ ఆంద్. ³⁸ మిరట్ కష్టమ్ కీసి వీత్మకి అద్ పంట కొయ్యె, మీకున్ సారి కీతొన్. అద్ విజ వీత్తె దుస్రుర్ కష్టమ్ కీతెర్. వూర కష్టమ్న పండితున్ మిరట్ యేచ్చెర్ మంతిట్” ఇంజెర్ ఇత్తొర్.

³⁹ “నన కీత సమ్మెతున్ బారెతె, నన వెహ్చక్ మనెకెన్ నాకున్ వెహ్చొర్” ఇంజెర్ అద్ వెయ్యె వెహ్చ. తె అద్ గవతున్ పియ్యి, సమరయ యేరియత చహర్తుర్ వెలెటిర్ లోకుర్ యేసున్ పొరొ బరొస ఇర్తెర్. ⁴⁰ వూర్ సమరయతుర్ వొన్ల వాసి, “గురుజి! నిమె మహ్ వాసి, మందయ్ లాగర్” ఇంజెర్ జుల్మ కీతెర్. తె యేసు వూర్ రండ రోజ్క్ మత్తొర్. ⁴¹ యేసు వెహ్చొంగ్ గొస్టింగ్ కుద్ కేంచి, ఉండె వెలెటిర్ బక్తలిర్ ఆతెర్. ⁴² “నిమె వెహ్చ గొస్టి పియ్యిన్ ఆయె బతి, మమెట్ వోనంగ్ గొస్టింగ్ కుద్ కేంచి, వేరె దునియతున్ బచి కియ్యల్ కిరిస్తు ఇంజెర్ కరి కీసి, నమ్మెమ్” ఇంజి వెయ్యెన్ వెహ్చొర్.

యేసు అదికారిన్ మరిన్ చొకాట్ కియ్యల్

⁴³ రండ రోజ్క్ ఆత పెజె, యేసు గలిలయ యేరియతె సొన్లె పెసితొర్. ⁴⁴ (అస్కె యేసు, «పర్వత్తన్ తన్వ సొంత యేరియతగ మాన్ పుటొ» ఇంజెర్ మునెనె వెహ్చి మత్తొర్.) ⁴⁵ తెర్ బతి వోర్ గలిలయ యెవ్త పెజె, అగటుర్ లోకుర్ చొకాట్ మాన్ సీసి, వోన్ కరుమ్ కీతెర్. బారితెకె పస్క సడ్ జర్గెనెకె, వూర్ యెరుసలెమ్మగ సొంజి మత్తెర్ అని యేసు కీతంగ్ మయ్యతంగ్ కామ్మి సూడ్చి మత్తెర్. ⁴⁶ అహన్ సొనెకె సొనెకె, ఇదెన్ మునె యేతున్ ఆంగుర్కొన రసత్ దాత్ మార్కుసీతొర్ అద్, గలిలయత కాన చహర్దె యెవ్తొర్. కపెర్నహోమ్ ఇన్వల్ చహర్దె రాజనొర్ వొరొర్ అదికారి మత్తొర్. వోనొర్ మరి బేమరితె సొనల్ మీండిచ్చి మత్తొర్. ⁴⁷ తె వోర్ అదికారి, యూదయతల్ గలిలయ యేరియతె యేసు వాతొర్ ఇంజెర్ కేంచి, యేసునగ సొత్తొర్. అని, “నా మరి బేమరితె సొనల్ మీండిచ్చి మంతొర్. నిమె వాసి, చొకాట్ కియ్యె లాగర్” ఇంజెర్ యేసున్ వినంతి కీతొర్. ⁴⁸ తె యేసు, “చమత్కార్క్ అని మయ్యతంగ్ కామ్మి సూడ బీగర్, నా పొరొ బరొస కియ్యిట్ సెలెయ్?” ఇంజెర్ ఇత్తొర్. ⁴⁹ తెర్ బతి వోర్ అదికారి, “పర్బు! నా మరిన పరన్ సొన్వక్ మనెకెన్ వర” ఇంజెర్ ఇత్తొర్. ⁵⁰ అస్కె, “నిమె రోన్ సొన్. నీ మరి పిసంతొర్” ఇంజెర్ యేసు వెహ్చొర్. తె వోర్ అదికారి, యేసున గొస్టిత్ పొరొ బరొస ఇర్చి పెసితొర్. ⁵¹ వోర్ అహన్ సరియ్ సొంజెర్ మనెకెన్, వోనుర్ సేవ్కలిర్ మునెత్క్ వాసి, “నీవొర్ మరి చొకాట్ ఆతొర్” ఇంజెర్ వెహ్చొర్. ⁵² తె వోర్ అదికారి, “బద్ వకత్తె చొకాట్ ఆతొర్?” ఇంజెర్ సేవ్కలిర్కున్ పూసి కీతొర్. అస్కె వూర్, “నినె దుపరి ఉంది నేక్కెకె, చొకాట్ ఆతొర్” ఇంజెర్ వెహ్చొర్. ⁵³ బరొబర్ అదె వకత్తె యేసు తనకున్, «నీవొర్ మరి పిసంతొర్» ఇన్వల్ గొస్టి వెహ్చొర్ ఇంజెర్ సమ్మె మాసి, వోర్ అదికారి అని వోన రోతుర్ యేసున్ పొరొ బరొస ఇర్తెర్. ⁵⁴ యూదయ యేరియతల్ గలిలయ వాసి, యేసు కీత రెండవ మయ్యత కామ్ ఇద్ ఆంద్.

కెయ్-కాల్క్ అర్చి సొత్తొన్ చొకాట్ కియ్యల్

5 అద్ ఆత పెజె, యూదుల్కొన ఉంది సడ్ కరుమ్ వాత కాడ్చి, యేసు యెరుసలెమ్ నగుడె, వర్చి సొత్తొర్. ² యెరుసలెమ్మ గొరెన పాటక్ ఇన్వల్ జాగతున్ కరుమ్ హెబ్రి బాసతె బెతెస్త ఇన్వల్ కోనెర్ మత్త. అద్ కోనెర్తగ సియుంగ్ మండొప్ప మత్తంగ్. ³⁻⁴ * [అద్ కోనెర్తగ కహి యేలనె బగవంతనొర్ దూతల్ రెయ్యి యేతున్ హలి కీందుర్.

* 4:35 లోకుర్కున్ బగవంతన చర్చితె తర్వల్ పంట. బహన్ ఇత్తెకె సమరయ జాతితుర్ వెలెటిర్ యేసునగ వాసెర్ మత్తెర్. వూర్కున్ బగవంతన సరి-మారగున్ బారెతె వెహ్చలె కానె ఆసి మంత ఇత్తొర్. * 5:3-4 తొలెతంగ్ కహితంగ్ గ్రీకు గ్రంత్కొనగ ఇవ్ గొస్టింగ్ సెలెంగ్.

అస్కె బోర్ మునె రెయంతోరా వోర్ బాతల్ బేమరి మత్తెకె గిర్ చొకాట్ ఆందుర్.] అవ్ మంజొష్కనగ గుడ్డిర్, లెంగ్లల్-తుంగ్లలిర్ అని కెయ్-కాల్క్ అర్చి సొత్తుర్, సమ్మి తీర్క్-నంగ్ బేమరింగ్ వాలిర్ జాగ పియ్యి మందిర్. ⁵ వూర్ రొపా తీస ఆట్ (38) సాల్క్-నల్ బేమరితె మన్వల్ వొరార్ మాయ్నల్ మత్తూర్. ⁶ వోర్ మాయ్నన్ యేసు సూడ్సి, వెలె సాల్క్-నల్ బేమరితె మంతోర్ ఇన్వల్ కరి కీసి, “చొకాట్ ఆయన ఇంతి కి?” ఇంజెర్ వోన్ పూసి కీతార్. ⁷ తె వోర్ మాయ్నల్, “పర్బు! అద్ కోనెర్త యేర్ హాలె మానెకె, నాకున్ అగ రెహ్యాలిర్ బోరె సెలూర్. అదెన్ సాటి నన రెయ్లె వానెకెతె, నాకున్ తెర్ మునెన్ దుస్రాల్ బోరైర్ అగ రెయంతోర్” ఇంజెర్ జవబ్ సీతార్. ⁸ అస్కె యేసు, “తేద! అని నీవ చాప్రతున్ పియ్యి రోన్ సాన్” ఇంజెర్ ఇత్తూర్. ⁹ అహన్ ఇత్త బరొబర్, వోర్ చొకాట్ ఆసి, తన్వ చాప్రతున్ పియ్యి తాక్సెర్ సొత్తూర్.

ఇద్ గట్టు యూదుల్క్-న ఆరమ్మ దివొసున్ నేటి జర్గత. ¹⁰ తె యూదుల్క్-నుర్ అదికారిర్, “నీవ చాప్ర పియ్యి తాక్సల్, నేండ్ ఆరమ్మ దివొస్ ఆత కాడ్కి, దర్మత కానుస్తున్ ఉల్ల తాక్సల్ ఆంత” ఇంజెర్ చొకాట్ ఆతోన్ సంగ ఇత్తైర్. ¹¹ బతి వోర్, “నాకున్ చొకాట్ కియ్యల్, ‘నీవ చాప్ర పియ్యి సాన్ ఇత్తూర్’” ఇంజెర్ వూర్క్కున్ వెహ్తార్. ¹² తె వూర్, “నీకున్ చాప్ర పియ్యి సాన్” ఇంజెర్ బోర్ వెహ్తార్?” ఇంజి పూసి కీతెర్. ¹³ బతి వోర్ వెహ పర్మకి. బారితెకె అగ వెలె మాంది మత్తైర్ అని యేసు మాందితగ మిస్సె మాసి సొత్తూర్. ¹⁴ అద్ ఆత పెజె యేసు, వోన్ మందిర్త ఆప్రతగ సూడ్సి, “ఇమల కేంజ! నిమె చొకాట్ ఆతి. ఉండె వెలె దుక్స వాయ్క్-నె మన్లె, పాప్సుంగ్ కామ్మ కియ్య” ఇంజెర్ వెహ్తార్. ¹⁵ అస్కె, వోర్ మాయ్నల్ యూదుల్క్-నుర్ అదికారిర్గ సొంజి, “నాకున్ చొకాట్ కియ్యల్ యేసు ఆందుర్” ఇంజెర్ వెహ్తార్.

¹⁶ యేసు ఆరమ్మ దివొసున్ నేటి ఈతంగ్ కామ్మ కీతతున్ హిందల్, వూర్ యూదుల్క్-నుర్ అదికారిర్ యేసున్ దుక్స సియ్యల్ మొదొల్ కీతెర్. ¹⁷ బతి యేసు, “నా బాబొ హర్ గట్టు కామ్ కీసెర్ మత్త కాడ్కి, నన గిర్ కామ్ కీసెర్ మంతోన్” ఇంజెర్ వెహ్తార్. ¹⁸ ఇద్ కారస్తున్ హిందల్, యూదుల్క్-నుర్ అదికారిర్, “వేర్ సిరిఫ్ ఆరమ్మ దివొస్స మా నేకితున్ బహ్మ మాయ్వలె ఆయ్య, బగవంతన్ తన్వోర్ బాబొ ఇంజెర్ వెహ్తార్, తనకున్ బగవంతన్ బరొబర్ బడి కీసెర్ మంతోర్” ఇంజి, ఇవ్ రండ్ కారన్కున్ హిందల్, యేసున్ జకన ఇంజెర్ వూర్ నిర్బయ్ కీతెర్.

బగవంతన అదికార్ యేసునగ మంత

¹⁹ తె యేసు ఇహిన్ పోడి కీసి వెహ్తార్: “ఇద్ సతెమ్ ఆంద్. బగవంతనోర్ మరి తన్వ తన బతయ్ కియ పరొర్. బాబొ బతల్ కీంతోరా, సిరిఫ్ అదెనె సూడ్సి మరి కీంతోర్. బాబొ బగవంతల్ బతంగ్ బహన్ కీంతోరా, అవెన్ మరి అహ్నా కీంతోర్. ²⁰ బాబొ మరిన్ లాడ్ కీత కాడ్కి, తన కియ్యలిక్ సమ్మె కామ్మున్ మరిన్ తొహ్చార్ మంతోర్. ఉండె వెలె డగుక్ కామ్మ మునె బవిసత్తై మరిన్ సంగ బాబొ కియ్యస్వల్ సూడ్సి, బెయ్ గుల్ ఆకిట్. ²¹ బాబొ సొతుర్క్కున్ బహన్ నేండుసంతోరా, అహ్నా మరి గిర్ తన నేమి కీతుర్క్కున్ పిసుసంతోర్. ²² బాబొ బోనె తస్వ కియ్యెర్. బతి తస్వ కియ్యె బర్బుర్ అదికార్ తన్వోర్ మరిన్ సీతార్. ²³ తనకున్ బహనై సమ్మిర్ మాని కీంతెరా, అహ్నా మరిన్ గిర్ మాని కియన ఇంజెరెన్, అద్ అదికార్ మరిన్ కెయ్లె బగవంతల్ సీతార్. బోరె ఆయి మరిన్ మాని కియ్యెకె, మరిన్ సారి కీతార్ బాబొన్ గిర్ మాని కీత లెకతగ వాయ్మెర్. ²⁴ నావ గొస్టి కేంచి, నాకున్ సారి కీతొనగ బరొస ఇర్వన్, బస్కెట్ పిస్వల్ జీవ పుటంత. ఆతోన్ పాప్సున్ హిందల్, వాయ్యల్ సిక్స తపంత. మరన్తల్ తప్పి, వోన్ బస్కెట్ పిస్వల్ జీవ పుట్ట.

²⁵ “ఇద్ సతెమ్ ఆంద్. సొనలిర్ బగవంతనోర్ మరిన్ గొస్టి కేంజ్యల్ వకత్ వాసెర్ మంత. అద్ ఇంకె వాసిన్ మంత. అద్ గొస్టి కేంచి, తాక్వలిర్ బస్కెట్ పిసంతెర్. ²⁶ బహనై బగవంతల్ జీవతోర్ మాల్యల్ ఆందురొ, అహ్నా బస్కెట్ పిస్వల్ జీవతున్ సియ్యల్ అదికార్ మరిన్ సీతార్. ²⁷ వోర్ మరి స్వర్గ్-నోర్ మాయ్నల్ ఆత కాడ్కి, లోకుర్క్కున్ తస్వ కియ్యల్ అదికార్ బాబొ వోన్ సీతార్. ²⁸ మిరట్ గుల్ ఆయ్మట్! ఉంది వకత్ వాసెర్ మంత. అద్ వకత్తై వీచ్-నగ మన్వలిర్ సొనలిర్ సమ్మిర్ గిర్ బగవంతనోర్ మరిన్ గొస్టి కేంచి, నేండ్సి బహ్రి వాంతెర్. ²⁹ నేండ్సి బహ్రి వాతుర్ సమ్మిర్-కున్ వోర్ మరి తస్వ కీసి, వూర్గట్ పునెవంతలిర్క్కున్ బస్కెట్ పిస్వల్ జీవ సీంతోర్ అని పాపెన్తలిర్-కున్ సిక్స వాటంతోర్.

³⁰ అద్ తస్య నావ ఇవతున్ పియ్య ఆయో బతి, నాకున్ సారి కీతొన ఇవతున్ పియ్యన్ కీంతొన్. నావ నన బతయ్ కియ పరాన్. బాబల్ నాకున్ వెహ్త తీరె, లోకుర్కున్ నాయ్ తస్య కీంతొన్. నన కియ్యల్ తస్య నాయ్ అంద్.

యేసున్ బారెతంగ్ గవంగ్

³¹ “మోక నా బారెతె ననయ్ గవ వెహ్కతె, నావ గవతున్ కరల్ ఇంజెర్ వొపుర్. ³² నా బారెతె గవ వెహ్లా వొరార్ మంతార్. వోర్ వెహ్వాల్ గవ సతెమ్ ఇంజెర్ నాకున్ టావ.

³³ “మిరట్ యోహాన్తగ కహితుర్కున్ రొహ్టట్. వోన గవ సతెమె అంద్. ³⁴⁻³⁵ యోహాన్ డివెత్ దాత్ పొచ్చెర్ వేడ్చి సీసెర్ మత్తార్. మిరట్ వోన వేడ్చితె జులుక్ వేరి, బెయ్ ఆనంద్చె మత్తిట్. మిరట్ బచె మాయన ఇంజెరెన్ ఇవ్ గొస్టింగ్ వెహ్చెర్ మంతాన్.

“బతి నాకున్ నరిమన్కన గవ జురత్ సెలె. ³⁶ బారెతెకె యోహాన్తున్ తెర్ డగుర్ గవ నహ్ మంత. అద్ బతల్ ఇత్తెకె: నన కీతంగ్ మయ్యతంగ్ కామ్మ. ఇవ్ కామ్మున్ బగవంతల్ నాకున్ కీమ్ ఇంజెర్ హల్లి కీతొర్. ఇవె నాకున్ బాబొ సారి కీతొర్ ఇంజెర్ నిరుపన్ కీంతంగ్. ³⁷ వోరె బాబొ నా బారెతె ఇద్ గవ వెహ్చెర్ మంతార్. బతి మిరట్ బస్కెన్ వోన వచన్ కేంజ్చికి అని బస్కెన్ వోన రూప్ సూడ్చికి. ³⁸ సారి కియ్యన్ పొరా మిరట్ బరొస ఇర్వ కాడ్కి, వోన బోద మీవంగ్ దిల్కనగ మనా. ³⁹ బస్కెట్ పిస్వల్ జీవ దర్మ-గ్రంత్నగ పుటంత ఇంజెర్ సోంచ్ కీసి, మిరట్ చొకొటె మహ్కంతిట్. బతి అవె వచన్క నా బారెతె గవ వెహ్చెర్ మంతంగ్. ⁴⁰ తెర్ బతి మిరట్ అద్ బస్కెట్ పిస్వల్ జీవతున్ సాటి నహ్ వాయ్చె వొప్పిట్.

⁴¹ “నాకున్ మాయ్చిల్ సియ్యల్ డగుర్-పాన్ లాగొ. ⁴² బారెతెకె మిరట్ బగవంతన్ పెర్మ కియ్యిట్ ఇన్వల్ నాకున్ టావయె. ⁴³ నన నావొర్ బాబొన పొరాడె వాతొన్. నాకున్ మిరట్ వొప్పకి. బతి ఉండె బోరె తన్వ పొరాడె తనయ్ వాతెకె, వోన్ మిరట్ ఆనంద్చె వొపంతిట్. ⁴⁴ మీకున్ దుస్రుర్ డగుర్-పాన్ సియ్యల్ ఇస్టమ్ బతి, వొరొరె మన్వల్ బగవంతల్ సియ్యల్ డగుర్-పాన్తున్ సాటి కోసిద్ కియ్యిట్. తె నా పొరా బహన్ బరొస ఇర పర్కిట్? ⁴⁵ నన బాబొనగ మీ పొరా పిరది కీంతొన్ బతలొ ఇంజెర్ సోంచ్ కియ్యిట్. బతి దర్మత కానున్తున్ లిహి కీతొర్ మోసె పర్వత్తన్ పొరా మిరట్ ఆస ఇర్తిట్. వోర్ మోసెయ్ మీ పొరా పిరది కీంతొర్. ⁴⁶ వోర్ మోసె నా బారెతె లిహి కీత కాడ్కి, మిరట్ మోక వోన్ బరొస కీందిట్తె, నాకున్ గిర్ బరొస కీందిట్. ⁴⁷ బతి మోసె లిహి కీత దర్మత కానున్తుంగ్ గొస్టినె మిరట్ నమ్మిట్తె, నావంగ్ గొస్టిన్ బహన్ నమ పర్కిట్?” ఇంజెర్ యూదుల్కునుర్ అదికార్కున్ వెహ్చార్.

యేసు సియ్యంగ్ హజర్క్ మాందితున్ జేవున్ దొస్వల్

6 అద్ ఆత పెజె, యేసు గలిలయ సమ్మర్తున్* హంద బాజ్చెకె, తన్వర్ సిస్యలిర్ సంగ సొత్తార్. ² బేమరి వాలిర్కున్ యేసు చొకొట్ కీతంగ్ మయ్యతంగ్ కామ్మున్ సూడ్చి, వెలెటిర్ మాంది వోన్ పెజెయ్ వాసెర్ మత్తెర్. ³ తె యేసు గుట తెర్గిసి, తన్వర్ సిస్యలిర్ తోడా ఉద్తొర్. ⁴ అవ్ దివొస్కనగ యూదుల్కున పస్క సడ్ కరుమ్ వాసి మత్త. ⁵ అద్ వకత్తె యేసు తల తహ్చి సిర్కుట్ సూడ్చార్. తె వెలెటిర్ మాంది తన్ వాసెర్ దిస్తెర్. “వీర్ సమ్మిర్ తిన్లె బగటల్ కానె యేచ్చి తర్కట్?” ఇంజెర్ పిలిపున్ యేసు పూసి కీతొర్. ⁶ తన బతల్ కియ్యల్ మంతార్ ఇన్వల్ తనకున్ టావయ్. బతి వోర్ పిలిప్ప మన్లె బతల్ మంతయె కరి కియన ఇంజెరెన్, యేసు అహన్ పూసి కీతొర్. ⁷ తె పిలిపు, “రండ నుహ్కా (200) కూరతంగ్ బిలన్* చంది యేచ్చి తత్తెకె తెర్ బతి, హర్ వొరొన్ జరజర తిన్లె గిర్ యెవొ” ఇంజెర్ జవబ్ సీతొర్. ⁸⁻⁹ అస్కె వోసుర్ సిస్యలిర్గటల్ సీమెన్-పేతుర్తార్ తముర్ ఆంద్రెయల్, “ఇగె వొరొర్ కాండినగ సియ్యంగ్ సారింగ్ అని రండ చుడుక్ మీన్క మంతంగ్. బతి ఇచొర్ వెలె మాందితున్ ఇవ్ బేకెన్ యెవొంగ్” ఇంజెర్ యేసున్ వెహ్చార్.

* 6:1 తిబెరియ సమ్మర్ ఇంజెర్ గిర్ కేయంతెర్. * 6:7 రండ నుహ్కా కూరతంగ్ బిలన్ విలువ కమి జాస్త అట్ మహినన బూతి. ఇవెన్ గ్రీకు బాసతె దేనరంగ్ ఇంతెర్.

¹⁰ తె యేసు, అగ ఉద్దల్ జాడి మత్త కాడ్కి, “తాన్ పొరొ పర్జతున్ ఉపుసట్” ఇంజెర్ వెహ్తార్. తె మరి-మియడ్ అని వెయ్యెకున్ లెక కియ్యకె, లగ్-బగ్ సియుంగ్ హజర్క్ (5,000) మాడ్చ పంగత్ ఉత్తెర్. ¹¹ అస్కె యేసు, అవ్ సారింగ్ పియ్య, బగవంతన్ దనెవాద్ వెహ్చి, పంగత్ ఉద్తుర్కున్ వహ్చి కియ్యె సీతార్. అహ్వా మీన్కున్ గిర్ సీతార్. వూర్ తిందనచ్చార్ తిత్తెర్. ¹² పర్జ పెటిమెన్ తిత పెజె, “ఇచుర్ గిర్ కరబ్ ఆయ్యక్నె, మెయ్యంగ్ టుక్డెంగ్ సమ్మె మీరి కీప్టె” ఇంజెర్ సిస్యలిర్కున్ యేసు వెహ్తార్. ¹³ తె సిస్యలిర్, తిత్తంగ్ అవ్ సియుంగ్ సారిన్ మెయ్యంగ్ టుక్డెన్ మీరి కీతెకె, బార డాలంగ్ నింతంగ్. ¹⁴ అద్ మయ్యత కామున్ సూడ్చి, పర్జ గుల్ ఆతెర్. అని “ఇద్ దునియతె వాయ్యె మత్తార్ వోర్ కరల్ పర్వక్తల్ వేరె ఆందుర్”# ఇంజెర్ పర్జ ఇత్తెర్. ¹⁵ తె యేసు, వూర్ పర్జ తనకున్ హటున్ రాజల్ కియ్యె ఆంతెర్ ఇన్వల్ కరి కీసి, అద్ గుటతెకె వొరొరె సొత్తార్.

యేసు సమ్మర్త యేత్ పొరొ తాక్యల్

¹⁶⁻¹⁷ అద్ నేటి పోడ్డ్ సొనెకె, యేసునుర్ సిస్యలిర్ గలిలయ సమ్మర్త డర్దిత్ కరుమ్ సొంజి, యేసున సరి సూడ్చెర్ మత్తెర్. అస్కె సికటి ఆసెర్ మత్త తెర్ బతి, యేసు వూర్ వాయ్యెకె మత్తార్. తె వూర్ సిస్యలిర్, ఉంది రూకతగ ఉచ్చి, సమ్మర్తున్ హంద బాజున్ మన్వల్ కపెర్నహోమ్ చహర్తె సొన్లె పెసితెర్. ¹⁸ అదె వకత్తె డగుర్ వడి-దూందడ్ తేచ్చి, సమ్మర్తంగ్ హెల్వంగ్ బడె మాతంగ్. ¹⁹ వూర్ లగ్-బగ్ మూంద్-నాలుంగ్ కోస్క్ లక్ రూకతున్ తాకుస్త పెజె, యేత్ పొరొ తాక్సెర్ యేసు తమ్మ రూకతగ వాయ్యల్ సూడ్చి, బెయ్ వెరితెర్. ²⁰ బతి యేసు, “వెరిమట్! ననయ్ ఆందున్” ఇంజెర్ వూర్కున్ వెహ్తార్. ²¹ అస్కె వోన్ ఆనంద్ అద్ రూకతగ ఉపుసీతెర్. అస్కె యెంటెనె వూర్ సొన్వల్ జాగతె అద్ రూక యెప్త.

²²⁻²³ పర్బు వింతి కీసి జేవున్ దొస్తార్ అద్ జాగతె, దుస్రా నేటి కహి రూకంగ్ తిబెరియ నగుడల్ వాతంగ్. తె సమ్మర్త హంద బాజున్ రెహా మాయ్యలిర్ లోకుర్, సిస్యలిర్ సిరిప్ ఉందియ్ రూకతె సొత్తెర్. బతి వూర్ తర్సొతె యేసు సొన్మకి ఇంజెర్ కరి కీతెర్. ²⁴ వూర్ మాంది యేసున్ అని సిస్యలిర్కున్ మహ్కాతెర్ బతి, బోరె పుట్మకి. తె అవ్ రూకనగ ఉచ్చి, యేసున్ మహ్కాసెర్ కపెర్నహోమ్ సొత్తెర్.

²⁵ సమ్మర్త హంద డర్దితె యేసు వూర్కున్ దిస్త పెజె, “గురుజి! ఇగె బస్కె వాతి?” ఇంజెర్ పూసి కీతెర్.

జీవతున్ తాకద్ సియ్యల్ కానె యేసుయ్ ఆందుర్

²⁶⁻²⁷ తె యేసు, “మయ్యతంగ్ కామున్ అర్తమ్ కియ్యడున్ హిందల్ ఆయె బతి, బర్బుర్ కానె తిత్తతున్ హిందలె మిరట్, నాకున్ మహ్కాసెర్ మంతిట్. సన్ని కరబ్ ఆయ్యల్ కానెతున్ సాటి పర్పెడె మాయ్యట్. బతి స్వర్గ్నోర్ మాయ్యల్ సియ్యల్ బస్కెట్ పిస్వల్ జీవ వాలె కానెతున్ సాటి పర్పెడె మామ్మ. అహ్వా సియన్ సాటినె, బగవంతల్ తన్వ అదికార్డ మోర్ నా పొరొ వాడ్తార్. ఇద్ సతెమ్ ఆంద్” ఇంజెర్ వెహ్తార్. ²⁸ అస్కె వూర్, “బగవంతల్ మాకున్ బతల్ కియన ఇంతార్?” ఇంజెర్ పూసి కీతెర్. ²⁹ తె యేసు, “బగవంతల్ బోన్తె సారి కీతారొ, వోన్ బరొస ఇరన ఇంజెర్ కోరంతార్” ఇంజి వెహ్తార్. ³⁰⁻³¹ అద్ కేంచి వూర్, “మా తొత్తుర్ ఈజిప్టన్ వానెకె, బోడి గుటనగ మన్న ఇన్వల్ కానె తిత్తెర్. దర్మ-గ్రంత్నగ లిహి కీత తీరె వోర్ స్వర్గ్నల్, అద్ కానెతున్ తిన్లె సీతార్.# తె మమెట్ నీ పొరొ బరొస ఇర్బల్ ఇంకె మా సాటి, బాతల్ మయ్యత కామ్ కీసి తొహంతి?” ఇంజెర్ పూసి కీతెర్. ³² అస్కె యేసు, “అద్ కానెతున్ స్వర్గ్నల్ మోసె సియ్యకి బతి, నా బాబొయె సీతార్. ఇంకె అద్ కరల్ కానెతున్, నా బాబొ స్వర్గ్నల్ సీసెర్ మంతార్. ³³ బాబొ స్వర్గ్నల్ బతతున్ సారి కీతారొ, అదె దునియతుర్కున్ జీవదాన్ సీంత. బగవంతల్ సారి కీత కరల్ కానె ఇదె ఆంద్” ఇంజెర్ వెహ్తార్. ³⁴ తె వూర్, “పర్బు! అద్ కానెతున్ మాకున్ బస్కెట్ సీమ్” ఇంజెర్ కోరెర్. ³⁵ అస్కె యేసు, “ననయ్ జీవదాన్ సియ్యల్ కానెత ఆందున్. నా పొరొ బరొస ఇర్పి, నావ చర్నతె వాయ్యలిర్ బస్కెట్కె వూరంగ్ దిల్కున్ రొపా

కరుసాయుర్ అని వూర్క్కున్ బస్కెట్ కె యేర్ వట్క వసా. ³⁶ బతి నన ఇదెన్ మునె వెహ్తాపినయ్, మిరట్ నాకున్ సూడ్త పెజె గిర్ నా పొరా బరొస ఇర్మకి. ³⁷ తెర్ బతి, బోన్ బోన్ బాబొ నహ్గ సారి కీంతోరా, వూరె నహ్గ వాంతెర్. నహ్గ వాతుర్క్కున్ బస్కెనె బహి డగ్గి కియెన్. ³⁸ బారితెకె, నన నావ ఇచ తీర్ కియె స్వర్గనల్ రెయ్ వాయ్కి. బతి నాకున్ సారి కీతొన ఇచ తీర్ కియెనె వాతొన్. ³⁹ నాకున్ సారి కీతొన ఇచ బతల్ ఇత్తెకె, నహ్గ సారి కీతుర్గటల్ వొరార్ గిర్ తప్పి సాన్వకెనె నన కాబాడ లాగర్. వూర్క్కున్ తస్వ కియ్యల్ దివొసున్ నేటి నన నేండుస లాగర్. ⁴⁰ బారితెకె, తన్వోర్ మరిన్ బాజ్ సూడ్చి, బరొస కియ్యన్ బస్కెట్ పిస్వల్ జీవ పుటన ఇన్వలె బాబొన ఇచ ఆంద్. అహన్ బరొస ఇర్వన్ తస్వ కియ్యల్ దివొసున్ నేటి నేండుసంతాన్” ఇంజెర్ వూర్క్కున్ వెహ్తార్. ⁴¹⁻⁴² అస్కె వూర్ యూదుల్కన జాతితుర్, “నన స్వర్గనల్ రెయ్ వాత కానెత’ ఇంతోర్. వేర్ యేసుతె యోసెప్పారె మరి ఆందుర్ కి రా! వేనుర్ అవల్-బాబొ మాకున్ టావయ్. ‘నన స్వర్గనల్ రెయ్ వాతొన ఆందున్’ ఇంజెర్ బారి ఇంతోర్?” ఇంజి గొల్తెర్. ⁴³ తె యేసు, “మీవ మిరట్ గొల్తమట్” ఇంజెర్ వూర్క్కున్ ఇత్తార్. ⁴⁴ “నాకున్ సారి కీతొర్ వోర్ బాబొ, బూర దిల్లగ ఇచ పుటుసంతోరా, వూరె నహ్గ వాంతెర్. దుస్రుర్ వాయుర్. నహ్గ వాతుర్క్కున్ తస్వ కియ్యల్ దివొసున్ నేటి నేండుసంతాన్” ఇంజెర్ వెహ్తార్. ⁴⁵ “బగవంతలె వూర్క్కున్ కరుసీంతోర్”# ఇంజెర్ పర్వక్తలిర్ లిహి కీతెర్. బూరై అవ్ గొస్టింగ్ కరిసి, అవెన్ పియ్ తాకంతెరా, సిరిప్ వూరె నహ్గ వాంతెర్. ⁴⁶ బగవంతన్ సూడ్చిర్ వోర్ బోరె సెలార్ ఇంజెర్ వెహ్చార్ మంతాన్. సిరిప్ ననయ్ బగవంతన్ సూడ్చి, వాతొన ఆందున్. ⁴⁷ బోరై నహ్గ బరొస ఇరంతోరా, వోన్ బస్కెట్ పిస్వల్ జీవ పుటంత ఇన్వల్ సతెమ్ ఆంద్. ⁴⁸ ననయ్ జీవదాన్ సియ్యల్ కానెత ఆందున్. ⁴⁹ మీ తొత్తుర్ అద్ బోడి గుటనగ మన్న ఇన్వల్ కానె తిత్తెర్ తెర్ బతి మార్తెర్. ⁵⁰ బతి ఇద్ స్వర్గనల్ రెయ్ వాత కానెతున్ బోరై తింతెరా, వోన్ బస్కెట్ మరన్ మనా. ⁵¹ స్వర్గనల్ రెయ్ వాత జీవదాన్ సియ్యల్ కానెత ననయ్ ఆందున్. బోరై ఇద్ కానెతున్ తింతోరా, వోర్ బస్కెట్ పిసంతోర్. అద్ కానె నా మేందోల్ ఆంద్. అద్ మేందొడున్ దునియతుర్క్కున్ బస్కెట్ పిసుసి ఇరై, అర్చన సీంతాన్” ఇంజెర్ వెహ్తార్. ⁵² ఇద్ కేంచి వూర్ యూదుల్క, “మరట్ తిన్లె వేర్ తన్వ మేందొడున్ బహన్ సియ పరంతోర్?” ఇంజెర్ తమ్మ తమ సోంగ్నె చర్చ కీతెర్. ⁵³ తె యేసు, “స్వర్గనోర్ మాయ్నన మేందోల్ తిన్వెకెన్ ఆయి, వోన నెతుర్ ఉన్వెకెన్ ఆయి, మీకున్ బస్కెట్ పిస్వల్ జీవ పుట పరా. ఇద్ సతెమ్ ఆంద్. ⁵⁴ బతి బోరై నావ మేందొడున్ తింజి, నావ నెతుడున్ ఉంటారా, వోర్ బస్కెట్ జీవతె మందంతోర్. వోర్ సాతెకె గిర్, తస్వ కియ్యల్ దివొస్సు నన వోన్ నేండుసంతాన్. ⁵⁵ బారితెకె నావ మేందోల్ కరల్ తిన్వల్ కానె ఆంద్ అని నావ నెతుర్ కరల్ ఉన్వల్ చీజ్ ఆంద్. ⁵⁶ బోరై నావ మేందొడున్ తింజి, నావ నెతుడున్ ఉంటారా, వోన్ నన నహ్గ వోర్ ఉంది ఆసి, మందంతామ్. ⁵⁷ జీవతె మన్వల్ బాబొ నాకున్ సారి కీత కాడ్చి, నన జీవతె మంతాన్. అహ్నా నావ మేందొడున్, బోరై తింతోరా వోర్, నా హిందల్ జీవతె మందంతోర్. ⁵⁸ స్వర్గనల్ రెయ్ వాత కరల్ కానెత ననయ్ ఆందున్. తొత్తుర్ మన్న ఇన్వల్ కానె తింజి గిర్ మార్తెర్. బతి ఇద్ కానెతున్ తిత్తుర్ బస్కెట్ జీవతెన్ మందంతెర్ ఇంజి, మీకున్ వెహ్చార్ మంతాన్” ఇంజెర్ ఇత్తార్. ⁵⁹ ఇవ్ గొస్టింగ్ కపర్నహోమ్న సునగొగ్గ* బోద కీనెకె యేసు వెహ్తార్.

బస్కెట్ పిస్వల్ జీవతున్ బారెతె బోద

⁶⁰ ఇవ్ గొస్టింగ్ కేంచి వూర్ బక్తలిర్, “ఇద్ బోద వెలె కటిన్త మంత. ఇద్ బోదతున్ బోర్ వొపనిర్?” ఇంజెర్ గొల్తెర్. ⁶¹⁻⁶² తె యేసు అద్ కరి కీసి, “మిరట్ ఇద్ గొస్టి కేంచిన్ సోంగున్ వాతెకె, స్వర్గనోర్ మాయ్నల్, వాత జాగతెకె తాచ్చి సాన్వల్ సూడ్తెకె, ఉండె బహన్ ఆంతిటా?” ఇంజెర్ బక్తలిర్కున్ ఇత్తార్. ⁶³ “మేందోల్ జీవతున్ సియ పరా. సిరిప్ బగవంతన ఆత్మతున్ హిందలె, జీవతె మంతిట్. నన వెహ్చలిక్ జీవ సియ్యల్ ఆత్మతంగ్ గొస్టింగ్ ఆందుంగ్. ⁶⁴ బతి మీ రొపా కహితుర్ బరొస కియ్యర్ వూర్ మంతెర్” ఇంజెర్ వూర్క్కున్ వెహ్తార్. బారితెకె, తనకున్ బోర్ నమ్మోర్ అని బోర్ పసి కీంతోర్ ఇన్వల్ యేసున్ మొదొడలె టావ మత్త. ⁶⁵ అని ఉండె యేసు, “మీకున్ నా బాబొ సారి కీతెకె తప, నహ్గ

* 6:59 సునగోగ్ ఇత్తెకె యూదుల్క మీరె మాయ్నల్ రోన్.

6:45 యెసయ 54:13

బోరె వాయ పర్వీట్. అదెన్ సాటిన్ ఇవ్ గొస్టింగ్ మీ సమ్మిర్కున్ వెహ్లాన్” ఇంజెర్ ఇత్తార్. ⁶⁶ అస్కెడల్ యేసునుర్ వెలెటిర్ బక్తలిర్ పెజె మల్పి సొత్తెర్ అని వూర్ ఉండె బస్కెన్ వోన బక్తి పియ్యకి. ⁶⁷ అదెన్ సాటి, యేసు బార జన్స్ సస్యలిర్ బాజున్ మల్పి, “మిరట్ గిర్ దాకొమ్ ఇంతిట్ కి బతల్?” ఇంజెర్ పూసి కీతార్. ⁶⁸ అస్కె సీమొన్-పేతురు, “బోన్ ఇంజెర్ దాకొమ్ పర్బు? బస్కెట్ పిస్వల్ జీవ సియ్యలిక్ గొస్టింగ్ వెహ్లాని నిమెయ్ ఆంది. ⁶⁹ ‘బగవంతల్ రొహ్లాన్ వోర్ పవిత్ర వాలెని నిమెయ్ ఆంది ఇంజి బరొస ఇర్పి కరి కీతామ్” ఇంజెర్ వెహ్లాన్. ⁷⁰ తె యేసు, “మీ బార జన్సున్ ననయ్ నేమి కీతాన్ కి సెలె? బతి మిహ్లాట్ వారొనగ సయ్యన్ద మన్ మంత” ఇంజెర్ వెహ్లాన్. ⁷¹ సీమొన్వార్ మరి ఇస్కరియోత్ నాట్వార్ యూదల్, బార జన్స్ సస్యలిర్ గుట్ వారార్ ఆసి గిర్ దోక సియ్యల్ ఆతార్. అదెన్ సాటిన్ వోన్ బారెతె ఇద్ గొస్టి వెహ్లాన్.

యేసు అని వోనుర్ తముక్

7 ఇద్ ఆత పెజె, యూదుల్కునుర్ అదికారిర్ యేసున్ జక్లె సూడ్సెర్ మత్త కాడ్కి, యూదయ యేరియతగ వోర్ సొన్మకి. సిరిష్ గలిలయ యేరియతగన్ తిరిసెర్ మత్తార్. ² బతి అద్ గట్టుతె యూదుల్కున డేరన సడ్# కరుమ్ వాసెర్ మత్త. ³ తె యేసునుర్ తముక్, “నిమె ఇగెటల్ యూదయ సొన్. అస్కెన్ అగటుర్ నీ బక్తలిర్ నీవంగ్ మయ్యతంగ్ కామ్మి సూడంతెర్. ⁴ ఇగెన్ మత్తెకె నీకున్ డగుర్-పాన్ వాయె. నిమె కరలెనె ఇవ్ మయ్యతంగ్ కామ్మి కీతెకె, దునియతుర్కున్ తొహ” ఇంజెర్ తాదన్ వెహ్లాన్. ⁵ ఇత్తెకె, వోనుర్ తముక్ గిర్ యేసునగ బరొస ఇర్పకి.

⁶ తె యేసు, వూర్కున్ ఇత్తార్, “నా బారెతె వొడ్కి అరుస్వల్ వకత్ అజున్ వాయెయె. బతి మిరట్ బస్కె గిర్ అగ సొంద వచా. ⁷ దునియతుర్ మీకున్ మెచ్చక్ మంద పరుర్. బతి వూర్ కియ్యలిక్ కామ్మి కరబ్ మంతంగ్ ఇంజెర్ నన వెహ్లా కాడ్కి, నాకున్ వూర్ మెచుర్. ⁸ మిరట్ సడ్సున్ సాటి సొంటు. నావ వాయ్యల్ వకత్ నింద్య కాడ్కి, నన ఇంకె మీ సంగ వాయెన్” ఇంజెర్ వూర్కున్ వెహ్లాన్. ⁹ ఇహిన్ వెహ్లా, యేసు గలిలయతగన్ ఆగ్గొర్.

¹⁰ బతి వోనుర్ తముక్ సడ్సున్ సాటి సొత్త పెజె, యేసు గిర్ ఉజగిరితె ఆయ్య, మక్తితె అగ సొత్తార్. ¹¹ అద్ సడ్ జర్గెనెకె యూదుల్కునుర్ అదికారిర్, “వోర్ బగ మంతార్?” ఇంజెర్ వోన్ సాటి మహ్లాతెర్. ¹² తె అద్ మాందితల్ కహితుర్, “యేసు చొకొట్వోర్ మాయ్యల్ ఆందుర్” ఇంజెర్ అని, ఉండె కహితుర్, “సెలె-సెలె వోర్ పర్జతున్ పసి కియ్యల్ ఆందుర్” ఇంజెర్ కుస కుస చర్చ కీతెర్. ¹³ బతి యూదుల్కునుర్ అదికారిర వెరెతె, యేసున్ బారెతె బోరె ఉజగిరి వడ్కిమకి.

యేసు డేరన సడ్ జర్గెనెకె మందిర్తగ బోద కరుస్వల్

¹⁴ అద్ సడ్ మొదోల్ ఆసి అర్దొ దిహ్స్కొ ఆత పెజె, యేసు మందిర్తగ సొంజి, బోద కరుస్వల్ సురు కీతార్. ¹⁵ అద్ కేంచి వూర్, “అసల్ వేర్ బోరె గురునగ సిక్సాన్ యేత్మకి. బతి వేన్ ఇచార్ వెలె గియన్ బగటల్ వాత?” ఇంజెర్ వూర్ యూదుల్కు గుల్ ఆతెర్. ¹⁶ తె యేసు, “నన వెహ్లాలిక్ గొస్టింగ్ నావంగ్ ఆయెంగ్. బతి నాకున్ సారి కియ్యల్ బగవంతనంగ్ ఆందుంగ్. ¹⁷ మిహ్లాట్ బోరె ఆయి బగవంతన ఇవ తీర్ తాకన ఇందనురై, ఇవ్ గొస్టింగ్ నహ్లాట్ వాసెర్ మంతంగ్ కి సెలెకె, బగవంతనల్ వాసెర్ మంతంగ్ ఇన్వల్ కరి కీతార్. ¹⁸ బోరై సొంత గొస్టింగ్ కరుసంతారొ, వోర్ తన్వయ్ డగుర్-పాన్సున్ కోరంతార్. బతి బోరై తనకున్ సారి కియ్యనె డగుర్-పాన్ వాయన ఇంతారొ, వోర్ బరొసతార్ ఆందుర్. వోన్ కరబ్ బతయ్ సెలె. ¹⁹ మోసె దర్మత కానున్తున్ మీకున్ సీతార్. తెర్ బతి మిహ్లాట్ వారార్ గిర్ అవెకున్ పియ్య తాక్సెర్ సెల్వీట్. ఇదెన్ బద్లి నాకున్ జక్లె సూడ్సెర్ మంతిట్” ఇంజెర్ యేసు ఇత్తార్. ²⁰ అద్ కేంచి దుస్రాక్ నహ్లాన్ వాతుర్ వూర్, “ఎహ! నీకున్ బూర్ జక్లె సూడ్సెర్ మంతెర్? నిహ్ బూత్ సోఫె మాసి మంత కి బతల్?” ఇంజెర్ ఇత్తెర్. ²¹ తె యేసు, “నన ఆరమ్మ దిహ్సున్ నేటి, కీత మయ్యత కామున్ సూడ్కి, మిరట్ సమ్మిర్

వెలె గుల్ ఆతిట్. ²² మీ మర్కున్ తోల్ కత్రి* కియన ఇంజెర్ మోసెన కానున్తగ మంత. ఇద్ రివజ్ మోసె మొదోల్ కియ్యకి. బతి తొత్తుర్గటల్ వాత. తెర్ బతి ఆరమ్మ దివొసున్ నేటి గిర్, మిరట్ ఇద్ కార్య కీసెర్ మంతిట్. ²³ నా పొరా బారి సోంగున్ వాంతిట్? మిరట్ వొరార్ కాండిన్, ఆరమ్మ దివొసున్ నేటి తోల్ కత్రి కీతెకె, మోసెన కానున్తన్ బహ్కా మాతప్ ఆయొ ఇంతిట్. బతి అంటిత్క్ వొరార్ మాయ్నన్ నన చొకాట్ కీతెకె, నాకున్ బహ్కా మాతోర్ ఇంతిట్. ²⁴ పొరా దిస్వడున్ హిందల్, తస్వ కియ్మట్. బతి సోంచ్-విచార్ కీసి, బరొబర్ తస్వ కీమ్ప్” ఇంజెర్ యేసు వెహ్చార్.

యేసుయె కిరిస్తు కి బతల్?

²⁵ అస్కె యెరుసలెమ్మర్ కహి జన్క్, “వూర్ అదికారిర్ జక్లె, మహ్కావల్ వేరె ఆందుర్ సెలెయ్?” ఇన్వల్ మొదోల్ కీతెర్. ²⁶ “ఇమల సూడట్! వోర్ ఉజగిరి వడ్క్సెర్ మంతార్. తెర్ బతి, బోరె బతయ్ ఇంజెర్ సెలెర్. వేరె కరల్ కిరిస్తు ఇంజెర్ అదికారిర్ కరి కీతెరా బతలా? ²⁷ బతి కిరిస్తు వానెకె, వోర్ బగటల్ వాంతార్ ఇన్వల్, బోనె కరె మాయొ. వేరె బగటార్ ఇన్వల్ మాకున్ టావయె” ఇంజెర్ వడ్క్సెర్. ²⁸ అస్కె యేసు మందిర్తగ బోద కరుసెర్, “నన బోన ఆందున్ అని బగటల్ వాతోన్ ఇన్వల్ మాకున్ టావయె ఇంజెర్ సోంచ్ కీంతిట్. బతి నావ నన ఇగె వాయ్కె. నాకున్ సారి కియ్యల్ సతెవంతల్ ఆందుర్. వోర్ బోర్ ఆందురా మీకున్ టావ సెలె. ²⁹ బతి వోర్ నాకున్ టావ. వోర్ సాన్ ఇంజెర్ హుకుమ్ సీత కాడ్కినె, ఇగె వాతోన్” ఇంజెర్ జోర్తె వెహ్చార్. ³⁰ అద్ వకత్తె వూర్ అదికారిర్ వోన్ పియ్లె కోసిద్ కీతెర్. బతి వొరార్ గిర్ వోన్ పొరా కెయ్ వాట పర్కె. బారితెకె వోన వకత్ నిందెకె మత్త. ³¹ తెర్ బతి “కిరిస్తు వానెకె, వేన్ తెర్ అదిక్ మయ్యతంగ్ కామ్క్ కీంతారియ్?” ఇంజి, వెలెటిర్ పర్జ వోన్ పొరా బరొస ఇరైర్. ³² ఇవ్ కుస కుస ఇన్వలిక్ గొస్టింగ్ పరిసయ్యల్క్* కేంజైర్ అని వీర్ పరిసయ్యల్క్, డగుక్ కటొడలిర్ మీరె మాసి, యేసున్ పియ్లె మందిర్తగ కేప్పలిర్కున్ సారి కీతెర్. ³³ అస్కె యేసు, “నన ఉండె జరిసి వకత్ వేరి, మీ సంగ మందంతాన్. అద్ వకత్ నింత పెజె, నాకున్ సారి కియ్యనగ మల్లి దాంతాన్. ³⁴ మిరట్ నాకున్ మహ్కాకిట్ బతి, నన మీకున్ పుటాన్. నన సొంజి మన్వడగ మిరట్ వాయ పర్విట్” ఇంజెర్ వెహ్చార్. ³⁵ యూదుల్క్నుర్ అదికారిర్ తమ్మ తమ, “మరట్ మహ్కాతెకె గిర్ పుట్వక్నె వేర్ బగ సొన్మడ్ మందర్ బెహా? మోక దుస్రాక్ దేస్కెనగ పగ్గె మాసి మన్వలిర్ యూదుల్క్నగ సొంజి, బగవంతన్ బారెటె టావ సెలెర్ వూర్కున్* బగవంతన బోద వెహ్మడ్ మందర్ కి? ³⁶ ‘మిరట్ నాకున్ మహ్కాకిట్ బతి, నన మీకున్ పుటాన్. నన సొంజి మన్వడగ మిరట్ వాయ పర్విట్’ ఇన్వడ అర్తమ్ బతలెయొ?” ఇంజెర్ వడ్క్సెర్.

యేసు జీవ నిపుస్వల్ యేత వాగ్దాన్ సియ్యల్

³⁷ అద్ సడ్డ ఆక్రిత దివొస్ బెయ్ ముకె మందంత. తె అద్ దివొసున్ నేటి యేసు నిల్సి, “వట్క వస్తార్ వోర్, నహ్గ వాసి యేర్ ఉండన. ³⁸ నా పొరా బరొస ఇర్తొనగ, దర్మ-గ్రంతనగ వెహ్తాపినయ్, ‘వోన పెటిత్ రొపాడల్ జీవ నిపుస్వల్ యేర్ పొంగ్గోర్ మందంత” ఇంజెర్ వెహ్చార్. ³⁹ వోన్ బరొస ఇర్తుర్కున్ పుట్వల్ బగవంతన ఆత్మతున్ బారెటె, యేసు అద్ జీవ నిపుస్వల్ యేర్ పొంగ్గోర్ గొస్టి వెహ్చార్. యేసు ఉండె గిర్ సాసి-నేండ్లెకె మత్తార్. అదెన్ సాటి వూర్గ అద్ ఆత్మ వాయ్లెకె మత్త. ⁴⁰ ఇవ్ గొస్టింగ్ కేంజైర్ కహితుర్, “బవిసత్తె వాయ్లె పర్వక్తల్ కరలెన్ వేరె ఆందుర్” ఇంజెర్ ఇత్తెర్. ⁴¹ ఉండె కహితుర్, “వేర్ కిరిస్తు ఆందుర్” ఇంజెర్ ఇత్తెర్. తె ఉండె కహితుర్, “ఎహా! కిరిస్తు గలిలయతల్ బహన్ వాంతార్? ⁴² ‘కిరిస్తు దావిద్దు కాన్దాన్తల్ పుటంతార్ అని దావిద్ మత్త బెత్తెహమ్ చహర్తలె వాంతార్’ ఇంజెర్ దర్మ-గ్రంత వెహంతి కి?” ఇంజెర్ ఇత్తెర్. ⁴³ యేసున్ హిందల్, పర్జతున్ నడ్డుమ్ బేద్-బావ్ పుట్ట. ⁴⁴ తె కహితుర్ వోన్ పియ్యుమ్ ఇంజెర్ సూడైర్. బతి వొరార్ గిర్ వోన్ పొరా కెయ్ వాట పర్కె.

* 7:22 మొడ్డలిర్ పుట్టి ఆట్ రోజ్కెనె మోసెన కానున్తగ తోల్ కత్రి కియన ఇంజెర్ హుకుమ్ మంత. * 7:32 పరిసయ్యల్క్ యూద దర్మతెర్ పెదొల్క్ లోకుర్ ఆందిర్. బగవంతనంగ్ నేకింగ్ సమ్మిర్ పియ్యి తాకన ఇంజెర్ వెహ్చాదిర్ అని తమొ గెరి పియ్యి తాకిన్దిర్. బతి వూర్ తమకున్ మన్దె వాతంగ్ నేకింగ్ అని రీతి-రివజ్క్ వెలె తయర్ కీసి ఇవెన్ గిర్ పియ్యి తాకన ఇంజెర్ వెహ్చాదిర్. * 7:35 ఇగె గిరిక్కుర్ ఇంజెర్ మందంత. బతి యూదుల్క్న లెకతె గిరిక్కుర్ ఇత్తెకె దుస్రా సమ్మి జాతినుర్ ఇంజెర్ అర్తమ్.

యూదుల్కునుర్ అధికారిర్ యేసున్ పొరా బరొస ఇరై వొప్పకి

⁴⁵ మందిర్తగ కేప్పలిర్ రికమ్ కెయ్కెనె మల్పి వాత పెజె, “మిరట్ వోన్ బారి తర్మకి?” ఇంజెర్ డగుక్ కటొడలిర్ అని పరిసయుల్క్ పూసి కీతెర్. ⁴⁶ తె మందిర్తగ కేప్పలిర్, “వోర్ మాయ్నల్ వడ్కేతప్ ఇంకె వేరి బోరె బస్సెన్ వడ్కేమకి” ఇంజెర్ జవబ్ సీతెర్. ⁴⁷ తె పరిసయుల్క్, “వోర్ మీకున్ గిర్ పసి కీతొరియ్? ⁴⁸ మా అధికారిర్గటలె ఆయి, సెలెతె పరిసయుల్క్ నగటలె ఆయి, వొరొర్ తెర్ వోన్ పొరా బరొస ఇరైరియ్? సెలె బోరె ఇర్మకి. ⁴⁹ బతి దర్మత కానున్ టావ సెల్వక్నె, వీర్ పిసలిర్ లోకుర్ వోన్ బరొస ఇరైర్. తె వూర్క్కున్ బగవంతన సాపెన లాగంత” ఇంజెర్ మందిర్తగ కేప్పలిర్కున్ వెహ్తార్. ⁵⁰ ఇదెన్ మునె, యేసునగ సొంజి, వాతుర్గటల్ వొరొర్ నికొదేమ్ ఇన్వల్ వూర్ అధికారిర్ నడ్డుమ్ మత్తార్. ⁵¹ తె నికొదేమ్, “వోన గవ కేంజ్వుక్నె అని వోర్ బతల్ కీతొర్ ఇన్వల్ కరి కియ్వుక్నె, దర్మత కానున్తున్ పియ్పు, మరట్ తస్వ కియ పర్వట్ కి? తప్పక్ మరట్ కియ పర్వట్!” ఇంజెర్ వూర్క్కున్ వెహ్తార్. ⁵² తె వూర్, “యే పిస! నిమ్ గిర్ గలిలయతొని ఆంది కి బతల్? దర్మ-గ్రంతున్ చొకొట్ వాచి కీమ్. గలిలయతల్ బోరె పర్వక్తల్ వాయెర్ ఇంజి మందంత” ఇంజెర్ చేడి కీతెర్.

ఉంది వెయ్లె పీర్ కీసెర్ సాపై మాయ్నల్

⁵³ ★[అద్ ఆత పెజె వూర్ సమ్మిర్ బోన రోన్ వోర్ సొత్తెర్.

8 బతి యేసు ఒలివ మరక్కు గుటల్ పొరా సొత్తార్. ² దుస్రా నేటి బెయ్ సక్రెన్, వోర్ మల్పి మందిర్తగ వాతొర్. అస్కె వెలెటిర్ లోకుర్ వోన్ మీరె మాతెర్. తె యేసు, వూర్క్కున్ బోద కరుసన్ సాటి ఉడ్తోర్. ³ అస్కెనె, బోద వెహ్పలిర్ సాస్తిరిర్ అని పరిసయుల్క్ పీర్ కీనెకె సాపై మాత అద్ వెయ్లెన్ తత్తెర్. అని అద్ వెయ్లెన్ సమ్మిర్ నడ్డుమ్ నిపుసీసి, ⁴ “గురుజి! ఇద్ వెయ్లె పీర్ కీనెకె సాపై మాత. ⁵ ఈతల్ వెయ్లెన్ బండనె పాసి జకన ఇంజెర్ మోసెన కానున్తగ హుకుమ్ మంత. తె నిమె బతల్ ఇంతి?” ఇంజెర్ యేసున్ పూసి కీతెర్. ⁶ వోన్ పొరా పిరది కియ్లె, తప్పగ పియన ఇంజెర్ అద్ సవల్ యేసున్ పూసి కీతెర్. బతి యేసు బూడ్ వరిసి, బొమితగ లిహి కీసెర్ మత్తార్. ⁷ వూర్ తమ్మ జిద్ సుటి కియ్మకి. తె యేసు తల తప్పి వూర్క్కు సూడ్సెర్, “మిహ్గటల్ బస్సెన్ పాప్ కియ్మకి, వోర్ మొదొల్ ఇద్ వెయ్లెన్ పొరా బండ వాట వచా” ఇంజెర్ వెహ్తార్. ⁸ అని ఉండె బూడ్ వరిసి, బొమితగ లిహి కీసెర్ మత్తార్. ⁹ అద్ గొస్టి కేంచి తాన్ తత్తుర్ వూర్, మాత్రలిర్గటల్ మొదొల్ కీసి, సమ్మిర్ వొరొన్ పెజెయ్ వొరొర్ అగటల్ సొత్తెర్. తె సిరిప్ అద్ వెయ్లెయె యేసున్ మునె నిల్పి మత్త. ¹⁰ తె యేసు ఉండె ఉంది జోక తల తప్పి, “బాయి! నీకున్ తత్తుర్ వూర్ బేందిర్? నీకున్ బోరె సిక్కు వాట్మకియ్?” ఇంజెర్ పూసి కీతొర్. ¹¹ తె అద్ వెయ్లె, “వాట్మకి పర్పు!” ఇంజెర్ జవబ్ సీత. అస్కె యేసు, “నన గిర్ నీకున్ సిక్కు వాటొన్. ఇగటల్ సొన్ అని ఇంగెడల్ పాప్ కియ్మ” ఇంజెర్ వెహ్తార్.]

యేసుయె దునియత వేడ్చి ఆందుర్

¹² మర్ల యేసు, వూర్ పర్జతున్ సంగ, “నన దునియతుర్క్కున్ వేడ్చి ఆసి మంతొన్. నా పెజెయ్ తాక్వలిర్ సికటితగ తాకుర్. బతి వూర్క్కున్ జీవత సరి తొహ్లా వేడ్చి సీంతొన్” ఇంజెర్ వెహ్తార్. ¹³ తె పరిసయుల్క్, “నీవ నిమె గవ వెహ్చెర్ మంతి. అద్ గవ కరల్ ఇంజి వొప పరొమ్” ★ ఇంజెర్ ఇత్తెర్. ¹⁴ అస్కె యేసు, “నన వెహ్చల్ గవ కరల్ ఇంజి వొపయ్ లాగర్. బారితెకె నన బగటల్ వాతొనొ, బగ దాంతొనొ నాకున్ టావ. బతి అదెన్ బారెకె మీకున్ టావ సెలె. ¹⁵ సాదరన్ మాయ్నలిర్ మోడి మిరట్ బహ్రి దిస్తతున్ పియ్పు, తస్వ కీంతిట్. బతి నన అహన్ బోనె తస్వ కియెన్. ¹⁶ మోక తస్వ కీతెకె గిర్, నావ తస్వ కరలె ఆంత. బారితెకె తస్వ కీనెకె, నాకున్ సారి కియ్వుల్ బాబొ గిర్ నా సంగ మందంతొర్.

★ 7:53 తొలెతంగ్ కహితంగ్ గ్రీకు గ్రంత్కనగ ఇప్ వచన్క్ సెలెంగ్. ★ 8:13 మోసెన కానున్తున్ పియ్పు ఉంది గొస్టితున్ వొపన ఇత్తెకె ఇవిర్ సెలెకె మువిరంగ్ గవంగ్ పహ్లా.

¹⁷ ‘ఇవిర్ మాయ్పులిర గవ సతెమె’# ఇంజెర్ మీవ దర్మత కానున్తగన్ లిహి కీసి మంత. ¹⁸ నావ నన మొదొడొర్ గవదారన అని నాకున్ సారి కియ్యల్ బాబొ రెండవ గవదారల్ ఆందుర్” ఇంజెర్ వూర్క్కున్ వెహ్తార్. ¹⁹ అస్కె వూర్ కేంచి, “నీ బాబొ బగ మంతార్?” ఇంజెర్ పూసి కీతెర్. తె యేసు, “ననయ్ ఆయి, నా బాబొయ్ ఆయి, మీకున్ టావ సెలె. నాకున్ కరి కీందిట్తె, నా బాబొన్ గిర్ కరి కీందిట్” ఇంజెర్ వూర్క్కున్ వెహ్తార్. ²⁰ ఇవ్ గొస్టింగ్ మందిర్తున్ రొపా హుండిత జాగతున్ కరుమ్ నిల్పి వెహ్తార్. తెర్ బతి వోన్ బోరె పియ్యకి. బారితెకె, వోన వకత్ నిందెకె మత్త.

నన సొన్వడగ మిరట్ వాయ పర్విట్

²¹ అస్కె ఉండె ఉంది జోక యేసు, “నన దాంతాన్. మిరట్ నాకున్ మహ్మకిట్ బతి, నన మీకున్ పుటాన్. మిరట్ మీ పాప్స్ మాపి ఆయ్యక్నేన్ సాంతిట్. ఇదెన్ హిందల్ నన సొన్వడగ మిరట్ వాయ పర్విట్” ఇంజెర్ వూర్క్కున్ వెహ్తార్. ²² తె వూర్ యూదుల్క్, “వోర్ సొన్వడగ మాకున్ వాయ పర్విట్ ఇంతార్. మోక తన్వ తనయ్ సాంతారాయ్ బతలొ?” ఇంజెర్ వడ్క్తెర్. ²³ అస్కె యేసు, “మిరట్ ఇద్ దునియతుర్ ఆందిట్. అని మీవ సోంచ్ ఇద్ దునియతున్ బారెతెన్ మందంత. నన స్వర్గనొన ఆందున్. అని నావ సోంచ్-విచర్ అలగ్ మందంత. ²⁴ అదెన్ సాటిన్, మీవంగ్ పాప్స్ మాపి ఆయ్యక్నేన్ సాంతిట్ ఇంజెర్ వెహ్తాన్. నా బారెతె వెహ్తా గొస్టిత్ పారొ బరొస ఇర్వెకె, మీవంగ్ పాప్స్ మాపి ఆయ్యక్నేన్ సాంతిట్” ఇంజెర్ వెహ్తార్. ²⁵ తె వూర్, “అసల్ నిమె బోని ఆంది?” ఇంజెర్ పూసి కీతెర్. అస్కె యేసు, “నన మొదొడొల్ బోన ఆందున్ ఇంజెర్ వెహ్తార్ వాతొనొ, వోనయ్ ఆందున్. ²⁶ మీకున్ తన్వ కియ్యె, మీ బారెతె వెలె గొస్టింగ్ నహ్ మంతంగ్. బతి సిరిఫ్ నాకున్ సారి కీతొనల్ కేంజ్జంగ్ గొస్టిన్ దునియతుర్కున్ వెహ్తార్ మంతాన్. వోర్ సతెవంతల్ ఆత కాడ్కి, వోర్ కియ్యల్ తన్వ గిర్ సతెమె ఆంత” ఇంజెర్ వెహ్తార్. ²⁷ బతి, యేసు తన్వోర్ బాబొ బగవంతన్ బారెతె వెహ్తార్ ఇన్వల్ వూర్ అర్తమ్ కియ్యకి. ²⁸ తె యేసు, “స్వర్గనొర్ మాయ్పున్ బస్కెతె మొద్దగ టాంగి కీంతిటొ అస్కె, ననయ్ వోన ఆందున్ ఇన్వల్ కరి కీంతిట్. అచొరె ఆయ్య, నావ నన బతయ్ కియ్ పరొన్. బతి బాబొ బవై నాకున్ కరుసీతారొ, అవె గొస్టింగ్ మీకున్ వెహ్తాన్ ఇంజెర్ గిర్ మిరట్ కరి కీకిట్. ²⁹ నాకున్ సారి కియ్యల్, నా సంగ మంతార్. వోన్ ఆనంద్ సియ్యలిక్ కామ్మ బస్కెట్ నన కీత కాడ్కి, వోర్ నాకున్ వారొనె బస్కెన్ సుటి కియ్యకి” ఇంజెర్ వెహ్తార్. ³⁰ ఇవ్ గొస్టింగ్ కేంచి, వెలెటిర్ వోన్ బరొస ఇర్తెర్.

అబ్రాహామ్ న సంతాన్ అని సయ్యన్ ద సంతాన్

³¹ అదెన్ సాటి, యేసు తన్వ పారొ బరొస ఇర్తర్ యూదుల్కున్ సంగ, “నా గొస్టి పియ్య తాకెకె, కరలెనె నా సిస్యలిర్ ఆంతిట్. ³² అస్కె మిరట్ సతున్* కరి కీంతిట్. అద్ సతెమ్ మీకున్ మోక్లా సుటి కీంత” ఇంజెర్ వూర్క్కున్ వెహ్తార్. ³³ “మమొట్ అబ్రాహామ్ న కాన్ దాన్తర్ ఆందుమ్. ఇంకె వేరి మమొట్ బోన్గన్ దాసిపాన్ కియ్యకి. బతి మాకున్ మోక్లా సుటి కీంత ఇంజి బహాన్ వెహ్తా?” ఇంజెర్ యేసున్ పూసి కీతెర్. ³⁴ తె యేసు, “పాప్ కియ్యల్ హర్ వారొర్, పాపున్ దాసి ఆంతార్. ³⁵ దాసి-మాయ్పుల్ బస్కెట్ రోతుర్ సంగ మనార్. బతి మరి బస్కెట్ గిర్ రోతుర్ సంగనె మందంతార్. ³⁶ అదెన్ సాటి, బగవంతనొర్ మరి మీకున్ పాపుల్ మోక్లా సుటి కీన్రురై, మిరట్ రోతుర్ దాత్ కరలెనె మోక్లా ఆంతిట్. ³⁷ మిరట్ అబ్రాహామ్ న కాన్ దాన్తర్ ఆందిట్ ఇంజెర్ నాకున్ టావయె. తెర్ బతి, నాకున్ జక్లె మిరట్ సూడ్వేర్ మంతిట్. బారితెకె మీ రొపా నావ గొస్టితున్ జాగ సెలె. ³⁸ నా బాబొనగ సూడ్వె నన వెహ్తార్ మంతాన్. అహ్నా మిరట్ గిర్, మీ బాబొనల్ కేంజ్జంగ్ గొస్టిన్ పియ్య కీసెర్ మంతిట్. ఇద్ సతెమ్ ఆంద్” ఇంజెర్ వూర్క్కున్ వెహ్తార్. ³⁹ తె వూర్, “మా బాబొ అబ్రాహామ్ ఆందుర్” ఇంజెర్ వెహ్తార్. అస్కె యేసు, “మిరట్ అబ్రాహామ్ న కాన్ దాన్తర్ ఆతెకె, అబ్రాహామ్ కీతపె మిరట్ గిర్ కీందిట్. ⁴⁰ నన బగవంతనల్ కేంజ్జ సతున్ వెహ్తా కాడ్కి, మిరట్ నాకున్ జక్లె సూడ్వేర్ మంతిట్. బతి

* 8:32 సతెవంతన్ కరి కీంతిట్. వోర్ మీకున్ మోక్లా సుటి కీంతార్.

8:17 రెండవ ఉపదేశ 17:6

అబ్రాహామ్ అహాన్ కియ్యకి. ⁴¹ మిరట్ మీ బాబో కీతపె కీసెర్ మంతిట్” ఇంజెర్ వెహార్. తె వూర్, “మమెట్ పీర్ కీనెకె పుట్టుర్ ఆయెమ్. బగవంతల్ వొరొరె మా బాబో” ఇంజెర్ యేసున్ వెహార్. ⁴² అస్కె యేసు వూర్కున్, “బగవంతల్ మీ బాబో ఆతెకె, మిరట్ నాకున్ పెర్మతె సూడ్మిదిట్. నావ నన ఇగె వాయ్యకి. బగవంతలె నాకున్ రొహార్. ⁴³ నన వెహ్టంగ్ గొస్టిన్ మిరట్ వొప్ప కాడ్కినె, మీకున్ అర్తమ్ ఆసెర్ సెలెంగ్. ⁴⁴ మిరట్ సయ్యన్ద బాజ్జూర్ ఆందిట్. వోరె మీ బాబో ఆందుర్. మీ బాబోనంగ్ కరబ్ ఆసన్ పూరి కియ్యెనె మిరట్ సూడంతిట్. వోర్ మొదొడలె మాయ్మలిర్కున్ జక్వల్ ఆసి, సత్తె నిల్వల్ ఆయెర్. వోన్గ సతెమ్ ఇన్వల్ అసలె సెలె. వోర్ తన్వ బుది పియ్యనె పకట్ వడ్కంతార్. వోర్ పకట్ ఆత కాడ్కి, లబడున్ పయ్యెస్ కీసి నిల్తార్. ⁴⁵ అదెన్ సాటి, నన మీకున్ సతెమ్ వెహ్టె గిర్ బతి, నా పొరొ బరొస ఇర్విట్. ⁴⁶ నహ్ పాప్ మంత ఇంజెర్ వొరొర్ గిర్ నిరుపన్ కియ పర్విట్. నన సతెమె వెహ్చార్ మంతాన్. బతి బారి నా పొరొ బరొస ఇర్విట్? ⁴⁷ బగవంతనుర్ బగవంతనంగ్ గొస్టింగ్ కేంజంతెర్. బతి మిరట్ బగవంతనుర్ ఆయ్య కాడ్కినె, నన వెహ్టె కేంజిట్” ఇంజెర్ వెహార్.

యేసు తొత్తార్ అబ్రాహామున్ తెర్ డగుర్ ఆందుర్

⁴⁸ అస్కె వూర్ యూదుల్క్, “నిమె సమరయతొని* అని బూత్క్ సోప్రె మాసి మంతంగ్ ఇన్వల్ కరలె ఆంద్ సెలెయ్?” ఇంజెర్ యేసున్ రాంగైర్. ⁴⁹ తె యేసు, “నన బూత్క్ సోప్రె మాతొన ఆయెన్. నా బాబోన్ మాన్ సియ్యన ఆందున్. మిరట్ నాకున్ మాని కీసెర్ సెల్విట్. ⁵⁰ నావ పొరొల్ బడె మాయన ఇన్వల్ నాకున్ సెలె. బతి నాకున్ డగుర్-పాన్ వాయన ఇన్వల్ వొరొర్ మంతార్. వోరె నాయ్ తస్వ కియ్యల్ ఆందుర్” ఇంజెర్ వెహార్.

⁵¹ “బోరె ఆయి నా గొస్టి పియ్య తాకనురై, వోర్ బస్కెన్ మరన్తున్ సూడార్. ఇద్ గొస్టి సతెమ్ ఆంద్” ఇంజెర్ వూర్కున్ వెహార్. ⁵² అద్ కేంచి వూర్ యూదుల్క్, “నిహ్ కరలెన్ బూత్ సోప్రె మాసి మంత ఇన్వల్ ఇంకె మాకున్ అర్తమ్ ఆత. అబ్రాహామ్ అని తొత్తుర్ పర్వత్తిర్ గిర్ మార్తెర్. తెర్ బతి ‘బోరై నా గొస్టి పియ్య తాకంతొరొ, వోర్ బస్కెన్ మరన్తున్ సూడార్’ ఇంతి. ⁵³ మా బాబో అబ్రాహామ్ మార్తార్. నిమె వోన్ తెర్ డగుని ఆంది కి? అని వూర్ పర్వత్తిర్ గిర్ మార్తెర్. నీవ నిమె బోన ఆందున్ ఇంజెర్ సోంచ్ కీంతి?” ఇంజెర్ పూసి కీతెర్. ⁵⁴ తె యేసు, “నావ ననయ్ డగుర్-పాన్ సీతెకె, తాన్ విలువ మనొ. మా బగవంతల్ ఇంజెర్ బోన్తె మిరట్ కేయంతిటొ, వోరె నా బాబో ఆందుర్. వోర్ నాకున్ డగుర్-పాన్ సీసెర్ మంతార్. ⁵⁵ వోర్ మీకున్ టావ సెలొర్. బతి నాకున్ వోర్ టావయె. వోర్ నాకున్ టావ సెలొర్ ఇంద్కతె, నన గిర్ మీ దాతె లపంగిన ఆంతాన్. బతి వోర్ నాకున్ టావయె, వోన గొస్టి నన పియ్య తాకంతాన్. ⁵⁶ మీ బాబో అబ్రాహామ్ నావ వాయ్యల్ దివొసున్ సూడంతాన్ ఇంజెర్ ఆనందై మత్తార్. అద్ దివొసున్ సూడ్మి ఆనంద్ యేత్తార్” ఇంజెర్ ఇత్తార్. ⁵⁷ అస్కె వూర్ యూదుల్క్, “నీకున్ అజున్ పనస్ (50) సాల్క్ గిర్ సెలెంగ్. నిమె అబ్రాహామున్ సూడ్మి కి?” ఇంజెర్ యేసున్ ఇత్తెర్. ⁵⁸ తె యేసు, “అబ్రాహామ్ పుటన్ మొదొడలె నన మన్వన ఆందున్.* ఇద్ గొస్టి సతెమ్ ఆంద్” ఇంజెర్ వెహార్. ⁵⁹ అస్కె వూర్, వోన్ పొరొ బండంగ్ జరుసి వాట్లె బండంగ్ పియ్యెర్. బతి యేసు మక్సి మందిర్తల్ బహ్రి సొత్తార్.

యేసు పుటి-గుడ్డిన్ చొకాట్ కియ్యల్

9 అహాన్ యేసు సరియ్ సొంజెర్ మనెకె, వొరొర్ పుటి-గుడ్డిన్ సూడార్. ² అస్కె సిస్యలిర్, “గురుజి! వేర్ గుడ్డి ఆసి పుట్లె కారన్, వేర్ పాప్ కీతొర్ కి, సెలెకె వేనుర్ అవల్-బాబో కీతెర్?” ఇంజెర్ యేసున్ పూసి కీతెర్. ³ తె యేసు, “వేరె ఆయి, వేనుర్ అవల్-బాబోయ్ ఆయి, కీత పాపున్ హిందల్, వేర్ గుడ్డిన జల్మ ఆయ్యకి. బతి బగవంతన సక్తి వేన్

* 8:48 తొలె కహితుర్ యూదుల్క్, యూదుల్క్ ఆయుర్ వూర్ సంగ మర్మింగ్ ఆతెర్. వీర్ లోకుర్ యూదుల్క్నంగ్ అని దుస్రా జాతితెరంగ్ రీతి-రివజ్క్, పూజ-పతెరంగ్ కీసెర్ మందిర్. వూర్కున్ పుడ్తుర్ వూర్ సమరయ ఇన్వల్ యేరియతగ్ అలగ్ పిసెర్ మందిర్. కమి జాతితుర్ దాత్ సమరయతుర్కున్ యూదుల్క్ సూడ్మెర్ మందిర్. * 8:58 మన్వన ఆందున్ ఇంజెర్ బగవంతల్ వొరొరె వెహ పరంతార్. మోక దుస్రార్ బోరె అద్ గొస్టి వెహ్టెకె, యూదుల్క్న లెకతె బగవంతన్ రెహ్చి వడ్కెతప్ ఆంత.

హిందల్ దిసన ఇంజెరెన్ గుడ్డిన్ దాత్ పుట్టార్. ⁴ పోడ్డ్ సొనల్ వేరి, నాకున్ సారి కీతొనంగ్ కామ్మో మరట్ కియ లాగర్. రాత్ ఆయ్లె కరుమ్ వాసెర్ మంత. అస్కె బోరె కామ్ కియ పరార్. ⁵ బతి ఇద్ దునియతె మనల్ వేరి, పర్జతున్ వేడ్చిత దాత్ నన మంతాన్” ఇంజెర్ సిస్యలిర్కున్ వెహార్. ⁶ అహాన్ యేసు వెహ్చి, తోడితగ ఉస్కొత్. అద్ ఊచ్చె ఇమసి చిక్ల కీసి, గుడ్డినంగ్ కడ్కున్ పారా సోక్తార్. ⁷ అహాన్ సోక్సి యేసు, “నిమె సిలొయమ్ ఇన్వల్ కోనెర్తగ సొంజి నొర” ఇంజెర్ వోన్ వెహార్. సిలొయమ్ ఇత్తెకె, «రొహార్ వోర్» ఇంజెర్ అర్తమ్. తె వోర్ సొంజి నొర్చి, నదుర్ వాలె ఆసి వాతార్.

⁸ అద్ జర్గిత పెజె, ఆజు-బాజుతుర్ అని వోర్ బిచెమ్ తల్కెనెకె సూడ్తుర్, “వేర్ ఉచ్చికున్ బిచెమ్ తల్కెవలె ఆందుర్ కి?” ఇంజెర్ ఇత్తెర్. ⁹ “ఓహా! వేరె ఆందుర్” ఇంజెర్ కహితుర్ ఇత్తెర్ అని, “ఎహా! వోన్ మోడి మన్వల్ దుస్సార్ ఆందుర్” ఇంజెర్ ఉండె కహితుర్ ఇత్తెర్. బతి వోర్, “ననయ్ వోన ఆందున్!” ఇంజెర్ వెహ్చెరెన్ మత్తార్. ¹⁰ తె, “నీకున్ నదుర్ బహాన్ వాత?” ఇంజెర్ వూర్ పూసి కీతెర్. ¹¹ అస్కె వోర్, “యేసు ఇన్వల్ వారార్ మాయ్చల్ చిక్ల కీసి, నా కడ్కున్ పారా సోక్తార్ అని ‘సిలొయమ్ కోనెర్తగ సొంజి, నొర్చి వర’ ఇంజెర్ వెహ్చార్. అస్కె నన సొంజి నొర్తాన్. తె నాకున్ నదుర్ వాత” ఇంజెర్ వెహ్చార్. ¹² “వోర్ యేసు బగ మంతాన్?” ఇంజెర్ వోన్ పూసి కీతెర్. తె వోర్, “నాకున్ టావ సెలె” ఇంజెర్ వూర్కున్ వెహ్చార్.

అద్ చొకాట్ ఆతతున్ బారెతె పరిసయుల్క కరి కియ్చల్

¹³⁻¹⁴ ఆరమ్మ దివొసున్ నేటి, యేసు చిక్ల కీసి, వోనంగ్ కడ్కున్ నదుర్ వాయుస్త కాడ్కి, వూర్ పుటి-గుడ్డి మంజి చొకాట్ ఆతార్ వోన్ పరిసయుల్కనగ వోతెర్. ¹⁵ నదుర్ వాయ్చున్ బారెతె, పరిసయుల్క గిర్ వోన్ పూసి కీతెర్. తె వోర్, “నా కడ్కున్ పారా యేసు చిక్ల సోక్తార్. తె నన సొంజి నొర్తాన్. అస్కె నాకున్ నదుర్ వాత” ఇంజెర్ వూర్కున్ వెహ్చార్. ¹⁶ ఇద్ కేంచి కహితుర్ పరిసయుల్క, “వోర్ ఆరమ్మ దివొస్స నేకి పియ్చి తాక్వ కాడ్కి, బగవంతనల్ వాతార్ వోర్ ఆయెర్” ఇంజెర్ ఇత్తెర్. ఉండె కహితుర్, “వోర్ పాపెస్తల్ మత్తెకె, ఈతంగ్ మయ్మతంగ్ కామ్మో బహాన్ కియ పరంతార్?” ఇంజెర్ ఇత్తెర్. ఇహిన్ వూర్ పరిసయుల్కున్ నడ్డుమ్ బేద్-బావ్ పుడ్త. ¹⁷ అస్కె వూర్ ఉందుంది జోక నదుర్ వాతాన్ సంగ, “నీకున్ నదుర్ వాయుస్త కాడ్కి, వోన్ బారెతె నిమ్ బతల్ ఇంతి?” ఇంజెర్ పూసి కీతెర్. తె, “వోర్ పర్వత్తల్ ఆందుర్” ఇంజెర్ వెహ్చార్. ¹⁸⁻¹⁹ పుటి-గుడ్డి మంజి, నదుర్ వాత అద్ గొస్టితున్ నమ్మ కాడ్కి, వూర్ యూదుల్కనుర్ అదికారిర్, వోనుర్ అవల్-బాబొన్ కేయుస్తెర్. అని, “పుటి-గుడ్డి ఆసి పుట్టార్ వోర్ మరి, వేరె ఆందుర్ కి బతల్? వేరె మత్తెకె, వేర్ ఇంకె బహాన్ సూడ్చెర్ మంతార్?” ఇంజెర్ పూసి కీతెర్. ²⁰ తె వూర్ అవల్-బాబొ, “పుటి-గుడ్డి ఆసి పుట్టార్ వోర్ మరి, వేరె ఆందుర్ ఇంజెర్ మాకున్ టావ. ²¹ బతి ఇంకె వేన్ బహాన్ నదుర్ వాత అని వేన్ బోర్ చొకాట్ కీతార్ ఇన్వల్ మాకున్ టావ సెలె. వోర్ తన్వ తన వెహ పర్వల్ బెర్నెత్. ఇద్ గొస్టితున్ మిరటె వోన్ పూసి కీమ్మ” ఇంజెర్ వూర్ అదికారిర్కున్ వెహ్చార్. ²² వోనుర్ అవల్-బాబొ యూదుల్కనుర్ అదికారిర్కున్ వెరిసి, అహాన్ వెహ్చార్. బారెతెకె, వోర్ యేసుయె, కిరిస్తు ఆందుర్ ఇంజెర్ బోరె వొప్తెకె, వోన్ సమాజ్చల్* అలది వాటంతామ్ ఇంజెర్, అదెన్ మునెన్ వూర్ నిర్నయ్ యేచ్చి మత్తెర్. ²³ అదెన్ సాటిన్ అవల్-బాబొ, “వోర్ వెహ పర్వల్ బెర్నెత్. వోనె పూసి కీమ్మ” ఇంజెర్ వూర్కున్ వెహ్చార్.

²⁴ అదెన్ సాటి, వోర్ నదుర్ వాతాన్ ఉందుంది జోక కేయుసి, “కరల్ వెహ. ఇద్ కామ్మ డగుర్-పాన్ బగవంతనె వాయన. బారెతెకె, వోర్ మాయ్చల్ పాపెస్తల్ ఇంజి మాకున్ టావ” ఇంజెర్ వెహ్చార్. ²⁵ తె వోర్, “వోర్ పాపి ఆందురొ, ఆయెరొ నాకున్ టావ సెలె. బతి నాకున్ ఉందియ్ టావ. బతల్ ఇత్తెకె, ఇదెన్ మునె గుడ్డిన మత్తాన్ బతి, ఇంకె సూడ పర్సెర్ మంతాన్” ఇంజెర్ ఇత్తార్. ²⁶ తెర్ బతి వూర్, “వోర్ నీకున్ బతల్ కీతార్? నీకున్ నదుర్ బహాన్ వాత?” ఇంజెర్ ఉండె ఉంది జోక పూసి కీతెర్. ²⁷ తె అస్కె వోర్, “సూడట్! ఇదెన్ మునెన్ మీకున్ వెహ్చాన్. బతి మిరట్ కేంజ్చికి.

* 9:22 గిరిక్కుగ సునగోగ్ ఇంజెర్ మంత. ఇద్ సునగోగ్ ఇన్వల్ యూదుల్క మీరె మాయ్చల్ రోతగ యూదుల్కన సమాజ్చంగ్ సమ్మె కామ్మో జర్చుసీంతెర్.

ఉందుంది జోక బారి పూసి కీసెర్ మంతిట్? మిరట్ గిర్ వోనుర్ సిస్యలిర్ ఆకొమ్ ఇంతిట్ కి బతల్?” ఇంజెర్ ఇత్తోర్. ²⁸ అస్కె వూర్, “నిమెయ్ వోనార్ సిస్యని ఆంది. మమొట్ మోసెనుర్ సిస్యలిర్ ఆందుమ్” ఇంజెర్ వోన లజ వోతెర్. ²⁹ అని వూర్, “బగవంతల్ మోసెన్ సంగ వడ్కేతోర్ ఇన్వల్ మాకున్ టావయె. బతి వేర్ మాయ్నల్ బగటల్ వాతోర్ ఇన్వల్ మాకున్ టావ సెలె” ఇంజెర్ వెహ్తార్. ³⁰ తె వోర్ అద్ కేంచి, “ఇద్ గొస్టి వెలె చమత్కార్త ఆంద్. వోర్ బగటల్ వాతోర్ ఇన్వల్ మీకున్ టావ సెలె బతి, నావంగ్ కడ్కున్ మాత్రమ్ నదుర్ వాయుస్తార్. ³¹ బగవంతల్ పాపెస్తలిర వినంతి కేంజోర్. బతి బోరై బగవంతనోర్ బక్తల్ ఆసి, వోన ఇచ పియ్యి తాకంతోరొ, వోనయ్ వినంతి కేంజంతోర్ ఇంజెర్ మాకున్ టావ. ³² ఇద్ కలి గడె మాతగటల్తె ఇంకె వేరి, దుస్సార్ బోరె మాయ్నల్ పుటి-గుడ్డిన్ చొకాట్ కీతోర్ ఇన్వల్ మరట్ బస్కెన్ కేంజ్మకి. ³³ మోక వేర్ బగవంతనగటల్ వాయ్కె, ఈతంగ్ బవె కామ్మ కియ పర్ని మనోర్” ఇంజెర్ వూర్కున్ వెహ్తార్. ³⁴ అద్ కేంచి వూర్, “ఎహె! నిమె పాప్లగ పుట్టి, బెర్నోతొని ఆంది. మాకున్ బోద వెహ్లా వాతి కి?” ఇంజెర్ అగటల్ వోన్ బహి తెండ్ని పూడ్తెర్.

బావ్-బక్తిత గుడ్డి-పాన్

³⁵ వోన్ తెండ్ని పూడ్తెర్ ఇంజెర్ యేసు కేంచి, వోన్ మహ్మోసి పుటుసి, “నిమె స్వర్గనోర్ మాయ్నల్ పొరొ బరొస ఇర్నెర్ మంతి కి?” ఇంజెర్ పూసి కీతోర్. ³⁶ తె వోర్ మాయ్నల్, “వోన్ నన బరొస ఇర్నె, వోర్ బోర్ ఆందురెయ్? వెహ పర్బు” ఇంజెర్ యేసున్ పూసి కీతోర్. ³⁷ అస్కె యేసు, “నిమె ఇంకె వోన్ సూడ్సర్ మంతి. నీ సంగ వడ్కేవల్ వోరె ఆందుర్” ఇంజెర్ వెహ్తార్. ³⁸ అద్ కేంజ్ బరొబర్ వోర్, “పర్బు నన బరొస ఇర్నెర్ మంతోన్” ఇంజి, ముర్-టొంగ్రంగ్ కొట్టి గప్పె కాల్ కర్తార్. ³⁹ అస్కె యేసు, “గుడ్డిర్ సూడన అని నదుర్ వాలిర్ గుడ్డిర్ ఆయన. ఇద్ తీరై తస్వ జర్గన ఇంజెరెన్, ఇద్ దునియతె వాతోన్”# ఇంజి వెహ్తార్. ⁴⁰ తె వోన్ సంగ మంజి, అవ్ గొస్టింగ్ కేంజ్తర్ కహితుర్ పరిసయుల్క్, “మమొట్ గిర్ గుడ్డిర్ ఆందుమ్ ఇంతి కి బతల్?” ఇంజెర్ పూసి కీతోర్. ⁴¹ అస్కె యేసు, “మిరట్ గుడ్డిర్ ఆందిట్ తె, మిహ్లా పాప్ మన్యెకె సొందు. బతి మిరట్ సూడ్సర్ మంతోమ్ ఇంజెర్ ఇత్త కాడ్కినె, మీ రొపా పాప్ నిల్ని మంత” ఇంజెర్ వూర్కున్ వెహ్తార్.

యేసు చొకాట్నోర్ గొరెంగ్ గాయ్క ఆందుర్

10 తె యేసు, “గొరెన గావ్నతగ పాటక్సల్ నేంగ్వక్నె, దుస్సా బాజ్నల్ తెర్గసి వాయ్నల్, కలె అని లూటి కియ్నల్ ఆందుర్. ² బతి బోరై పాటక్సల్ నేంగంతోరొ వోరె గొరెంగ్ గాయ్క ఆందుర్. ³ గాయ్కన్ సాటి గావ్న కేప్వల్ పాటక్ తెరియంతోర్. గొరెంగ్ వోన లేంగ్ వొడ్కి కీంతంగ్. వోర్ తన్వంగ్ గొరెన్ పొరొల్ ముట్టి కేయ్నెర్ బహి వోంతోర్. ⁴ అహాన్ తన్వంగ్ గొరెన్ బహి వోనెకె, వోర్ గాయ్క బస్కెట్ గిర్ అవెన్ మునె తాకంతోర్. వోన లేంగ్ వొడ్కె మాత కాడ్కి, అవ్ గొరెంగ్ వోన్ పెజెయ్ దాంతంగ్. ⁵ బతి దుస్సాన లేంగ్ వొడ్కె మాయ్న కాడ్కి, బుజ్జె మాసి వోన్గటల్ పరర్ ఆంతంగ్. ఇద్ సతెమ్ ఆంద్” ఇంజెర్ వూర్కున్ వెహ్తార్.

⁶ యేసు ఇద్ నమున యేచ్చి వూర్కున్ వెహ్తార్. బతి బతన్ బారెతె వెహ్తార్ ఇన్వల్ వూర్కున్ అర్తమ్ ఆయ్మకి. ⁷ తె యేసు ఉందుంది జోక ఇహిన్ వెహ్వాల్ మొదోల్ కీతోర్. “ఇద్ గొస్టి సతెమ్ ఆంద్. గొరెంగ్ నేంగ్వల్ పాటకున్ దాత్నొన ఆందున్. ⁸ నాకున్ తెర్ మునె వాతుర్ సమ్మిరె కలిర్ అని లూటి కియ్నలిర్ ఆందిర్. వూర లేంగ్ అవ్ కరల్ గొరెంగ్ కేంచి తాక్మకి. ⁹ ననయ్ పాటకున్ దాత్నొన ఆందున్. నహ్గటల్ రొపా నేంగ్రంగ్ అవ్ బచె మాంతంగ్ అని రొపా-బహి వాసెర్ రంది సెల్వక్ మందంతంగ్. అవ్ గొరెన్ హిర్వల్ జాడి పుటంత. ¹⁰ కలె సిరిప్ కల్లెక్, జక్లెక్ అని నాసెడమ్ కియ్లెకె వాంతోర్. బతి నన పూన అని బర్బుర్ జిన్గితున్ గొరెన్ సియ్లె వాతోన్. ¹¹ నన చొకాట్నోర్ గొరెంగ్ గాయ్కన ఆందున్. చొకాట్నోర్ గాయ్క గొరెన్ సాటి, తన్వ పరన్ గిర్ సీంతోర్. ¹² బతి బూయ్తల్ గొరెనోర్

కరల్ గాయ్క ఆయెర్. అవ్ గొరెంగ్ తన్వంగ్ ఆయ్వా కాడ్కి, లాండిగల్ బదె వోన్ దిస్తెకె గిర్ పరన్ ఆంతార్. అస్కె అద్ లాండిగల్ అవెన్ పొరొ ముచ్చి అర్చి, బుజిడి కీంత. ¹³ బూయ్తల్ సిరిప్ బూతిత్ సాటి వాత కాడ్కి, గొరెన చొకాట్-వాయుట్ పటి కియ్వాకెనె పరన్ ఆంతార్. ¹⁴⁻¹⁵ బతి నన చొకాట్నోర్ గాయ్కన ఆందున్. బాబొ నాకున్ అని నన బాబొన్ టావ. అహ్నో నాకున్ గొరెంగ్ అని నావంగ్ గొరెన్ నన టావ. నా గొరెన్ సాటి నావ పరన్ సీంతాన్. ¹⁶ ఇద్ గావ్తనతంగ్ ఆయ్వా, ఉండె దుస్రాక్ గొరెంగ్ గిర్ నాకున్ మంతంగ్. అవెన్ గిర్ నన పియ్చి వాయ లాగర్. అవ్ నా లేంగ్ కేంజంతంగ్. అస్కె ఇవ్ అని అవ్ ఉందియ్ మంద ఆంతంగ్. అవ్ సమ్మిన్ వొరొరె గాయ్క మందంతార్. ¹⁷ నన సాసి-నేండె, నావ పరన్ సీసెర్ మంతాన్. ఇదెన్ హిందలె, బాబొ నాకున్ వెలె లాడ్ కీసెర్ మంతార్. ¹⁸ నావ పరన్ బోరె యేత పరుర్. నావ ననయ్ పరన్ సీసెర్ మంతాన్. బగవంతల్ నాకున్ హుకుమ్ సీత కాడ్కి, అద్ పరన్తున్ సియ్లె అని ఉందుంది జోక తాన్ యేతె గిర్ నాకున్ అదికార్ మంత” ఇంజెర్ వెహ్చార్.

¹⁹ ఇవ్ గొస్టిన్ హిందల్, యూదుల్కున్ నడ్డుమ్ ఉందుంది జోక బేద్-బావ్ పుడ్త. ²⁰ వూర్గటల్ వెలెటిర్, “వేన్ బూత్ సోఫె మాత కాడ్కి, వేనంగ్ పిసంగ్ అదిక్ ఆతంగ్. వేన గొస్టి బారి కేంజంతిట్?” ఇంజెర్ ఇత్తెర్. ²¹ బతి ఉండె కహితుర్, “ఇవ్ గొస్టింగ్ బూత్ సోఫె మాతొనంగ్ ఆయెయింగ్. బూత్ గుడ్డిర్కున్ నదుర్ బహన్ సియ పరన్” ఇంజెర్ ఇత్తెర్.

బగవంతనోర్ మరిన ఇంజెర్ యేసు వెహ్చల్

²² అద్ పీని-గాలుమ్మ గట్కతె, యెరుసలెమ్మ మందిర్తగ నేంగ్వల్ హానుక్ ఇన్వల్ సడ్* జర్గసెర్ మత్త. ²³ తె ఉంది దియ యేసు మందిర్త ఆవ్రతగ మన్వల్ సొలొమొన్ మండొప్పగ తాక్సెర్ మత్తార్. ²⁴ అదె వకత్తె, యూదుల్కునర్ అదికారిర్ వోన్ గేర్-పాసి, “నిమె బచెజెల్ మాకున్ అనమిన కీసెర్ ఇరంతి? నిమె బచి కియ్వాల్ కిరిస్తుని* మత్తెకె, కుల కుల వెహ” ఇంజెర్ పూసి కీతెర్. ²⁵ తె యేసు, “ఇదెన్ మునె మీకున్ వెహ్చాన్ బతి మిరట్ బరోస ఇర్మకి. బాబొన పొరాడె నన కియ్వాక్ కామ్మ, నా బారెతె గవ వెహ్చార్ మంతంగ్. ²⁶ బతి మిరట్ నావంగ్ గొరెన మందతుర్ ఆయ్విట్. అదెన్ సాటినె నా పొరా బరోస ఇర్విట్. ²⁷ నావంగ్ గొరెంగ్ నా లేంగ్ కేంజంతంగ్. నావంగ్ బవ్ ఇన్వల్ నాకున్ టావయె. అవ్ నా పెజెయ్ వాంతంగ్. ²⁸ నన అవెకున్ బస్కెట్ పిస్వల్ జీవ సీంతాన్. అవ్ బస్కెన్ నాసెడమ్ ఆయెయింగ్. నా కెయ్దల్ బోరె అవెన్ ఊంద పరార్. ²⁹ బారితెకె, అవ్ గొరెన్ నా బాబొ నాకున్ సీతార్. బాబొ సమ్మిర్కున్ డగుర్ ఆత కాడ్కి, నా బాబొన కెయ్దల్ అవెన్ బోరె ఊంద పరార్. ³⁰ నన అని నా బాబొ ఉందియ్ ఆసి మంతామ్” ఇంజెర్ వూర్కున్ వెహ్చార్. ³¹ అస్కె వూర్ యూదుల్కు, వోన్ పాసి జక్లె బండంగ్ తహ్చార్. ³² తె యేసు, “నా బాబొనల్ బెయ్ వెలె మయ్మతంగ్ కామ్మ తొహ్చాన్. అవెనల్ బద్ కామున్ సాటి, నాకున్ బండనె పాకొమ్ ఇంతిట్” ఇంజెర్ వూర్కున్ పూసి కీతార్. ³³ తె వూర్ యూదుల్కు, “నిమె కీతంగ్ చొకాట్నోర్ కామ్మన్ హిందల్ ఆయె బతి, మాయ్నని ఆసి బగవంతన ఇంజెర్ వెహ్చా కాడ్కినె, బండనె పాయ్లెన్ ఆంతామ్” ఇంజెర్ వెహ్చార్.

³⁴⁻³⁶ అస్కె యేసు, “దర్మ-గ్రంత్ బస్కెట్కె లబడ్ వెహ్. తొలె మీవ దర్మ-గ్రంత్నగ, ‘మిరట్ బగవంతన్ దాత్తుర్ ఆందిట్’# ఇంజి, కహి నాయదికారిర్కున్ బగవంతల్ వెహ్చార్ ఇంజెర్ మంత. తె నాకున్ బాబొ నేమి కీసి, తన్వ కామ్ కియ్లె, ఇద్ దునియతగ సారి కీతార్ అస్కె, బగవంతనోర్ మరిన ఆందున్ ఇంజెర్ వెహ్చల్ బహన్ రెహ్చి వడ్కీతప్ ఆంత? ³⁷ నన నా బాబొనంగ్ కామ్మ కియ్వెకె, నా పొరా బరోస ఇర్మట్. ³⁸ బతి నన అవ్ కామ్మ కీకతె, నా గొస్టిత్ పొరా బరోస ఇర్వెకె గిర్, నన కియ్వాక్ కామ్మన్ పొరా తెర్ బరోస కీమ్మ. అహన్ కీకీట్తె, బాబొ నా రొపా

* 10:22 ఇద్ సడ్ బారి కీసెర్ మంతెర్ ఇత్తెకె, మొదొల్ దుస్రా దేస్కెనర్ పగ-దార్క్ ఇద్ మందిర్తున్ బహ్చి కీతెర్. బతి ఉందుంది జోక సుదుడ్ కీసి, కిరిస్తున జల్మత్తున్ మునె 165వ సాల్గ అద్ మందిర్తగ దర్మతంగ్ కామ్మ మొదొల్ కియ్వాడున్ హానుక్ ఇంజెర్ కేయంతెర్. * 10:24 బచి కియ్వాల్ కిరిస్తుని తమ బచె మాయ్లె, బగవంతల్ నేమి కీతార్ రాజల్ ఆయ్వాల్ కిరిస్తున్ సాటి యూదుల్కు సూడ్సెర్ మత్తెర్.

10:34-36 కీర్తన్సెన్ 82:6

అని నన బాబోన్ రొపా మంతోమ్ ఇంజెర్ కుల కుల కరె మాంత” ఇంజెర్ వెహ్తార్. ³⁹ తె వూర్ ఉండె ఉంది జోక, వోన్ పియన ఇంజెర్ కోసిద్ కీతెర్. బతి వూర కెయ్తల్ తపుసీసి అగటల్ సొత్తార్.

⁴⁰ యోర్దన్ లవిడున్ హంద బగ్గత యోహాన్ మొదోల్ బాప్తిస్మ సీతార్ అద్ జాగతగ సొంజి, అగనె మత్తార్. ⁴¹ అస్కె వోన్ వెలెటిర్ మాంది వాసి, “యోహాన్ బదె మయ్యత కామ్ కియ్యకి. బతి వేన్ బారెతె బతంగ్తె వోర్ యోహాన్ వెహ్తార్, అవ్ సమ్మె సతెమ్ ఆందుంగ్” ఇంజెర్ తమ్మ తమ వడ్కెతెర్. ⁴² అగ వెలెటిర్ యేసున్ పారా బరొస ఇర్తెర్.

యేసున్ లాడ్ కియ్యల్ బక్తన మరన్

11 బెతనియ ఇన్వల్ నాటె లాజర్ ఇన్వల్ వొరార్ బేమరితె అర్పి మత్తార్. వోనంగ్ తకక్ మార్తల్ అని మరియుల్ గిర్, అదె నాటె పిసెర్ మత్తంగ్. ² పర్బున్ సెంట్# సోక్సి, వోనంగ్ కాల్కున్ తన్వంగ్ కెల్కెనె ఉసుమ్మ అద్ మరియుల్ ఇదె ఆంద్. వేర్ లాజర్ తానారె తముర్ ఆందుర్. ³ అదెన్ సాటి అవ్ రండ్ తకక్, “పర్బు, నిమె లాడ్ కియ్యల్ బేమరితె అర్పి మంతోర్” ఇంజెర్ యేసునగ కబుర్ సారి కీతంగ్.

⁴ అద్ కబుర్ కేంచి యేసు, “ఇద్ బేమరి వోన్ జక్లె వాయ్యకి. బతి బగవంతనార్ మరిన్ మాన్ సీసి, బగవంతనె మయ్య తర్లె వాత” ఇంజెర్ వెహ్తార్.

⁵ యేసు మార్తన్, తాన సేలడున్ అని లాజర్తన్ లాడ్డె సూడ్పెదుర్. ⁶ వోర్ లాజర్ బేమరితె మత్త అద్ కబుర్ యేసున్ కేంజ వాత. తెర్ బతి, ఉండె రండ్ రోజ్క్ అగనె ఆగ్తార్. ⁷ అహాన్ ఆగ్ పెజె, “యూదయ యేరియతె మల్పి దాకట్” ఇంజెర్ సిస్యలిర్కున్ ఇత్తార్.

⁸ అస్కె సిస్యలిర్, “గురుజి! అగటుర్ యూదుల్క్ ఇంద్కెట్కె నీకున్ బండనె పాయ్లె సూడ్సెర్ మంతెర్. ఉండె అగ దాక ఇంతియ్?” ఇంజెర్ యేసున్ పూసి కీతెర్.

⁹ తె యేసు, “ఉంది దిహసున్ బార గంటంగ్ వేడ్చి మందంత.# ఇద్ దిహతె తాక్వల్ దునియత వేడ్చి సూడ్త కాడ్చి, కొద పాయెర్. ¹⁰ బతి రాత్తె తాక్వల్ వేడ్చి సెల్వ కాడ్చి, వోర్ కొద పాంతోర్” ఇంజెర్ వెహ్తార్.

¹¹ ఇహిన్ వెహ్త పెజె యేసు, “మావోర్ సోప్తల్ లాజర్ మీండ్చి మంతోర్. వోన్ జోప్పల్ తెహ్లా దాంతోన్” ఇంజెర్ ఇత్తార్.

¹² అస్కె సిస్యలిర్, “పర్బు, వోర్ మీండ్చి మత్తెకె, తప్పక్ తేచ్చి చొకాట్ ఆంతోర్!” ఇంజెర్ వెహ్తార్.

¹³ యేసు లాజర్త మరన్తున్ బారెతె వెహ్తార్ బతి, వూర్ సిస్యలిర్ సాదరన్ జోపున్ బారెతె వెహ్తార్ ఇంజి మత్తెర్. ¹⁴ తె యేసు, “లాజర్ మార్తార్” ఇంజి కుల కుల వెహ్చి, ¹⁵ “అగ నన మన్మకి అచార్ చొకాట్ ఆత. మీ సాటినె ఇహిన్ జర్గిత. మీవ బరొస బడె మాయన ఇన్వలె నావ ఇచ. ఇంగె మరట్ అగ దాకట్ దెట్!” ఇంజెర్ వూర్కున్ ఇత్తార్. ¹⁶ అస్కె యేమల్* ఇంజెర్ కేయ్యల్ తోమల్, “యేసున్ తోడా మరన్ ఆయ్లె, మరట్ గిర్ దాకట్ దెట్” ఇంజెర్ తన్వ బరొబర్ మన్యలిర్ సిస్యలిర్కున్ ఇత్తార్.

సాతుర్కున్ నేండుస్వల్ సక్తి యేసునగ మంత

^{17–19} బెతనియ నార్ యెరుసలెమ్మల్ కరుమ్ కరుమ్ రండ్ కోస్క్ లంగ్ మత్త. అగ తమున మరన్తున్ హిందల్, దుక్కుతె మన్యలిక్ మార్తన్ అని మరియున్ సుమ్మి కియ్లె, వెలెటిర్ యూదుల్క్ వాసి మత్తెర్. తె యేసు అద్ నాటున్ కరుమ్ యెవ్త పెజె, లాజర్త కూర్కున్ నారిత బండత వీచ్చు బుయరితగ ఇర్పి, నాలుంగ్ రోజ్క్ ఆత ఇంజెర్ కరి కీతార్. ²⁰ మార్తల్, యేసు వాసెర్ మంతోర్ ఇన్వల్ కేంచి బేటె మాయ్లె మునెత్క్ సొత్త. బతి మరియుల్ రోతగన్ రెహె మాత. ²¹ మార్తల్

* 11:16 యేమల్ సెలెకె దిదుమ ఇత్తెకె వోన్ బరొబర్ సెలెకె తమురెయ్ పుట్తార్.

11:2 యోహాన్ 12:1–11; మార్క్ 14:3–5 # 11:9 యోహాన్ 9:4,5

యేసున్ బేటె మాసి, “పర్బు! నిమె ఇగె మంది ఇత్తెకె, నావోర్ తముర్ సాసి మనార్. ²² బతి ఇంకె ఆతెకె గిర్ బతయ్ ఆయె. నిమె బగవంతన్ బతల్ తల్కకి అదెన్, నీకున్ సీంతోర్” ఇంజెర్ ఇత్త.

²³ అస్కె యేసు, “నీ తముర్ నేండంతోర్” ఇంజెర్ వెహ్తార్.

²⁴ తె మార్తల్, “హో పర్బు, తస్వ కియ్యల్ దివొస్సె వోర్ నేండంతోర్ ఇన్వల్ నాకున్ టావయె” ఇంజెర్ ఇత్త.

²⁵ అద్ కేంచి యేసు, “జీవత అని నేండుస్వన ననయె ఆందున్. నా పొరొ బరొస ఇర్వల్ సాతెకె గిర్ మర్ల పిసంతోర్.

²⁶ జీవతె మంజి నా పొరొ బరొస ఇర్వన్ బస్కెట్ మన్వల్ మరన్త సిక్స పుటొ. # ఇదెన్ బరొస కీంతి కి?” ఇంజెర్ పూసి కీతోర్.

²⁷ తె అద్, “హో పర్బు! నిమెయ్ బగవంతనోర్ మరి కిరిస్తుని ఆంది అని ఇద్ కలితె వాయ్లె మత్తొని గిర్ నిమెయ్ ఆంది. ఇదెన్ బరొస కీంతోన్” ఇంజెర్ వెహ్త.

²⁸⁻³⁰ యేసు అస్కె వేరి నాటె నేంగ్కకి. మార్తల్ బగతె బేటె మాతయె అగనె ఆగ్ని మత్తొర్. తె మార్తల్ రోన్ సొత్త అని మరియన్ కుసయె కేయ్యి, “గురుజి వాతోర్. నీకున్ కేయంతోర్” ఇంజెర్ సేలడున్ సంగ వెహ్త. ఇద్ గొస్తి కేంజ్ బరొబర్ మరియల్ తేచ్చి, యేసునగ సొత్త. ³¹ కహితుర్ యూదుల్క మరియన్ సుమ్మి కీసెర్ రోన్ మత్తెర్. అస్కె అద్ సప-సిప తేచ్చి సొన్వల్ సూడ్సి, వీచ్చగ సొంజి ఆడంత బతలొ ఇంజెర్, తాన్ పెజెయ్ సొత్తెర్. ³² మరియల్ యేసు మన్వల్ జాగతె సొంజి, వోనంగ్ కాల్కున్ పొరొ అర్చి, “పర్బు! నిమె ఇగె మంది ఇత్తెకె, నావోర్ తముర్ మార్చి మనార్” ఇంజెర్ ఇత్త.

³³ మరియల్ అని తాన్ సంగ వాతుర్ యూదుల్క సమ్మిర్ ఆడ్వల్ సూడ్సి, యేసున దిల్లె బెయ్ దుక్స లాగ్. ³⁴ అస్కె యేసు, “వోన కూర్దున్ బగ ఇర్చిట్?” ఇంజెర్ పూసి కీతోర్. తె వూర్, “పర్బు, వాసి సూడ” ఇంజెర్ వెహ్తార్.

³⁵ అద్ కేంచి, యేసు జొడ జొడ కాడెర్ తుహ్తార్. ³⁶ అద్ సూడ్సి వూర్ యూదుల్క, “లాజర్తున్ బచొర్ లాడ్ కీతోరొ సూడట్” ఇంజెర్ ఇత్తెర్.

³⁷ వూర్గటల్ కహి లోకుర్, “వేర్ యేసు, గుడ్డిర్కున్ నదుర్ వాయుస్తొర్. తె వేర్ లాజర్తున్ సొయ్యక్నె ఇర పర్చి మనార్ కి బతల్?” ఇంజెర్ ఇత్తెర్.

సాతోర్ వోర్ లాజర్తున్ యేసు నేండుస్వల్

³⁸ యేసున దిల్లె ఉందుంది జోక దుక్స లాగ్. తె వీచ్చగ సొత్తొర్. అద్ ఉంది నారిత బండత బుయిరి ఆంద్. ఉంది బండ తాన్గ అడ్డమ్ ఇర్చి మత్త. ³⁹ తె యేసు, “అద్ బండతున్ తెండట్!” ఇంజెర్ వూర్కున్ వెహ్తార్. అస్కె సాతోర్ వోన తక్కు మార్తల్, “పర్బు, ఇంకె వోన కూర్ కడిసి గాడి వాసెర్ మందర్. బారితెకె వోర్ మార్చి నాలుంగ్ రోజ్క్ ఆసెర్ మంతోర్” ఇంజెర్ వెహ్త.

⁴⁰ అస్కె యేసు, “నిమె బరొస ఇర్కితె, బగవంతన మయ్మతున్ సూడ్సి, ఇంజి నీకున్ వెహ్తొన్ కి?” ఇంజెర్ ఇత్తొర్.

⁴¹ తె వూర్ అద్ బండతున్ తెండెర్. అస్కె యేసు పొరొ సూడ్సెర్, “బాబ, నావ పార్తనతున్ కేంజ్ కాడ్సి, నీకున్ దనెవాద్. ⁴² నిమె బస్కెట్ నావ పార్తనంగ్ కేంజంతి ఇన్వల్ నాకున్ టావయె. బతి నిమెయె నాకున్ సారి కీతి ఇంజెర్ కరి కీసి, నా సిర్మట్సుర్ బరొస ఇరనిర్ ఇంజి వూర్ సాటిన్, ఇద్ గొస్తి వెహ్తొన్” ఇంజెర్ ఇత్తొర్.

⁴³ ఇహిన్ ఇత్త పెజె యేసు, “లాజర్, బహి వర!” ఇంజెర్ జోరై కేయ్తెర్.

⁴⁴ అస్కె తన్వ కూర్దున్ గూండి కీతంగ్ కప్పినెన్ లాజర్ బహి వాతోర్. వోన మొకొమ్ సేలతె గూండి కీసి మత్త. “గూండి కీతంగ్ కప్పిన్ ఊలి కీసి, వోన్ సొంద సీమ్మ” ఇంజెర్ యేసు వెహ్తార్.

యేసున్ జక్లే యూదుల్క్ పిలన్ వాట్సల్

⁴⁵ అద్ కామున్ సూడ్సి, మరియున్ సుమ్మి కియ్లె వాతుర్ యూదుల్క్ నగటల్ వెలెటిర్ యేసున్ పొరొ బరొస ఇర్రెర్.

⁴⁶ బతి వూర్గటల్ కహి జన్స్, పరిసయుల్క్ నగ సొంజి, యేసు కీత కామున్ బారెతె వెహ్తార్. ⁴⁷ అదెన్ సాటి డగుక్ కటొడలిర్ అని పరిసయుల్క్ పంచ్చర్కున్ కేయుసి, “మరట్ బతల్ కీకట్? వోర్ మాయ్నల్ వెలె మయ్యతంగ్ కామ్మ కీసెర్ మంతార్. ⁴⁸ మరట్ వోర్ కియ్యలికున్ ఇహినె సూడ్సెర్ మత్తెకె, వోరె రాజల్ ఇంజెర్ సమ్మిరె వోన్ పొరొ బరొస ఇరంతెర్. అస్కె రోమ రాజ్జుర్ అదికారిర్ వాసి, మా మందిర్తున్ నాసెడమ్ కీంతెర్ అని మా జాతితుర్కున్ ఇగెటల్ పూడి సీంతెర్” ఇంజెర్ వెహ్తార్. ⁴⁹⁻⁵⁰ అహన్ వెహ్త బరొబర్, “పిసలిర్నిట్! మా జాతితుర్ నాసెడమ్ ఆయ్యక్నె, వొరొర్ మాయ్నల్ పర్జత్ సాటి పరన్ సియ్యల్ చొకొట్ ఇంజి సమ్మె మాయ్నటియ్?” ఇంజెర్ అద్ గట్కతె పెర్సొర్ కటొడల్ ఆయ్యల్ కయపల్ ఇత్తొర్.

⁵¹⁻⁵² సిరిప్ యూదుల్క్ న లాబమున్ సాటినె ఆయె. బతి దునియ పూరొ పగ్గె మాసి మన్వలిర్ బగవంతనుర్ లోకుర్ సమ్మిర్కున్ మీరి కియ్లెనె, యేసు పరన్ సీంతార్ ఇంజెర్ మునె జర్గవల్ వచన్ వెహ్తార్. ఇద్ గొస్టి తన్వ తన ఆసి వెహ్మాకి. బతి అద్ సాల్ పెర్సొర్ కటొడల్ ఆసి మత్త కాడ్కినె, వెహ పర్తార్. ⁵³ అద్ నేటితల్ వోన్ జక్లే పిలన్ వాట్సల్ మొదొల్ కీతెర్. ⁵⁴ అదెన్ సాటి యేసు అస్కెడల్ యూదుల్క్ నగ ఉజగిరి వెలివత్సె, బోడి గుటన్ కరుమ్ మన్వల్ యెప్రాయిమ్ ఇన్వల్ చహర్తె సొంజి, అగ సిస్యలిర్ సంగ కహి రోజ్క్ మత్తార్.

⁵⁵⁻⁵⁷ అస్కె యూదుల్క్ న పస్క సడ్ కరుమ్ వాసెర్ మత్త. తె, “బోనె యేసున పత లాగ్తె వెహన. మమొట్ వోన్ పియంతామ్” ఇంజెర్ డగుక్ కటొడలిర్ అని పరిసయుల్క్ హుకుమ్ సీసి మత్తెర్. సడ్డున్ సాటి తమ్మ తమ సుదుడ్ కియ్లెన్, మునెనె వెలెటిర్ లోకుర్ ఆజు-బాజుతంగ్ నహ్మన్ యెరుసలెమ్ వాతెర్. వూర్ యేసున్ మహ్మసెర్ మందిర్తున్ రొపొ నిల్సి, “వోర్ ఇద్ సడ్డున్ వాంతార్ కి, వాయెర్? మిరట్ బతల్ ఇంతిట్?” ఇంజెర్ వొరొన్ వొరొర్ పూసి కీతెర్.

బెతనియతగ యేసున్ పొరొ సెంట్ వెడివల్

12 అదెన్ సాటి, సాసి-నేండ్తార్ లాజర్త నార్ బెతనియతగ పస్క సడ్డున్ సారుంగ్ రోజ్క్ మునెనె యేసు వాతొర్. ² అగ వోన్ సాటి జేవున్ తయర్ కీతెర్. మార్తల్ సర్బరెయ్ కీత. అని లాజర్ గిర్ జేవున్ తిన్వలిర్ బరొబర్ ఉత్తార్. ³ అస్కె మరియుల్ బెయ్ బారిత్ అని వెలె మహ్గన లగ్-బగ్ అర్దొ లీటర్ సెంట్* పియ్న వాత అని యేసునంగ్ కాల్కున్ పొరొ వెడిసి, తన్వంగ్ కెల్కెనె ఉసుమ్మ. అద్ సెంట్ గాడి పూరొ రోన్ గమ్మత. ⁴ అస్కె సిస్యలిర్ గటల్ వొరొర్ ఇత్తెకె, యేసున్ దోక సియ్యల్ ఇస్కరియోత్ నాట్వోర్ యూదల్, ⁵ “అరెరె! ఇద్ సెంటున్ మూండ్ నుహ్మ కూరతంగ్ బిలన్* వొమ్మి, గరిబున్ బారి సియ్యకి?” ఇంజెర్ తాన్ ఇత్తార్. ⁶ వోర్ గరిబున్ మదత్ కియన ఇన్వల్ కాడ్జితె అహన్ ఇన్మకి. బతి వోన్ కలె బుదితున్ హిందలె అని కొతన తెయ్ల వోన్గ్ మన్వల్ కీనెకె, అగటంగ్ కొతంగ్ కల్సెర్ మత్త కాడ్కినె అహన్ ఇత్తార్. ⁷ తె యేసు, “అద్ నావ మేందొడున్ మాతి కియ్యల్ దివాసున్ సాటి సెంటున్ వొజి కీసి ఇర్సి మత్త. ⁸ గరిబ్ లోకుర్ బస్కెట్ మీ నడ్డుమ్ మందంతెర్. బతి నన బస్కెట్ మేందొడ రూప్న మీ నడ్డుమ్ మనొన్” ఇంజెర్ వెహ్తార్.

⁹ అదె వకత్తె, యేసు అగ మంతార్ ఇంజెర్ కరి కీసి, బెయ్ వెలెటిర్ యూదుల్క్, యేసునె ఆయ్య, యేసు నేండుస్తార్ వోర్ లాజర్తున్ గిర్ సూడ్లె వాతెర్. ¹⁰⁻¹¹ లాజర్తున్ హిందల్, యూదుల్క్ నగటల్ వెలెటిర్ లోకుర్ యేసున్ పొరొ బరొస ఇర్రెర్. అదెన్ సాటి, డగుక్ కటొడలిర్ లాజర్తున్ గిర్ జవ్నన ఇంజెర్ పిలన్ వాడ్తెర్.

* 12:3 అచ్చ జటామాంసి ఇన్వల్ మరత నియ్.

* 12:5 ఉంది బిలత విలువ ఉంది దియత బూతిత్ అచొర్ మత్త.

యేసు జెయ్ జెయ్ కార్ యేచ్చెర్ యెరుసలెమ్ నేంగ్గల్

12-13 సడ్డున్ సాటి వాత, ఉంది డగుర్ గుబ్బతుర్, యేసు యెరుసలెమ్ వాంతోర్ ఇన్వల్ కేంచి, సీంది మరక్కంగ్ కాందంగ్ పియ్యి వోన్ మునెత్క్ సాత్తెర్. అహన్ సాంజి, “జెయ్ జెయ్ కార్! పర్బున అదికార్డె వాయ్యల్ ఇజయేల్ పర్బుతోర్ రాజన్ బగవంతల్ ఆసిర్వాద్ సియిర్” ఇంజెర్ కిలితెర్. 14-15 “యెరుసలెమ్మూర్* లోకుర్నిట్ వెరిమట్! ఇమల మీ రాజల్ గాదిత్ పారొ ఉచ్చి వాసెర్ మంతోర్” ఇంజెర్ దర్మ-గ్రంతనగ లిహి కీసి మత్త తీర్, యేసు ఉంది గాదిత్* పారొ ఉచ్చి వాసెర్ మత్తూర్. 16 ఇవ్ గట్టుంగ్ జర్నెకె సిస్యలిర్కున్ సమ్మె మాయ్కె. బతి యేసు మయ్యతె నేండ్సి స్వర్గ్నగ సాత్త పెజె, ఇవ్ గట్టున్ బారెతె దర్మ-గ్రంతనగ మత్త తీర్ సమ్మె జర్గ్తంగ్ ఇంజెర్ సమ్మె మాతెర్. 17 యేసు లాజర్తున్ కూర్దల్ నేండుస్సెకె, వోన్ సంగ మత్తుర్ లోకుర్ ఇద్ గవతున్ పచర్ కీతెర్. 18 యేసు ఇద్ మయ్యత కామ్ కీతోర్ ఇంజెర్ లోకుర్ కేంజ్ కాడ్కినె, వోన్ బేటె మాయ్లె మునెత్క్ సాత్తెర్. 19 అదెన్ సాటినె పరిసయ్యల్క్, “నూడట్! మరట్ వాడ్డంగ్ పిలస్క్ బతయ్ కామి సియ్యకి. దునియతుర్ సమ్మిర్ వోన్ పెజెయ్ సాంజెర్ మంతెర్” ఇంజెర్ తమ్మ తమ వడ్క్తెర్.

యేసు తన్వ మరన్తున్ బారెతె వెహ్యల్

20 అద్ సడ్డున్ రొపా పార్తన-వింతి కియ్లె, వాతుర్గట్ కహితుర్ యూదుల్క్ ఆయ్యర్ పూర్* గిర్ మత్తెర్. 21 పూర్ గలిలయ యేరియత బెత్సయిద నాట్నోర్ పిలిపున్ బేటె మాసి, “సాబ్! మమెట్ యేసున్ బేటె మాయ్లె వాతోమ్” ఇంజెర్ వోన్ వెహ్యర్. 22 ఇద్ గొస్తితున్ పిలిప్ సాంజి, ఆంద్రెయన్ వెహ్యార్. పూర్ ఇవిర్ ఆసి అద్ గొస్తి యేసునగ సాంజి వెహ్యార్. 23 అద్ కేంచి యేసు, “స్వర్గ్నార్ మాయ్నన్ మయ్య వాయ్యల్ వకత్ ఇంకె కరుమ్ వాత. 24-26 గొహ్కాన దానతున్ బొమితగ ఉర్నెకె ఉందియ్ మందంత. అద్ దాన ఉర్నెకె సాతపినయ్ దిసంత. బతి బొమితల్ అద్ మొలొక ఆసి పిరంత అని బెర్సి, గొల్కమెన్ దానంగ్ సీంత. అదె తీర్దె నావ పరన్ సీతెకెన్, వెలేటిర్కున్ పూన జిన్గని పుటంత. అహ్మె మిహ్గట్ బోరె ఆయి, తన్వ జీవతున్ బచి కీక ఇన్వల్, తాన్ సుటి కియ లాగర్. బతి బోరె ఆయి ఇద్ కలితంగ్ ఆసన్ కాత్రి కియ్యకెనె మన్వల్, బస్కెట్ పిస్లె తన్వ జీవతున్ బచి కియ పరంతోర్. నావ సేవ కీక ఇన్వల్ నా సరి-మారగ్నె తాకన. అస్కెనె నన బగ మందంతోనొ, అగ నా సేవ కియ్యల్ గిర్ మందంతోర్. నా సేవ కియ్యన్ నా బాబొ మాని కీంతోర్. ఇద్ సతెమ్ ఆంద్” ఇంజెర్ సిస్యలిర్కున్ వెహ్యార్.

27 “ఇంకె నావ దిల్ పూరొ తకపిక ఆసెర్ మంత. బతల్ ఇంజెర్ వెహ్క? నా బాబ! ఇద్ గండమ్ నా పారొ వాయ్యకెనె నాకున్ బచి కీమ్. తెర్ బతి, ఇద్ గండమున్ సోసి కియ్లెనె నన వాతోన్. 28 బాబగొ! నీవ పారొడునె మాని కియ్యస” ఇంజెర్ వెహ్యార్. అస్కె పారొడల్,* “ఇదెన్ మునె డగుర్-పాన్ వాయుస్తాన్. ఉండె గిర్ డగుర్-పాన్ వాయుసంతోన్” ఇంజెర్ ఉంది లేంగ్ కేంజ్ వాత. 29 తె అద్ కేంచి అగ నిల్పి మన్వలిర్ కహితుర్, “గర్జిత” ఇంజెర్ ఇత్తెర్. ఉండె కహితుర్, “బగవంతనార్ వారొర్ దూతల్ వోన్ సంగ వడ్క్తార్” ఇంజెర్ ఇత్తెర్. 30 అదెన్ సాటి యేసు, “ఇద్ లేంగ్ నాకున్ మదత్ కియ్లె వాయ్యకి. మీకున్ మదత్ కియ్లెనె వాత. 31 ఇద్ దునియతుర్కున్ తస్వ కియ్యల్ వకత్ వాత. ఇద్ దునియతున్ ఆగుటి కీసి, మన్వల్ అదికారిన్ తెండ్సి పూడ్వల్ వకత్ వాత. 32 బస్కెతె నాకున్ బొమితల్ పారొ తహంతెరొ, అస్కె నా బాజున్ సమ్మిర్కున్ ఊమంతోన్” ఇంజెర్ వెహ్యార్. 33 తన్వ మరన్ బహన్ జర్గ్వల్ మంతయె అదెన్ బారెతె ఇద్ గొస్తి వెహ్యార్.

34 తె పర్బుత గుబ్బ, “కిరిస్తు బస్కెట్ జీవతె మందంతోర్” ఇంజి, దర్మ-గ్రంతనల్ కేంజ్మ. బతి నిమె స్వర్గ్నార్ మాయ్నన్ బొమితల్ పారొ తహ్చి బహన్ జకంతెర్ ఇంతి? వేర్ స్వర్గ్నార్ మాయ్నల్ బోర్ ఆందుర్?” ఇంజెర్ యేసున్

* 12:12-13 జెయ్ జెయ్ కార్! గ్రీకు బాసతగ హొసన్న ఇంజెర్ మంత. ఇదెన్ అర్తమ్, “ఇంకె బచి కీమ్!” * 12:12-13 అదికార్డె సెలెతె పారొడె ఇంజెర్ మందంత. * 12:14-15 సియోస్తూర్ ఇంజెర్ గిర్ కేయంతెర్. * 12:14-15 గ్రీకు బాసతె గాది పిలత్ పారొ ఇంజెర్ మందంత. * 12:20 యూదుల్క్ ఆయ్యర్ పూర్ ఇత్తెకె గ్రీకు దేస్సుర్ ఇంజెర్ మందంత. * 12:28 స్వర్గ్నల్ సెలెకె హాబడల్ ఇంజెర్ అర్తమ్.

పూసి కీతెర్. ³⁵ అస్కె యేసు, “ఉండె జరసి కాలమ్ వేరిన్ మీ నడ్డుమ్ వేడ్చి మందంత. సికటి పగ్గె మాయ్యక్ మునెనె, వేడ్చితగ తాకట్. అస్కె మిరట్ కొద పాయిప్ట్. సికటితె తాక్వల్ తన బగ దాంతోరా టావ సెలె. ³⁶ మిరట్ ఇద్ వేడ్చిత సంతాన్ ఆయ్లె, అద్ వేడ్చి మనెకెన్ మిరట్ తాన్ బరొస ఇరట్” ఇంజెర్ యేసు వూర్కున్ వెహార్. అహన్ వెహ్చి, వూర్కున్ దిస్వక్నె లంగ్ సొడితోర్.

వెలెటిర్ యేసున్ పొరా బరొస ఇర్మకి

³⁷ యేసు వూర్ మునె ఇచొంగ్ వెలె మయ్యతంగ్ కామ్మక్ కీతోర్ తెర్ బతి, వోన్ పొరా బరొస ఇర్మకి.

³⁸ “బగవంత! మమెట్ వెహ్త కబుడగ బోరె బరొస ఇర్మకి.

బగవంత! నీవ సక్తితున్ బోరె వొడ్చి కియ్యక్”#

ఇంజెర్ యెసయ పర్వక్తల్ లిహి కీత బర్పుర్ ఆయన్ సాటినె ఇహిన్ జర్త. ³⁹ వూర్ బరొస ఇర పర్మకి బారితెకె, యెసయ పర్వక్తల్ ఉండె ఉంది జాగ ఇహిన్ లిహి కీతోర్:

⁴⁰ “వూర నదుర్ బంద్ కీత కాడ్చి,

వూర్ సూడ పర్నెర్ సెలెర్.

వూర మన్దున్ బంద్ కీత కాడ్చి,

వూర్కున్ అర్తమ్ ఆసెర్ సెలె.

అహన్ కియ్యక్ ఇత్తెకె, వూర్ నా బాజున్ తిరిన్దిర్.

నన వూర్కున్ చొకొట్ కీందున్”#

ఇంజెర్ మంత. ⁴¹ యెసయ పర్వక్తల్ బవినత్తె వాయ్పల్ యేసున మయ్యతున్ సూడ్త కాడ్చినె, వోన్ బారెతె ఇవ్ గొస్టింగ్ వెహార్.

⁴² తెర్ బతి యేసున్ పొరా బరొస ఇర్మర్గటల్ వెలెటిర్ అదికారిర్ గిర్ మత్తెర్. బతి పరిసయుల్క్ తమకున్ సమాజ్చల్ అలది వాటనిర్ ఇంజెర్ వెరిసి బోరె ఉజగిరి వొప్పక్. ⁴³ వూర్ బగవంతల్ సియ్యల్ డగుర్-పాన్దున్ తెర్ అదిక్ మాయ్చలిర్ సియ్యల్ డగుర్-పాన్దున్ లాడ్ కీతెర్.

యేసునంగ్ గొస్టింగ్ పర్జతున్ తస్వ కియ్యల్

⁴⁴ అస్కె యేసు జోరై, “నా పొరా బరొస ఇర్వల్ సిరిప్ నహ్నె ఆయె బతి నాకున్ సారి కీతోనగ గిర్ బరొస ఇర్నెర్ మంతార్. ⁴⁵ నాకున్ సూడ్వల్ నాకున్ సారి కీతోనె సూడ్నెర్ మంతార్. ⁴⁶ నహ్న బరొస ఇర్వల్ హర్ వొరార్ సికటితగ నిల్చి మన్వక్నె, ఇద్ దునియతగ వేడ్చిత్ మోడి నన వాతోన్. ⁴⁷ బోరె ఆయి నావంగ్ గొస్టింగ్ కేంచి, అవెన్ పియ్యి తాక్వెకె, నన వోన్ తస్వ కియ్యెన్. నన ఇద్ దునియతుర్కున్ తస్వ కియ్యె వాయ్మకి. బతి బచి కియ్యెనె వాతోన్. ⁴⁸ నాకున్ అని నావంగ్ గొస్టిన్ వొపార్ వోన్, తస్వ కియ్యల్ దుస్రా ఉంది మంత. నన వెహ్త గొస్టియె తస్వ కియ్యల్ దివొన్న వోన తస్వ కీంత. ⁴⁹ బారితెకె, నా ఇచతె నన వడ్కెమకి బతి, నన బతల్ వడ్కెన ఇన్వడున్ బారెతె, నాకున్ సారి కియ్యల్ బాబొయె అహన్ హుకుమ్ సీతోర్. ⁵⁰ అని అద్ హుకుమ్ బస్కెట్ పిస్వల్ జీవతెకె తాకుసీంత ఇంజెర్ నాకున్ టావ మత్త కాడ్చి, నన వెహ్చలిక్ సమ్మె గిర్ బాబొ నా సంగ వెహ్త తీరె మీకున్ వెహ్చార్ మంతాన్” ఇంజెర్ ఇత్తోర్.

యేసు సిస్యలిరంగ్ కార్క్ నొర్వల్

13 యేసు పస్క సడ్డున్ తెర్ మునెనె ఇద్ దునియతల్ మల్చి బాబొనగ సొన్వల్ వకత్ కరుమ్ వాత ఇంజెర్ కరి కీతోర్. దునియతగ మన్వలిర్ తన్వర్కున్ వెలె లాడ్ కీతోర్. అద్ లాడ్డున్ ఆక్రి వేరి వూర్కున్ బర్పుర్ తొహ్తార్.

² బతి యేసున్ దోక సియన ఇన్వోల్ సోంచ్, సీమొన్తో మరి ఇస్కరియోత్ నాట్యోర్ యూదన దిలై జేవున్ కియ్యడున్ తెర్ మునెతలె సయ్యన్ ఇర్పి మత్తోర్. ³ తన్వ కెయ్యె సమ్మె అదికార్ బాబో సీతోర్ ఇన్వోల్, తన బగవంతనల్ వాతోర్ అని బగవంతనగ మల్పి దాంతోర్ ఇన్వోలిక్ సమ్మె గిర్ యేసున్ టావ. ⁴ అహాన్ టావ మత్త కాడ్కి, వూర్గటల్ తేచ్చి తన్వ సాలువతున్ బగ్గ ఇర్పి, తన్వ నడిదున్ ఉంది సేలతె దొహ్తార్. ⁵ దొహ్తా పెజె, ఉంది పరత్తుగ సిస్యలిరంగ్ కాల్కున్ యేతె నొర్రెర్, నడితున్ దొహ్తా సేలతె వూరంగ్ కాల్కున్ ఉసుమ్మల్ మొదోల్ కీతోర్. ⁶ అహాన్ కీసెర్ యేసు సీమొన్-పేతుర్తగ వాతోర్. అస్కె వోర్, “పర్బు నావంగ్ కాల్క్ నొరై ఆంతి కి?” ఇంజెర్ పూసి కీతోర్. ⁷ తె యేసు, “నన కియ్యల్ ఇంకె నీకున్ అర్తమ్ ఆయె, బతి మునె వాయ్యల్ గట్కతె కరి కీంతి” ఇంజెర్ వెహ్తార్. ⁸ అస్కె పేతురు, “వటిన్ పర్బు! నిమె నావంగ్ కాల్క్ బస్కెన్ నొర్వ” ఇంజెర్ ఇత్తోర్. తె యేసు, “నన నీకున్ నొర బీగర్ నా సంగ నీకున్ ఈస సెలె” ఇంజెర్ పేతుర్తున్ వెహ్తార్. ⁹ తె సీమొన్-పేతురు, “పర్బు! సిరిప్ నా కాల్కె ఆయ్య, నా కెయ్యె అని నా తల గిర్ నొర” ఇంజెర్ ఇత్తోర్. ¹⁰ అస్కె యేసు, “యేర్ తుంగ్తోర్ వోర్ సిరిప్ కాల్క్ నొరై ఆయర్. దుస్రా బతయ్ నొర లాగొ. వోర్ సుదుడె మంతోర్. మిరట్ గిర్ సుదుడె మంతిట్ బతి, మిహ్గటల్ సమ్మిర్ సుదుడె ఆయ్యిట్” ఇంజెర్ వెహ్తార్. ¹¹ తనకున్ బోర్ దోక సియ్యల్ మంతోర్ ఇన్వోల్ టావ మత్త కాడ్కినె, యేసు “మిహ్గటల్ సమ్మిర్ సుదుడె ఆయ్యిట్” ఇంజెర్ ఇత్తోర్.

¹² అని వూరంగ్ కాల్క్ నొర్పి, తన్వ సాలువతున్ సెలనగ వాట్సి, ఇదెన్ మునె ఉచ్చి మత్త జాగతగ సాంజి ఉడతొర్. అహాన్ ఉచ్చి, “నన ఇంకె కీత అద్ కామ్ మీకున్ అర్తమ్ ఆత కి?” ఇంజెర్ సిస్యలిర్కున్ పూసి కీతోర్. ¹³ “మిరట్ నాకున్ ‘గురుజి’ అని ‘పర్బు’ ఇంజెర్ కేయంతిట్. నన గురున అని పర్బున ఆత కాడ్కి, మిరట్ ఇహిన్ కేయ్యల్ బరొబరె ఆంద్. ¹⁴ నన పర్బున అని గురున ఆసి గిర్ మీవంగ్ కాల్క్ నొరై కాడ్కి, మిరట్ గిర్ వొరొనంగ్ వొరొర్ కాల్క్ నొరయ్ లాగర్. ¹⁵⁻¹⁶ దాసి తన్వోర్ మాల్కాన్ తెర్ డగుర్ ఆయెర్. అహ్నా కబ్రియల్ తనకున్ సారి కీతోన్ తెర్ డగుర్ ఆయెర్. నన మీవంగ్ కాల్క్ నొరై తీర్, మిరట్ గిర్ కియన ఇంజెర్ మీకున్ నమునత రూప్నె తొహ్తాన్. ఇద్ సతెమ్ ఆంద్. ¹⁷ ఇంకె మిరట్ ఇవ్ గొస్టింగ్ కరి కీత కాడ్కి, ఇవెన్ పియ్యి తాకకిట్టె, బగవంతల్ మీకున్ ఆసిర్వాద్ సీంతోర్” ఇంజెర్ వెహ్తార్.

తనకున్ దోక సియ్యడున్ బారెతె యేసు వెహ్యల్

¹⁸ “మీ సమ్మిర్ బారెతె నన వెహ్కీ. నన నేమి కీతుర్ బారెతె నాకున్ టావ. బతి, ‘నా సంగ సారి తితోర్ వోర్, నాకున్ బయ్యున్ ఆసి దోక సీతోర్’ ఇంజెర్ దర్మ-గ్రంత్న గొస్టి బర్బుర్ ఆయె ఇహిన్ జర్గంత. ¹⁹ ఇవ్ జర్గత పెజె, ‘కిరిస్తున ననయె ఆందున్’ ఇంజెర్ బరొస కీకిట్ ఇంజెర్, మునెనె మీకున్ వెహ్చార్ మంతాన్. ²⁰ ఇద్ సతెమ్ ఆంద్. నన బోన్తె సారి కీంతానొ, వోన్ కరుమ్ కియ్యల్, నాకున్ గిర్ కరుమ్ కీంతోర్. నాకున్ కరుమ్ కియ్యల్, నాకున్ రొహ్తార్ వోర్ బాబొన్ గిర్ కరుమ్ కీంతోర్ ఇంజి వెహ్చార్ మంతాన్” ఇంజెర్ ఇత్తోర్.

²¹ ఇవ్ గొస్టింగ్ వెహ్తా పెజె యేసు, ఆత్మతగ తల్మెలె మాసి, “మిహ్గటల్ వొరొర్ నాకున్ పగ-దార్క్న కెయ్యె హల్లి కీంతోర్. ఇద్ గవ సతెమ్ ఆంద్” ఇంజెర్ వెహ్తార్. ²² బోన్ బారెతె వెహ్తారొ ఇంజెర్ సిస్యలిర్ కరి కియ్య సాంజి, వొరొన మొకొమ్ వొరొర్ సూడెర్. ²³ సిస్యలిర్గటల్ యేసున్ వెలె పెర్బ కియ్యల్ యేసున తిన బగ్గ బెయ్ కరుమ్ ఉచ్చి మత్తోర్. ²⁴ తె సీమొన్-పేతురు వోర్ సిస్యన్, “యేసు బోన్ బారెతె వెహ్తారొ పూసి కీమ్” ఇంజెర్ కెయ్యె ఇసర కీతోర్. ²⁵ అస్కె వోర్ సిస్యల్ యేసున్ కరుమ్ ఉండె ఇమర్ ఉర్గె మాసెర్, “పర్బు! వోర్ బోర్ ఆందుర్?” ఇంజెర్ పూసి కీతోర్. ²⁶ తె యేసు, “కోజతగ ముడుసి బోన్తె నన సారి టుక్తె సీంతానొ వోరె” ఇంజెర్ వెహ్తార్. అహాన్ వెహ్చి, సారి టుక్తె ముడుసి సీమొన్తోర్ మరి ఇస్కరియోత్ నాట్యోర్ యూదన్ సీతోర్. ²⁷⁻³⁰ అస్కె వోర్ సారి టుక్తె యేత్త పెజె, “నిమె కీక ఇన్వోల్ కామ్ సప్నె కీమ్” ఇంజెర్ యేసు వోన్ వెహ్తార్. యేసు అహాన్ బారి వెహ్తారెయ్, జేవున్ ఉద్దుర్గటల్ వొరొన్ గిర్ టావ సెలె. యూదనగ కొతన తెయ్ల మత్త కాడ్కి యేసు, «సడ్డున్ పహ్లా మత్తంగ్ చీజ్క్ యేత» ఇంజి ఇత్తోర్ బతలొ ఇంజెర్ కహితుర్ సోంచ్ కీతెర్. «గరిబ్ లోకుర్కున్ బతయ్ సీమ్» ఇంజి ఇత్తోర్ బతలొ ఇంజెర్, ఉండె కహితుర్ సోంచ్ కీతెర్. వోర్ సారి టుక్తె యేత్త పెజె సయ్యన్ సోప్రె మాసి, బహ్రి సాడితొర్. అస్కె రాత్ ఆసి మత్త.

యేసు పూన హుకుమ్ సియ్యల్

³¹ యూదల్ సొత్త పెజె యేసు, “ఇంకె స్వర్గ్‌నోర్ మాయ్నన్ మాన్ పుట్టల్ వకత్ వాత. వేర్ తాదన్ హిందల్ బగవంతన్ డగుర్-పాన్ వాంత. ³² మోక బగవంతన్ మరిన్ హిందల్ డగుర్-పాన్ వాతెకె, బగవంతల్ తన్వోర్ మరిన్ మాన్ సీంతోర్. అద్ డగుర్-పాన్ యెంటనె వోర్ మరిన్ సీంతోర్. ³³ నా మర్క్‌నిట్! ఉండె జరసి కాలమ్ వేరి మీ సంగ మందంతోన్. అద్ ఆత పెజె, మిరట్ నాకున్ మహ్కంతిట్. బతి నన బగ దాంతోన్ అగ మిరట్ ఇంకె వాయ పర్విట్ ఇంజెర్ యూదుల్కున్ వెహ్త తీరె, మీకున్ గిర్ వెహ్చోర్ మంతోన్. ³⁴ ఇంకె మీకున్ ఉంది పూన హుకుమ్ సిసెర్ మంతోన్. నన మీకున్ లాడ్ కీతపె, మిరట్ గిర్ వొరొన్ వొరొర్ లాడ్డె సూడట్. ³⁵ వొరొన్ వొరొర్ లాడ్డె సూడ్వడున్ హిందలె, మిరట్ నా సిస్యలిర్ ఆందిట్ ఇంజెర్ సమ్మిర్ కరి కీంతె” ఇంజెర్ యేసు వెహ్చోర్.

³⁶ సిమోన్-పేతురు, “పర్బు! నిమె బగ దాంతి?” ఇంజెర్ పూసి కీతోర్. తె యేసు, “నన సొన్వడగ నిమె ఇంకె వాయ పర్వి. బతి పెజెటల్ వాంతి” ఇంజెర్ జవబ్ సీతోర్. ³⁷ అస్కె పేతురు, “పర్బు! నన బారి వాయ పరొన్? నీ సాటి పరన్ సియ్యె గిర్ తయర్ మంతోన్” ఇంజెర్ వెహ్చోర్. ³⁸ అస్కె యేసు, “అబ! నిమె నా సాటి పరన్ సీంతియ్? నా బారెతె నిమె, ‘వోర్ బోర్ ఆందురొ టావ సెలె’ ఇంజెర్, మూంద్ జోకంగ్ లబడ్ వెహ బీగర్, నేట రాతున్ అసలె గొగ్గి కూసా. ఇద్ సతెమ్ ఆంద్” ఇంజెర్ పేతుర్తున్ వెహ్చోర్.

బాబొనగ వోయ్యల్ సరి యేసు ఆందుర్

14 “మిరట్ మీ దిల్కున్ పరెసన్ ఆయ సియ్యట్. బగవంతనగ బరొస ఇరట్ అని నహ్గ గిర్ బరొస ఇరట్. ² నా బాబొన రోన్ వెలె క్రమంగ్ మంతంగ్. అవెన్ తయర్ కీసి ఇరె, మునె సొంజెర్ మంతోన్. అహన్ సెల్వక్ ఇత్తెకె, మీకున్ వెహ్చి మనోన్. ³ నన సొంజి మీ సాటి జాగ తయర్ కీత పెజె, నన బగతె మందంతోనో, అగ మిరట్ గిర్ మన్లె, ఉందుంది జోక వాసి, మీకున్ వోంతోన్. ⁴ నన సొన్వల్ జాగత సరి మీకున్ టావయె” ఇంజెర్ పూర్కున్ వెహ్చోర్. ⁵ అస్కె తోమల్, “పర్బు! నిమె బగ దాంతియె మాకున్ టావ సెలె. తె అగ సొన్వల్ సరి మాకున్ బహన్ వొడ్కి ఆయర్?” ఇంజెర్ ఇత్తోర్. ⁶ అస్కె యేసు, “ననయె సరిత, సతెమ్మ అని జీవత ఆందున్. నా బీగర్ బాబొనగ బోరె వాయ పరొర్. ⁷ మిరట్ నాకున్ వొడ్కి కీందిట్తె, నా బాబొన్ గిర్ వొడ్కె మూందిట్. ఇంకె వోన్ సూడ్డిట్ అని వోర్ మీకున్ టావయె” ఇంజెర్ వెహ్చోర్.

⁸ అస్కె పిలిప్, “మాకున్ బాబొన్ తొహ పర్బు. అచొరె మాకున్ ఆయర్” ఇంజెర్ ఇత్తోర్. ⁹ తె యేసు పిలిపున్, “ఇంకె వేరి మీ సంగనె మంతోన్ తెరె నాకున్ వొడ్కి కియ్యిటియ్? నాకున్ సూడ్చోర్ వోర్, బాబొన్ సూడ్చపె. ‘బాబొన్ మాకున్ తొహ’ ఇంజెర్ బహన్ పూసి కీసెర్ మంతి? ¹⁰ నన బాబొనగ అని బాబొ నహ్గ మంతోర్ ఇంజెర్ బరొస కియ్యి కి బతల్? నన మీ సంగ వెహ్చలిక్ గొస్టింగ్ నా ఇవతె వెహ్చోర్ సెలొన్. నా రొపా మన్వల్ బాబొయె తన్వంగ్ కామ్మ కియుసెర్ మంతోర్. ¹¹ బాబొనగ నన అని నహ్గ బాబొ మీరె మాసి మంతోమ్ ఇంజెర్ బరొస కీమ్మ. నన వెహ్చంగ్ గొస్టిన్ పియ్యి బరొస కియ్యెకె, నన కీతంగ్ మయ్యతంగ్ కామ్మ సూడ్చి తెర్ బరొస కీమ్మ. ¹² నన బాబొనగ సొన్వడున్ హిందల్, నహ్గ బరొస ఇర్వల్ నన కీతంగ్ మయ్యతంగ్ కామ్మ కీంతోర్. వోర్ నన కీతన్ తెర్ డగుక్ కామ్మ కీంతోర్. ఇద్ గొస్టి సతెమ్ ఆంద్. ¹³ నా పొరొడె బతల్ తల్కకిట్ తెర్ మరిన్ హిందల్, బాబొన్ మాన్ పుటన్ సాటి, మిరట్ కోర్త తీర్ కీంతోన్. ¹⁴ మిరట్ నా పొరొడె బతల్ కోర్తెకె గిర్ అదెన్ కీంతోన్.

యేసు పవిత్ర ఆత్మతున్ బారెతె వెహ్చోర్

¹⁵ “మిరట్ నాకున్ పెర్మ కీకిట్టె, నావ హుకుమ్ పియ్యి తాకంతిట్. ¹⁶ నా బద్ది మీకున్ మదత్ కీసెర్, బస్కెట్ మీ సంగ మన్లె, ఉందితున్ సారి కీమ్ ఇంజెర్ నన బాబొన్ వినంతి కీంతోన్. ¹⁷ అద్ మదత్ కియ్యల్ పవిత్ర ఆత్మ ఆంద్.

సతెమున్ బారెతె అద్ మీకున్ వెహంత. ఇదెన్ హిందల్, మీకున్ బగవంతన ఆత్మ టావ. అద్ ఆత్మ ఇంకె మీ సంగ మంత అని మర్ల మీ రొపా మందంత. బతి దునియతుర్ తాన్ సూడ్సెర్ సెలూర్ అని కరి కీసెర్ సెలూర్. అదెన్ సాటి వూర్, అద్ ఆత్మతున్ వొప్పుర్.

¹⁸ “మీకున్ పోసటిర్ దాత్ సుటి కియెన్. మిహ్గ వాంతాన్. ¹⁹ ఉండె కహి రోజ్కనె ఇద్ దునియతుర్ నాకున్ బస్సెనె సూడుర్. బతి మిరట్ నాకున్ సూడంతిట్. బారెతె నన పిస్త తీరె, మిరట్ గిర్ పిసంతిట్. ²⁰ అద్ నేటి నన బాబొనగ, మిరట్ నహ్ అని నన మిహ్గ మంతాన్ ఇంజెర్ కరి కీంతిట్. ²¹ నావంగ్ హుకుమ్మి వొప్పి, అవెన్ పియ్యి తాక్వల్ నాకున్ లాడ్ కీంతార్. నాకున్ పెర్మ కియ్యన్ నా బాబొ పెర్మ కీంతార్. నన గిర్ వోన్ లాడ్ కీసి, నావ ననయ్ వెహి తోహంతాన్” ఇంజెర్ వెహ్తార్. ²² అస్సె యూదల్ (వేర్ ఇస్కరియోత్ నాటూర్ యూదల్ ఆయెర్), “పర్బు! దునియతున్ ఆయ్యి సిరిప్ మాకె బారి పావె మాంతాన్ ఇంతి?” ఇంజెర్ యేసున్ పూసి కీతార్. ²³ తె యేసు, “నాకున్ పెర్మ కియ్యల్ నావ గొస్టి పియ్యి తాకంతార్. ఆతాన్ నా బాబొ లాడ్ కీంతార్. వోన్ వాసి మమెట్ మందంతామ్. ²⁴ బతి నాకున్ పెర్మ కియెర్ వోర్, నావ గొస్టి పియ్యి తాకార్. మిరట్ కేంజ్చలిక్ గొస్టింగ్ నావంగ్ ఆయెంగ్ బతి, నాకున్ సారి కియ్యల్ బాబొనంగ్ ఆందుంగ్. ²⁵ నన మీ సంగ మనెకనె, ఇవ్ గొస్టింగ్ మీకున్ వెహ్తాన్. ²⁶ బతి బాబొ నా పొరాడె సారి కియ్యల్ పవిత్ర ఆత్మ మీకున్ సమ్మె కరుసంత. అని అద్ నన వెహ్తంగ్ సమ్మెన్ గిర్ మీకున్ హేతు కియుసంత.

²⁷ “సాంతితున్ మీకున్ సీసి దాంతాన్. నావ సాంతితునె మీకున్ సీసెర్ మంతాన్. * దునియ సీసెర్ మత్త తీర్ నన మీకున్ సీసెర్ సెలూన్. మీవంగ్ దిల్కున్ తకపిక ఆయ సియ్యుట్ అని వెరిమట్. ²⁸ ‘నన సాంజి, మిహ్గ వాంతాన్’ ఇంజెర్ వెహ్త గొస్టి కేంజ్చిట్. బాబొ నాకున్ తెర్ డగుర్-పాన్ వాలె ఆత కాడ్కి, మిరట్ నాకున్ లాడ్ కీతెకె, బాబొనగ సాంజెర్ మంతార్ ఇంజెర్ వెలె ఆనంద్నె మందిట్. ²⁹ మిరట్ బరొస ఇర్కిట్ ఇంజెర్ ఇవ్ జర్గవక్ మునెన్, వెహ్చార్ మంతాన్. ³⁰ ఇద్ దునియతుర్ అదికారి సయ్యన్ వాసెర్ మంతార్. అదెన్ సాటి ఉండె వెలె జేల్ మీ సంగ వడ్కాన్. నా పొరా వోన్ బతయ్ అదికార్ సెలె. ³¹ బతి నన బాబొన్ లాడ్ కీసెర్ మంతాన్ ఇంజెర్, ఇద్ దునియతుర్కున్ కరె మానల్, బాబొన హుకుమున్ పియ్యె ఇహిన్ కీసెర్* మంతాన్. తేదట్! ఇగెటల్ దాకట్” ఇంజెర్ ఇత్తార్.

యేసుయె కరల్ వేలి ఆందుర్

15 సిస్యలిర్ యేసున్ సంగ అహన్ సాంజెర్ మనెకె, “నన కరల్ ఆంగుర్ వేలిత ఆందున్. నా బాబొ అద్ ఆంగుర్ వాడితున్ మాల్కల్ ఆందుర్. ² నహ్గట్ కొడ్కి, ఆంగుర్క్ సాదొంగ్ అవ్ కాందన్ బాబొ పాసి వాటంతార్. సాద్వలిక్ కాందన్ ఉండె ఇమర్ వెలె సాదన ఇంజెర్ అవెనంగ్ కొడ్కింగ్ కత్రి కీంతార్. ³ నన మీకున్ వెహ్తంగ్ గొస్టిన్ హిందల్, మీవంగ్ పాష్క్ ఇన్వలిక్ కొడ్కింగ్ కత్రి మాసి, సుదుడ్ ఆసి తయర్ మంతిట్. ⁴ నహ్గ ఉంది ఆసి మంట్. మిహ్గ నన మందంతాన్. కాంద ఆంగుర్ వేలితగ జోడె మాసి మంద బీగర్ బహనై సాదొయె, అహ్నె నహ్గ ఉంది ఆసి మంద బీగర్ మిరట్ చొకొట్టుంగ్ కామ్మి కియ పర్విట్.

⁵ “నన ఆంగుర్ వేలిత ఆందున్. మిరట్ నహ్గ కొడ్చితంగ్ కాందంగ్ ఆందిట్. బోరై నహ్గ మందంతారా అని వోన్గ్ నన మందంతానా, వోర్ ఉండె వెలె చొకొట్టుంగ్ కామ్మి కీంతార్. నాకున్ టూటె మాసి మిరట్ బతయ్ కియ పర్విట్. ⁶ బోరై నహ్గ మనారా, వోర్ పాసి వాడ్త కాంద వత్తపినయ్ వత్తంతార్. ఆతంగ్ వత్తంగ్ కాందన్ మాయ్చలిర్ మీరి కీసి తడ్కితగ వాటంతెర్ అని అవ్ వేంతంగ్. ⁷ నహ్గ మిరట్ అని మిహ్గ నావంగ్ గొస్టింగ్ మత్తెకె, మీకున్ ఇస్టమ్ వాతతున్ కోరట్. అద్ మీకున్ పుటంత. ⁸ మిరట్ చొకొట్టుంగ్ కామ్మి కియ్యడున్ హిందల్, నా బాబొన్ మయ్య వాంత. ఇవ్ సూడ్కి, మిరట్ నా సిస్యలిర్ ఇంజెర్ దుస్రుర్ కరి కీంతెర్. ⁹ బాబొ నాకున్ బహన్ లాడ్ కీతారా, అహ్నె నన మీకున్ లాడ్

* 14:27 ఇద్ బగవంతన సాంతి ఆంద్. యెహెజ్కేల్ 37:24–28
హువి కీంతాన్.

* 14:31 ఇత్తెకె నాకున్ దునియతుర కెయ్ సయ్యన్ జకుస్లె, నావ నన

కీతాన్. నావ లాడ్డగ నిల్చి మంట. ¹⁰ నన బహన్ బాబోనంగ్ హుకుమ్మ పియ్యి, తాక్సెర్ బాబోన లాడ్డగ నిల్చి మత్తొనా, అహ్నె మిరట్ గిర్ నావంగ్ హుకుమ్మ పియ్యి తాకకిట్టె, నావ లాడ్డగ నిల్చి మందంతిట్. ¹¹ నావ ఆనంద్ మీ రొపా మందన అని అద్ ఆనంద్ బర్పుర్ ఆయన ఇంజెరెన్, ఇవ్ గొస్టింగ్ మీకున్ వెహ్చార్ మంతాన్.

¹² “నన మీకున్ లాడ్డె సూడ్త తీరె, మిరట్ గిర్ వారాన్ వారార్ పెర్మతె సూడన. ఇదె నావ హుకుమ్ ఆంద్. ¹³ సోప్తలిర్ సాటి తన్వ పరన్ సియ్యడున్ తెర్ అదిక్ పెర్మ కియ్యల్ బోరె సెలార్. ¹⁴ నన మీకున్ హుకుమ్ సీత తీర్ తాక్తె, మిరట్ నావుర్ సోప్తలిర్ ఆసి మందంతిట్. ¹⁵ నన ఇంగెడల్ మీకున్ దాసిర్ ఇంజి కేయ్యక్నె, సోప్తలిర్ ఇంజెర్ కేయంతాన్. బారితెకె మాల్యనంగ్ పిల్స్క దాసిర్కున్ టావ మనా. బతి నన నా బాబోనల్ కేంజ్టింగ్ సమ్మె గొస్టింగ్ మీకున్ వెహ్చాన్. ¹⁶ నాకున్ మిరట్ ఆచ్చకి బతి, ననయ్ మీకున్ ఆచ్చి, నేమి కీతాన్. బస్కెట్ నిచ్చి మన్వల్ పండి సీనల్ మిరట్ చొకొట్టంగ్ కామ్మ కియన ఇన్వలె నావ ఇచ. అహన్ కీతెకె, నా పొరాడె బాబోన్ బతల్ తల్కెకె గిర్, అద్ మీకున్ పుటంత. ¹⁷ మిరట్ వారాన్ వారార్ పెర్మ కియన ఇంజెరెన్ ఇద్ హుకుమ్ మీకున్ సీతాన్.

దునియతుర్ మీకున్ మెచుర్

¹⁸ “దునియతుర్ మీకున్ మెచ్చెకె, మీకున్ తెర్ మునె నాకున్ మెచ్చకి ఇంజెర్ హేతు ఇరట్. ¹⁹ మిరట్ దునియతుర్ దాత్ మన్మడ్ ఇత్తెకె, వూర్ మీకున్ పసంద్ కీందిర్. బతి మిరట్ దునియతుర్ ఆయ్యిట్. బారితెకె మీకున్ దునియతుర్గట్ ఆచ్చాన్. అదెన్ సాటినె ఇద్ దునియతుర్ మీకున్ పసంద్ కియిర్. ²⁰ ‘దాసి తన్వార్ మాల్యన్ తెర్ డగుర్ ఆయెర్’ ఇంజి, ఇదెన్ మునె వెహ్చా గొస్టితున్ హేతు ఇరట్. లోకుర్ నాకునె దుక్స బోగి కియుస్త కాడ్కి, మీకున్ గిర్ దుక్స బోగి కియుసంతెర్. వూర్ నావ గొస్టి పియ్యి తాక్తెకె, మీవ గిర్ గొస్టి పియ్యి తాకంతెర్. ²¹ నాకున్ రొహ్చార్ బాబోన్ వూర్ వొడ్కి కియ్య కాడ్కి, నా హిందల్ ఇవ్ సమ్మె మీకున్ కీంతెర్.

²² “నన బోద వెహ్లా వాయ్యక్ ఇత్తెకె, వూర్ పొరా పాప్స కసుర్ మన్వెకె సొందు. బతి నన వాత కాడ్కి, ఇంకె వూర్కున్ తమ్మ పాప్స కసుడల్ తపుసియ్లె మోక సెలె. ²³ నాకున్ మెచార్ వోర్, నా బాబోన్ గిర్ మెచార్. ²⁴ బోరె కియిర్ అవ్ చమత్కార్క్ నన కియ్యక్ ఇత్తెకె, వూర్ పాప్స కసుర్ మన్వెకె సొందు. బతి నన కీతంగ్ చమత్కార్క్ వూర్ సూడ్తెర్. తెర్ బతి నాకున్ అని నా బాబోన్ మెచ్చెర్ సెలర్. ²⁵ ‘బతయ్ కారన్ సెల్వెకె గిర్ నాకున్ మెచ్చెర్ సెలర్’ ఇంజెర్ దర్మ-గ్రంత్ న చచన్ బర్పుర్ ఆయన్ సాటినె ఇహిన్ జర్గత్. ²⁶ బాబోనగట్ మీకున్ మదత్ కియ్లె పవిత్ర ఆత్మతున్ రొహంతాన్. అద్ వాత పెజె నా బారెత సత్స గవ మీకున్ వెహంత. ²⁷ మిరట్ గిర్ నా బారెతె గవ వెహంతిట్. బారితెకె, మొదొడల్ నా సంగ మత్తుర్ ఆందిట్.

16 “మిరట్ బరొసతల్ బహ్కె మాయ్యక్నె మందన ఇంజెరెన్ ఇవ్ గొస్టింగ్ వెహ్చాన్. ² వూర్ మీకున్ సమాజ్జల్* అలది వాటంతెర్. మీకున్ జక్వల్ హర్ వారార్ తన బగవంతన సేవ కీసెర్ మంతాన్ ఇన్వల్ వకత్ వాసెర్ మంత. ³ బాబోన్ అని నాకున్ వూర్ కరి కియ్య కాడ్కి, ఇహిన్ కీంతెర్. ⁴ ఇహిన్ జర్గెకె, ఇవెన్ బారెతె మునెనె మీకున్ వెహ్చాన్ ఇంజెర్ హేతు కీకిట్, ఇంజి వెహ్చార్ మంతాన్.

పవిత్ర ఆత్మతంగ్ కామ్మ

“ఇచొంగ్ రోజ్క్ నన మీ సంగనె మత్త కాడ్కి, మొదొల్ ఇవ్ గొస్టిన్ బారెతె వెహ్చాకి. ⁵ బతి ఇంకె నన నాకున్ రొహ్చల్ బాబోనగ సొంజెర్ మంతాన్. తెర్ బతి, మిహ్గట్ వారార్ గిర్ ‘నిమె బగ దాంతి?’ ఇంజెర్ పూసి కీసెర్ సెల్విట్. ⁶ ఇవ్ గొస్టింగ్ నన మీకున్ వెహ్చా కాడ్కి, మీవంగ్ దిల్క్ పూరా దుక్సతె నించి మంతంగ్. ⁷ నన సొత్తెకెన్, మీకున్ పాయ్లె ఆంత. నన సొంద బీగర్, మీ సంగ మంజి మదత్ కియ్యల్ పవిత్ర ఆత్మ మిహ్గ వాయె. నన సొత్తెకెన్ అద్ ఆత్మతున్ మిహ్గ రొహంతాన్. ఇద్ సతెమ్ ఆంద్. ⁸ అద్ పవిత్ర ఆత్మ వాసి, పాపున్ బారెతె, నియతున్ బారెతె అని తస్వతున్

* 16:2 సమాజ్జల్ గ్రీకు బాసతగ సునగొక్సల్ ఇంజెర్ మందంత.

బారెతె దునియతుర్కున్ తొహంత. ⁹ నా పొరొ బరొస ఇర్వ కాడ్కి, వూర్ పాప్ కీతెర్ ఇంజెర్ పవిత్ర ఆత్మ తొహంత. ¹⁰ నన బాబొనగ దాంతోన్* అని ఇంగెడల్ నాకున్ మిరట్ సూడ్వ కాడ్కి, నన నియత్నొన ఇంజెర్ అద్ పవిత్ర ఆత్మ తొహంత. ¹¹ ఇద్ దునియతొర్ అదికారి సయ్యన్దున్ తస్వ జర్గిత. అదెన్ సాటి, బగవంతల్ గిర్ ఇద్ దునియతుర్కున్ తస్వ కీంతొర్ ఇంజెర్ పవిత్ర ఆత్మ తొహంత. ¹² నన మీకున్ వెహ్వలిక్ ఉండె వెలె గొస్టింగ్ మంతంగ్ బతి, మిరట్ అవెన్ సోసి కియ పర్విట్. ¹³ అద్ పవిత్ర ఆత్మ వాసి, సతెమున్ బారెతె వెహంత. అద్ మీకున్ బర్పుర్ సత్తెకె తాకుసంత. అద్ తస్వ తనయ్ బతయ్ వెహొ. తన కేంజుంగ్ అవెనె వెహంత. బవిసత్తె జర్గవలికున్ బారెతె గిర్ వెహంత. ¹⁴ అద్ ఆత్మ నన వెహ్తంగ్ గొస్టింగ్ యేచ్చి మీకున్ వెహ్త కాడ్కి, నాకున్ మాన్ పుటంత. ¹⁵ బాబొనగ మన్వలిక్ సమ్మె గిర్ నావంగ్ ఆంతంగ్. అదెన్ సాటి, పవిత్ర ఆత్మ నన వెహ్తనల్ యేచ్చి వెహంత ఇత్తోన్.

దుక్కు సొంజి ఆనంద్ వాయ్యల్

¹⁶ “కహి రోజ్క్ ఆత పెజె నాకున్ మిరట్ సూడ్వట్. బతి ఉండె కహి రోజ్క్ ఆత పెజె నాకున్ సూడంతిట్” ఇంజెర్ సిస్యలిర్కున్ వెహ్తార్. ¹⁷ ఇద్ గొస్టి కేంచి కహితుర్ సిస్యలిర్, “కహి రోజ్క్ ఆత పెజె నాకున్ మిరట్ సూడ్వట్. బతి ఉండె కహి రోజ్క్ ఆత పెజె నాకున్ సూడంతిట్. నన బాబొనగ దాంతోన్” ఇంజెర్ మా సంగ బతతున్ సాటి వెహ్చార్ మంతార్?” ఇంజెర్ తమ్మ తమ వడ్కెతెర్. ¹⁸ “కహి రోజ్క్ ఆత పెజె” ఇంజెర్ బతతున్ బారెతె వెహ్చార్ మంతార్? వోర్ వెహ్వల్ గొస్టి మాకున్ అర్తమ్ ఆసెర్ సెలె” ఇంజెర్ ఇత్తెర్.

¹⁹ తనకున్ పూసి కియె ఆయ్యల్ గొస్టితున్ యేసు కరి కీసి, “కహి రోజ్క్ ఆత పెజె నాకున్ మిరట్ సూడ్వట్. బతి ఉండె కహి రోజ్క్ ఆత పెజె నాకున్ సూడంతిట్” ఇంజెర్ వెహ్త గొస్టితున్ బారెతె మీవ మిరట్ బతంగ్ వడ్కెసెర్ మంతిట్?” ఇంజెర్ ఉల్ల వూర్కున్ పూసి కీతొర్. ²⁰ అని, “మిరట్ దుక్కుతె ఆడంతిట్ బతి, దునియ ఆనంద్ యేతంత. మిరట్ ఆడంతిట్ బతి, మీ దుక్కు మారిసి ఆనంద్ ఆయర్. ఇద్ సతెమ్ ఆంద్. ²¹ వెయ్యె యేర్ పూర్వల్ గల్కు వాత కాడ్కి, వాతంగ్ నొపిన దుక్కుతున్ బోగె మాంత. బస్కెతె మొడ్డె సెలెకె మొడ్డెన్ జల్మ సీంతయె, అస్కె దునియతె ఉంది జీవతున్ జల్మ సీతోన్ ఇన్వల్ ఆనంద్యె, తన బోగె మాత దుక్కుతున్ మర్నగంత. ²² అహ్నె మిరట్ ఇంకె దుక్కు యేచ్చెర్ మంతిట్. బతి మీకున్ ఉందుంది జోక సూడంతోన్. అస్కె మీవంగ్ దిల్కెనె మన్వల్ ఆనందున్ బోరె తెండ్సి వాట పరుర్. ²³ అద్ యేలతె మిరట్ నాకున్ బతయ్ పూసి కియ లాగొ” ఇంజెర్ వూర్కున్ వెహ్తార్.

అస్కె యేసు, “మిరట్ నా పొరొడె బాబొన్ బతల్ తల్కెతెకె గిర్, అద్ మీకున్ పుటంత. ఇద్ సతెమ్ ఆంద్. ²⁴ ఇంకె వేరి మిరట్ నా పొరొడె బతయ్ కోర్మకి. మీ ఆనంద్ బర్పుర్ ఆయన్ సాటి, తల్కెసెరెన్ మంట్. మీకున్ తప్పక్ సియ్యల్ జర్గంత. ²⁵ ఇవ్ గొస్టింగ్ మీ సంగ నమునన రూప్నె వెహ్తొన్. బతి ఉండె బస్కెనె నమునన రూప్నె వెహ్తొన్. బాబొన్ బారెతె, మత్త తీర్ నన మీకున్ అర్తమ్ ఆనల్ వెహ్వల్ వకత్ వాసెర్ మంత. ²⁶⁻²⁸ నన బాబొనగటల్ ఇద్ దునియతె వాతొన్. ఇంకె దునియతున్ సుటి కీసి బాబొనగ సొంజెర్ మంతొన్. మిరట్ నాకున్ పెర్మ కీసి, నన బగవంతనల్ వాతొన్ ఇంజెర్ బరొస ఇర్త కాడ్కి, బాబొయె మీకున్ లాడ్ కీసెర్ మంతొర్. అద్ వకత్తె నన బాబొన్ మీ సాటి కోర్వల్ జురత్ సెలె. బతి మిరట్ నా పొరొడె బాబొన్ కోరంతిట్. వోర్ మీకున్ సీంతొర్” ఇంజెర్ వూర్కున్ వెహ్తార్.

²⁹ అస్కె సిస్యలిర్, “ఇచుల! ఇంకె నిమె నమునన రూప్నె ఆయ్య కుల కుల వెహ్చెర్ మంతి. ³⁰ బోరె వొరొర్ సవల్క్ పూసి కియ్యల్ జురత్ సెలె. ఇంకె నీకున్ సమ్మి టావ ఇంజెర్ మాకున్ అర్తమ్ ఆత. ఇదెన్ హిందల్ నిమె బగవంతనల్ వాతి ఇన్వడున్ బరొస కీంతొమ్” ఇంజెర్ వెహ్తార్. ³¹ తె యేసు, “ఇంకె నహ్గ కరల్ బరొస కీసెర్ మంతిట్ కి? ³² సూడట్! నాకున్ వొరొనె సుటి కీసి, మిరట్ బెందుర్ హకె పరర్ ఆయ్యల్ వకత్ వాసెర్ మంత. అద్ ఇంకె వాసిన్ మంత తెర్ బతి, నన వొరొన ఆయెన్. బాబొ నా సంగ మంతొర్. ³³ నా హిందల్, మీకున్ సొంతి వాయన ఇంజెర్ ఇవ్ గొస్టింగ్ వెహ్చెర్

* 16:10 బాబొ బగవంతనగ సొంజి తిన బగ్ల ఉచ్చి రాజ్ తాకుసంతొర్. (హెబ్రి 8:1) ఇహిస్ బగవంతన్ సంగ ఉచ్చి మన్వల్ తరిక వోర్ నియత్నొర్ (1వ యోహాన్ 2:1-2) ఇంజెర్ తొహంత.

మంతాన్. దునియతగ మీకున్ దుక్కుంగ్ అని తక్లిల్క్ వాంతంగ్. బతి అవ్ సమ్మిన్ నన మెయ్యి మంతాన్. అదెన్ సాటి మిరట్ గటి-దీర్యతె మంట్” ఇంజెర్ వూర్క్కున్ వెహ్చార్.

యేసు పార్తన కియ్యల్

17 యేసు ఇవ్ గొస్టింగ్ వెహ్చి, పొరొ హబడెకె సూడ్సెర్ ఇహిన్ పార్తన కీతోర్: “బాబ! నిమె దునియతుర్ సమ్మిర్ మాయ్లిర్ పొరొ నాకున్ అదికార్ సీతి. ఇదెన్ హిందల్, నిమె నాకున్ సీతుర్క్కున్ బస్కెట్ పిస్వల్ జీవ సియ పరంతాన్. వొరొనియ్ సతె బగవంతల్ ఆయ్యల్ నీకున్ అని నిమె రొహ్తా వోర్ యేసు కిరిస్తున్ కరి కియ్యలిర్కునె బస్కెట్ పిస్వల్ జీవ పుటంత. బొమిత్ పొరొ నాకున్ సీత సమ్మె కామున్ బర్చుర్ కీసి, నీకున్ మయ్య తత్తాన్. అద్ వకత్ ఇంకె వాసిన్ మంత. నాకున్ నీవ మయ్య వాయుస. ఇద్ తీర్దె నీకున్ నన మయ్య వాయుసంతాన్. ⁵ యే బాబ! ఇద్ కలి గడె మాయ్క్ మునె నన నిహ్గ మనెకె, బాతల్ మయ్య మత్తయె, ఆతలె మయ్య ఇంకె నాకున్ వాయ సీమ్.

యేసు తన్వర్ సిస్యలిర్ సాటి పార్తన కియ్యల్

⁶ “ఇద్ దునియతల్ నాకున్ సీతి వూర్ నీకున్ కరి కీనల్ కీతోన్. వూర్ లోకుర్ నీవుర్ ఆందిర్, బతి నిమె వూర్క్కున్ నహ్గ హల్లి కీతి. వూర్ నీవ వచన్ పియ్యి తాక్తెర్. ⁷⁻⁸ నిమె నాకున్ సీతంగ్ గొస్టిన్ వూర్క్కున్ వెహ్చాన్. అదెన్ వూర్ వొప్పి, నిమెయ్ నాకున్ సారి కీతి ఇంజెర్ బరోస ఇరైర్. నన కరలెనె నిహ్గటల్ వాతాన్ ఇంజెర్ వూర్క్కున్ కరె మాత. తె నన వడ్కెలె గొస్టింగ్ అని మయ్యతంగ్ కామ్మి కియ్యె సక్తి సమ్మె నిమెయ్ సీతి ఇంజెర్, ఇంకె వూర్క్కున్ కరె మాత. ⁹ వూర్ సాటినె పార్తన కీసెర్ మంతాన్. బతి దునియతుర్ సాటి పార్తన కీసెర్ సెలొన్. నిమె నాకున్ సీతి వూర్, నీవుర్ ఆత కాడ్కి, వూర్ సాటినె పార్తన కీసెర్ మంతాన్. ¹⁰ నహ్గ మన్వలిర్ సమ్మిర్ నీవురె ఆందిర్ అని వూర్క్కున్ నిమెయ్ నాకున్ సీతి. వూర్ నా పొరొ ఇర్త బరోసతున్ హిందల్ నాకున్ మాన్ పుట్ట. ¹¹ నన ఉండె మునె దునియతగ మనొన్. బతి వీర్ దునియతగన్ మంతెర్. నన నిహ్గ వాసెర్ మంతాన్. పవిత్ర వాలె బాబో బగవంత! మరట్ ఇంకె ఉంది ఆసి మత్తపె, వీర్ గిర్ ఉంది ఆసి మనల్, నిమె నాకున్ సీత నీవ పొరొల్త సక్తితె వీర్క్కున్ కాబాడ. ¹² నన ఇగె మనెకె, నాకున్ సీతి వూర్క్కున్ నీ పొరొల్త సక్తితె కాబాడ్తాన్. దర్మ-గ్రంతన వచన్ పూరె మానల్ నాసెడమ్ ఆయ్యల్ బోరై మత్తారొ, వోరె నాసెడమ్ ఆతార్. ¹³ ఇంకె నన నిహ్గ వాసెర్ మంతాన్. నావ ఆనంద్ వూర్గ బర్చుర్ ఆయన ఇంజెరెన్, నన ఇద్ దునియతగ మనెకెన్, ఇవ్ గొస్టింగ్ వెహ్చార్ మంతాన్. ¹⁴ నీవ వచన్ వూర్క్కున్ వెహ్చాన్. నన ఇద్ దునియతాన ఆయెన్. అహ్నె వూర్ గిర్ ఇద్ దునియతుర్ ఆయ్య కాడ్కి, ఇద్ దునియతుర్ వూర్క్కున్ మెచుర్. ¹⁵ ఇద్ దునియతల్ వీర్క్కున్ వోమ్ ఇంజెర్ నీకున్ పార్తన కీసెర్ సెలొన్. బతి సయ్యన్ ఇన్వల్ కరెబనగటల్ వీర్క్కున్ కాబాడ ఇంజెర్ పార్తన కీసెర్ మంతాన్. ¹⁶ నన దునియతాన బహన్తె ఆయెనొ, అహ్నె వూర్ గిరె ఇద్ దునియతుర్ ఆయుర్. ¹⁷ నీవయ్ గొస్టి సతెమ్ ఆంద్. అద్ సత్తె నీవ సేవ కియ్యె, వూర్క్కున్ అలగ్ కీమ్. ¹⁸ నిమె నాకున్ బద్ తీర్దె దునియతగ రొహ్తయె, అదె తీర్దె నన వూర్క్కున్ దునియతగ రొహ్తాన్. ¹⁹ నావ నన అర్చన ఆయ్యడున్ హిందల్, వూర్ కరల్ పవిత్ర ఆసి, నీవ సేవ కియన ఇన్వలె నావ ఇచ.

యేసు సమ్మిర్ బక్తలిర్ సాటి పార్తన కియ్యల్

²⁰ “నన సిరిప్ వీర్ సిస్యలిర్ సాటినె ఆయె బతి, వీర గొస్టి కేంచి బోర్-బోరై నా పొరొ బరోస ఇరంతెరొ, వూర్ సమ్మిర్ సాటి పార్తన కీసెర్ మంతాన్. ²¹ యే బాబ! నన నిహ్గ, నిమె నహ్గ బహన్ ఉంది ఆసి మంతటొ, అహ్నె బరోస కియ్యలిర్ వూర్ సమ్మిర్ గిర్ ఉంది ఆసి మందన ఇంజెర్ పార్తన కీసెర్ మంతాన్. నిమె నాకున్ రొహ్తా ఇంజెర్ దునియతుర్ కరి కియన ఇత్తెకె, వూర్క్కున్ మహ్గ మీరి కీమ్. ²²⁻²³ నిమె నహ్గ మంతి. నన నిహ్గ మంతాన్. నాకున్ సీతి అద్ మయ్యతున్

వూర్క్కున్ సీతాన్. మరట్ ఇంకె ఉంది ఆసి మత్తపె, వూర్ గిర్ ఉంది ఆసి మందన. అస్కెన్ నిమె నాకున్ సారి కీతి ఇంజెర్ అని నాకున్ లాడ్ కీతపె, వూర్క్కున్ కీసెర్ మంతి ఇంజెర్ దునియతుర్ కరి కీంతెర్.

²⁴ “బాబ! నిమె నాకున్ సీతి వూర్, నా బరొబర్ మంజెర్, నాక్ సీత మయ్యతున్ వూర్ సూడన ఇంజెర్ కోర్సెర్ మంతాన్. బారితెకె, కలి గడె మాయ్క్ మునెతలె నాకున్ లాడ్ కీతి. ²⁵ నియత్నార్ బాబ! దునియతుర్ నీకున్ కరి కీసెర్ సెలుర్ బతి, నన కరి కీతాన్. నిమెయ్ నాకున్ రొప్తా ఇంజెర్, వీర్ సిస్యలిర్ కరి కీతెర్. ²⁶ నిమె బోని ఇన్వల్ వూర్క్కున్ తొప్పారెన్ మంతాన్ అని ఉండె వెలె తొహంతాన్. నాకున్ నిమె లాడ్ కీతి. అప్పా వూర్ గిర్ నాకున్ పెర్మ కియన అని వూరంగ్ దిల్క్కునగ నన కుద్ మందన ఇన్వలె నావ ఇచ” ఇంజెర్ యేసు పార్తన కీతార్.

యేసున్ పియ్యి వోయ్యల్

18 యేసు పార్తన కీత పెజె, తన్వూర్ సిస్యలిర్ సంగ కెద్రొను లబ్ధిత లొదితున్ వీడ్చి సొత్తార్. అగ ఉంది వాడి మత్త. అద్ వాడిత్ రొపా తన అని వోనుర్ సిస్యలిర్ నేంగెర్. ² యేసు తన్వూర్ సిస్యలిర్ సంగ వెలెన్ జోకంగ్ అగ సొంజి మత్తార్. అదెన్ సాటి, యేసున్ దుస్రుర కెయ్దె హల్లి కీసి, దోక సియ్యల్ యూదన్ గిర్, అద్ వాడి టావ మత్త. ³ డగుక్ కటొడలిర్ అని పరిసయ్యల్క్ కహితుర్క్కున్ ఆచ్చి, యూదన్ సంగ సారి కీతెర్. వూర్ బూర్ బూర్ ఇత్తెకె, యూదల్, కహితుర్ సిపాయిర్ అని మందిర్తగ కేప్పలిర్. వూర్ డిప్లింగ్, కందిల్క్ అని ఆయ్తర్క్ పియ్యి వాతెర్. ⁴ తనకున్ మునె బతల్ జర్గల్ మంత ఇన్వల్ యేసు కరి కీత కాడ్చి, వూర్గ సొంజి, “బోన్ సాటి మహ్కసెర్ మంతిట్?” ఇంజెర్ పూసి కీతార్. ⁵⁻⁶ అస్కె వూర్, “నజరేత్నార్ యేసున్ సాటి” ఇంజెర్ వెహ్తార్. తె యేసు, “ననయ్ వోన ఆందున్” ఇంజెర్ వెహ్తార్. అద్ గొస్తి కేంచి, దోక సియ్యల్ యూదన్ బరొబర్ వూర్ పెజె జర్గసి బూడ్ అర్తెర్. ⁷ ఉందుంది జోక యేసు, “బోన్ సాటి మహ్కసెర్ మంతిట్?” ఇంజెర్ పూసి కీతార్. తె వూర్, “నజరేత్నార్ యేసున్ సాటి” ఇంజెర్ వెహ్తార్. ⁸ తె యేసు, “ననయ్ వోన ఆందున్ ఇంజి, ఇదెన్ మునెనె వెహ్తాన్. మిరట్ నా సాటినె మహ్కసెర్ మత్త కాడ్చి, మెయ్యర్కున్ సొంద సీమ్మ” ఇంజెర్ వూర్క్కున్ వెహ్తార్. ⁹ బారితెకె, «నిమె నాకున్ సీతుర్గటల్ వొరొన్ గిర్ టూటి కియ్యకి» ఇంజెర్ తన వెహ్చి మత్త అద్ వచన్ పూరి కియ్దె, యేసు ఇహిన్ వెహ్తార్. ¹⁰ సీమొన్-పేతుర్గ ఉంది లామ్ రూసి మత్త. అదెనె పెర్సార్ కటొడనార్ మల్కు ఇన్వల్ సేవ్కన, తిన కెవితున్ తివుస్తార్. ¹¹ అస్కె యేసు, “నీవ రూసితున్ టోప్రతగ ఇర. బాబొ నాకున్ బోగె మామ్ ఇంజెర్ సీత గండమున్ బోగె మాయ్క్ మన్కయ్?” ఇంజెర్ పేతుర్తున్ ఇత్తార్. ¹² అస్కె వూర్ సిపాయిర్ అని వూరార్ అదికారి, యూదుల్కన మందిర్తగ కేప్పలిర్ యేసున్ పియ్యి, అన్నల్ ఇన్వల్ పెర్సార్ కటొడనగ మొదొల్ వోతెర్. ¹³ వోర్ అన్నల్ అద్ గట్కతె పెర్సార్ కటొడ-పాన్ కియ్యల్ కయపనార్ కాస్ మామల్ ఆందుర్. ¹⁴ «మా జాతితుర్ నాసెడమ్ ఆయ్యక్నె, వొరార్ మాయ్క్ పర్జత్ సాటి పరన్ సియ్యల్ చొకొట్టు గొస్తి ఆంద్»# ఇంజెర్ యూదుల్కున్ సూచన కీతార్ వోర్ కయపల్ వేరె ఆందుర్.

యేసు టావ సెలార్ ఇంజెర్ పేతురు లబడ్ వెహ్చల్

¹⁵ అహాన్ యేసున్ పియ్యి సొనెకె, సీమొన్-పేతురు అని ఉండె వొరార్ సిస్యల్ వూర్ పెజెయ్ సొత్తెర్. వోర్ సిస్యల్ పెర్సార్ కటొడన్ టావ మత్త కాడ్చి, యేసున్ బరొబర్ పెర్సార్ కటొడన రోత ఆప్రతున్ రొపా సొత్తార్. ¹⁶ బతి పేతురు పెర్సార్ కటొడన రోత పాటక్కుగ బహ్రి నిల్చి మత్తార్. అదెన్ సాటి, వోర్ సిస్యల్ పెజె మల్చి వాసి, పాటక్ కేప్పల్ పేడిన్ సంగ వడ్కొసి, పేతుర్తున్ రొపా వోతార్. ¹⁷ అద్ పాటక్కుగ కేప్పల్ పేడి, “వోనుర్ సిస్యలిర్గటల్ వొరొని ఆంది సెలెయ్?” ఇంజెర్ పేతుర్తున్ పూసి కీత. తె పేతురు, “నన ఆయొన్” ఇంజెర్ వెహ్తార్. ¹⁸ అద్ గట్కతె పీని మత్త కాడ్చి, సేవ్కలిర్ అని మందిర్తగ కేప్పలిర్ తడ్చి మాసి, పీని ఆర్సెర్ మత్తెర్. తె పేతురు గిర్ సొంజి, వూర్ బరొబర్ పీని ఆర్సెర్ మత్తార్.

పెర్సార్ కటాడల్ యేసున్ సవల్క్ పూసి కియ్యల్

¹⁹ అదె యేలతె పెర్సార్ కటాడల్ అన్నల్, వోనుర్ సిస్యలిర్ బారెతె అని వోన బోదతున్ బారెతె యేసున్ పూసి కీతార్. ²⁰ తె యేసు, “యూదుల్క్ మీరె మాయ్విక్ సునగోక్ష్కగ అని మందిర్తగ మన్వలిర్ సమ్మిర్ మునె కుల కుల బోద కీతాన్. మక్తితె బతయ్ బోద కియ్యకి. ²¹ ఇద్ సవల్ నాకున్ బారి పూసి కీంతి? నన బతల్ బోద కీతాన్ ఇన్వల్ కేంజ్జర్ వూర్క్కున్ పూసి కీమ్. ఇచుల! నన వెహ్త వీర్క్కున్ టావయె” ఇంజెర్ జవబ్ సీతార్. ²² యేసు అహన్ జవబ్ సీతార్ అస్కె, మందిర్తన్ కేప్వలిర్గటల్ కరుమ్ నిల్పి మన్వల్ వారార్, “వారార్ పెర్సార్ కటాడన్ అహన్ జవబ్ సీంతి కి?” ఇంజెర్ కొర్వితగ పాతార్. ²³ అస్కె యేసు, “నన బతయ్ తప్ వడ్కీతెకె వెహ. బరొబరె వడ్కీసి మత్తెకె బారి నాకున్ పాతి?” ఇంజెర్ మందిర్తగ కేప్వన్ పూసి కీతార్. ²⁴ అస్కె అన్నల్, దొహ్తంగ్ నోడెంగ్ రెహ్వాకీనె, ఇంకె మన్వల్ పెర్సార్ కటాడల్ కయపనగ యేసున్ రొహ్కార్.

పేతురు లబడ్ వెహ్త బరొబర్ గొగ్గి కూస్వల్

²⁵ సీమెన్-పేతురు తడ్మితగ పీని ఆర్నెర్ మనెకె, వూర్ సూడ్సి, “కరలెన్ వోనుర్ సిస్యలిర్గటల్ వారొని ఆంది సెలెయ్?” ఇంజెర్ ఇత్తెర్. తె పేతురు, “నన ఆయెన్. వోర్ నాకున్ టావ సెలె” ఇంజెర్ వూర్క్కున్ వెహ్కార్. ²⁶ బతి పేతురు బోనతె కెవితున్ కొయ్తెరొ, వోన చుటమ్మెర్ వారార్ పెర్సార్ కటాడనగ సేవ కీసెర్ మత్తార్. వోర్ సేవ్కల్, “యేసున్ సంగ వాడితగ మనెకె, నన నీకున్ సూడ్మకి కి బతల్?” ఇంజెర్ పేతుర్తన్ ఇత్తార్. ²⁷ అస్కె పేతురు, “నాకున్ టావ సెలె” ఇంజెర్ ఉండె ఉంది జోక వెహ్కార్. అస్కెనె గొగ్గి కూస్త.

గవర్నర్ పిలాతున్ మునె యేసు నిల్వల్

²⁸ అస్కె ఉజ్జె మాత పెజె, కయపనగటల్ యేసున్ వూర్ రోమ గవర్నర్త మహల్తగ వోతెర్. తమె అస్టె బస్టె ఆయ్య్కీనె పస్కు సడ్డ జేవున్ కియన ఇంజెర్, అద్ మహల్తన్ రొపా వూర్ నేంగ్మకి. ²⁹ తె పిలాతుయ్ బహి వాసి, “వేర్ మాయ్న్ పారొ బద్ కసుర్ వాట్సెర్ మంతిట్?” ఇంజెర్ పూసి కీతార్. ³⁰ అస్కె వూర్, “వేర్ తప్ కియ్యక్ ఇత్తెకె, నిహ్ బారి పియ్యి వాందుమ్?” ఇంజెర్ వెహ్కార్. ³¹⁻³² తె పిలాతు, “మిరటె వోన్ వోసి, మీవ దర్మత కానున్ పియ్యి తస్వ కీమ్ప్” ఇంజెర్ ఇత్తార్. అద్ కేంచి యూదుల్క్, “మీ మోడి దుస్రాన్ మరన్త సిక్స వాట్వల్ అదికార్ మాకున్ సెలె” ఇంజెర్ వెహ్కార్. అదెన్ హిందల్, యేసు బాతల్ మరన్ ఆయ్యల్ మంతార్ ఇన్వల్ గొస్తి పూరె మాత.

³³ అస్కె పిలాతు మహల్తగ రొపా సొంజి, యేసున్ కేయుసి, “నిమె యూదుల్క్నోర్ రాజని ఆంది కి?” ఇంజెర్ పూసి కీతార్. ³⁴ తె యేసు, “నిమెయ్ కుద్ ఇహిన్ ఇంతి కి? సెలెకె, దుస్రుర్ బోరె నా బారెతె నీకున్ వెహ్కార్?” ఇంజెర్ ఉల్ల పూసి కీతార్. ³⁵ అదెన్ సాటి పిలాతు, “నన యూదుల్క్న జాతితొన ఆందున్ కి బతల్? నీ లోకుర్ అని డగుక్ కటాడలిరె, నీకున్ నహ్ సారి కీతెర్. నిమె బతల్ కీతి?” ఇంజెర్ పూసి కీతార్. ³⁶ అస్కె యేసు, “నావ రాజ్ ఇద్ దునియతున్ బారెత ఆయె. ఉంది మోక నావ రాజ్ దునియతున్ బారెత ఆయ్మడ్ ఇత్తెకె, యూదుల్క్ నాకున్ పియ్యి వోయ్య్కీనె, నావుర్ సేవ్కలిర్ లడెయ్ కీందిర్. బతి నావ రాజ్ ఇగట ఆయె” ఇంజెర్ వెహ్కార్. ³⁷ అద్ కేంచి పిలాతు, “తె నిమె రాజని ఆంది కి?” ఇంజెర్ పూసి కీతార్. తె యేసు, “నిమెయ్ నాకున్ ‘రాజని ఆంది’ ఇంజెర్ ఇత్తి. ననతె సతున్ బారెతె గవ వెహ్లా జల్మ యేత్తాన్. ఇద్ కారన్తన్ హిందలె దునియతె వాతొన్. సతున్ పెర్మ కియ్యలిర్ నా గొస్తి కేంజంతెర్” ఇంజెర్ వెహ్కార్. ³⁸ తె పిలాతు, “సతెమ్ ఇత్తెకె బతల్?” ఇంజెర్ చేడి కీసెర్, పూసి కీతార్.

అని బహి మన్వలిర్ యూదుల్క్నగ సొంజి, “వోన్ నాకున్ బదె గల్తి దిసెర్ సెలె. ³⁹ బతి మీవ పస్కు సడ్ జర్గనెకె, నన జేల్గ అర్పి మన్వలిర్గటల్ వారొన్ సుటి కియ్యల్ రివజ్ తాక్సెర్ మంత. తె వేర్ యూదుల్క్నోర్ రాజన్ సుటి

కియ్యల్ మీకున్ ఇస్తమె కి?” ఇంజెర్ పూసి కీతార్. ⁴⁰ అస్కె వూర్ జోరై, “వోన్ వటిన్, బతి బరబన్ సుటి కీమ్” ఇంజెర్ కిలితెర్. వోర్ బరబల్ లూటి కీసి జేల్గ అర్పి మత్తార్ ఆందుర్.

యేసున్ మరన్త సిక్స వాట్సల్

19 అస్కె పిలాతు యేసున్ చాట్కొనె పాయుస్తార్. ² సిపాయిర్ చహ్కొన కాందతున్ కిరిటున్ దాత్ గీడి కీసి, యేసున తలదగ కెరుస్తార్. రాజల్ పోండ్వల్ సాయ్ రంగ్గు పాంగుడ్ వోన్ పోండుస్తార్. ³ అహన్ పోండుస్త పెజె వోన్ కరుమ్ వాసి, “యూదుల్కొనార్ రాజ! నీకున్ జెయ్ జెయ్ కార్” ఇంజెర్ తాప్తంగ్ పాతెర్.

⁴ పిలాతు ఉందుంది జోక బహి పెసిసి, “వేన్ మీ మునె తరంతాన్. బతి కేంజట్! వేన్ సిక్స వాట్సల్, నాకున్ బదె గల్తి దిసెర్ సెలె” ఇంజెర్ వెహ్తార్. ⁵ యేసున్, చహ్కొన కిరిట్ అని అద్ రగల్ రంగ్గు పాంగుడ్ పోండుసి, బహి తత్తెర్. అస్కె పిలాతు, “ఇచుల! వేర్ మాయ్ సూడట్!” ఇంజెర్ ఇత్తార్. ⁶ యేసున్ సూడ్సి, వూర్ డగుక్ కటొడలిర్ అని మందిర్తగ కేప్వలిర్, “వోన్ మొద్దుగ మోలనె పాసి జకన! వోన్ జకన!” ఇంజెర్ కిలితెర్. తె పిలాతు, “వేన్ నాకున్ బదె గల్తి దిసెర్ సెలె. అదెన్ సాటి మిరటె వేన్ మొద్దుగ మోలనె పాసి జకట్” ఇంజెర్ వెహ్తార్. ⁷ అద్ కేంచి, వూర్ యూదుల్కొన, “మాకున్ ఉంది కానున్ మంత. బగవంతనోర్ మరిన ఆందున్ ఇంజెర్ వేర్ ఇత్త కాడ్కి, మావ కానున్తున్ పియ్యి వేర్ తప్పక్ సాయ లాగర్” ఇంజెర్ వెహ్తార్. ⁸ అద్ కేంచి, పిలాతు బెయ్ వెరితార్.

⁹ అని యేసున్ మహల్తున్ రొపా వోసి పిలాతు, “నిమె బగటల్ వాతి?” ఇంజెర్ పూసి కీతార్. బతి యేసు జవబ్ సియ్యకి. ¹⁰ తె పిలాతు, “నిమె నా సంగ బారి వడ్కివి? నీకున్ సుటి కియుస్టె అని మొద్దుగ మోలనె పాసి జకుస్టె గిర్ నాకున్ అదికార్ మంత” ఇంజెర్ యేసున్ వెహ్తార్. ¹¹ అస్కె యేసు, “పొరొ మన్వల్ బగవంతల్ సీసి మత్తెకె తప, నా పొరొ బదె అదికార్ నీకున్ సెలె. అదెన్ సాటి, నాకున్ నిహ్గ హల్లి కియుస్తార్ వోన్, బెయ్ పాప్ లాగంత” ఇంజెర్ వెహ్తార్.

¹² అస్కెడల్ పిలాతు, యేసున్ సుటి కియుసన ఇంజెర్ కోసిద్ కీతార్. బతి యూదుల్కొన, “తన రాజన ఇంజెర్ వెహ్తల్ హార్ మాయ్, మహ రాజన్ బయ్యున్ ఆతప్ ఆంత. ఉంది మోక వేన్ సుటి కీకితె, నిమె మహ రాజనోర్ దోస్తని ఆయ్యి” ఇంజెర్ కిలితెర్. ¹³ తె పిలాతు ఇవ్ గొస్టింగ్ కేంచి, యేసున్ బహి తత్తెర్. తస్వ కీనెకె ఉద్వల్ చవ్తారత్ పొరొడ కుర్పితగ ఉద్తార్. యూదుల్కొన* బాసతె అద్ జాగతున్, «గబ్బతా» ఇంతెర్. ¹⁴ అద్ పస్క సడ్డ తయిరి కియ్యల్ దివోస్ ఆంద్. అద్ వకత్తై బార్ దుపరి ఆసెర్ మత్త. తె పిలాతు, “ఇచుల! మీ రాజల్” ఇంజెర్ యూదుల్కొన వెహ్తార్. ¹⁵ అస్కె వూర్, “వోన్ జకనయె! వోన్ జకనయె! వోన్ మొద్దుగ మోలనె పాసి జకన” ఇంజెర్ కిలితెర్. తె పిలాతు, “మీ రాజన్ మొద్దుగ మోలనె పాసి బారి జకనయె ఇంతిట్?” ఇంజెర్ పూసి కీతార్. తె డగుక్ కటొడలిర్, “మహ రాజల్ తప, మాకున్ దుస్రార్ బోరె రాజల్ సెలార్” ఇంజెర్ వెహ్తార్. ¹⁶ అస్కె పిలాతు, మొద్దుగ మోలనె పాసి జక్లె, వోన్ సిపాయిర కెయ్యె హల్లి కీతార్. తె వూర్ యేసున్ వోతెర్.

యేసున్ మొద్దుగ మోలనె పాసి జక్వల్

¹⁷ యేసు తస్వ మొద్ కాంచుకున్ తల-టోక్రై ఇన్వల్ జాగతగ సొత్తార్. యూదుల్కొన బాసతె ఇదెన్, «గొల్గొత» ఇంతెర్. ¹⁸ అగ నడ్డుమ్మ మొద్దుగ యేసున్ మోలనె పాసి టాంగి కీతెర్. యేసున్ తిన బగ్ల వారొన్ అని డెమ బగ్ల వారొన్ మొద్కొనగ మోలనె పాసి టాంగి కీతెర్. ¹⁹ అస్కె పిలాతు, “నజరేత్సార్ యేసు యూదుల్కొనార్ రాజల్ ఆందుర్” ఇంజెర్ చెకతగ* లిహి కియుసి, యేసున్ టాంగి కీసి మన్వల్ మొద్దుగ పాయుస్తార్. ²⁰ యేసున్ మొద్దుగ టాంగి కీత జాగ నగుడున్ కరుమ్ మత్త. అద్ పాటితగ హెబ్రి, లాటిన్ అని గ్రీకు బాసనె* లిహి కియుస్త కాడ్కి, సడ్డున్ సాటి వాతుర్ వెలేటిర్ యూదుల్కొన వాచి కియ పరైర్. ²¹ అస్కె డగుక్ కటొడలిర్, “యూదుల్కొనార్ రాజల్ ఆయె బతి,

* 19:13 యూదుల్కొన హెబ్రి అని అరమిక్ బాసంగ్ వడ్కిన్దిర్. * 19:19 బదె తప్ కీతార్ వోర్ సాప్తె మాతెకె, వోర్ ఉంది మొద్ కాంచి వోయ లాగర్. అస్కె వోన్ మునె వోర్ బతల్ తప్ కీతార్ అదెన సూచన లిహి కీసి మందంత. అద్ వాచి కీతుర్ వోన్ బతతున్ సాటి మొద్దుగ మోలనె టాంగి కీసి పరన్ యేత్వలిర్ మంతెరా కరి కీంతెర్. * 19:20 వెలేటిర్ యూదుల్కొన ఇవ్ బాసనల్ ఉందితెర్ బాస వాచి కియ పర్దిర్.

‘నన యూదుల్కనార్ రాజన ఇత్తార్’ ఇంజి లిహి కియుసట్” ఇంజెర్ పిలాతునగ సొంజి వెహ్తార్. ²² అస్కె పిలాతు, “లిహి కియుస్తాన్ అగ, లిహి కియుస్తాన్ అహ్నె మని” ఇంజెర్ ఇత్తార్.

²³ యేసున్ సిపాయిర్ మొద్దుగ మోలనె పాత పెజె, వోనంగ్ పాంగుక్ వారాన్ వారాన్ ఉంది ఈస వానల్ నాలుంగ్ ఈసంగ్ కీసి తూస్తె. పొరొడ కమిసున్* గిర్ యేత్తెర్. అద్ కమిస్ కొట్టక్నె లామ్ మత్త. ²⁴ తె సిపాయిర్, “ఇదెన్ సరుస్వట్. బోన పొరొల్ పెసితెకె వోరె యేతన” ఇంజెర్ చిటింగ్ వాడ్తెర్. “వూర్ నావంగ్ కష్టిన్ ఈసంగ్ కీసి తూసి, నావ కమిసున్ యేత్తె, చిటింగ్# వాటంతె” ఇంజెర్ దర్మ-గ్రంతనగ లిహి కీత వచన్ పూరి మాయ్లెనె, ఇహిన్ జర్గిత. అదెన్ సాటినె సిపాయిర్ ఇహిన్ కీతెర్.

²⁵ యేసున్ మోలనె పాత మొదున్ కరుమ్, యేసున అవల్, వోన కాకి, క్లాపన బాయ్కు మరియల్ అని మగ్గలేనె నాట్న మరియల్ నిల్చి మత్తంగ్. ²⁶ యేసు తన్వ అవల్ అని తన్వోర్ లాడ్వోర్ సిస్యల్ కరుమ్ నిల్చి మన్వల్ సూడ్సి, “బెయె ఇమల! నీవోర్ మరి” ఇంజెర్ వెహ్తార్. ²⁷ అని వోర్ సిస్యనెకె సూడ్సి, “ఇమల! నీవ అవల్” ఇంజెర్ వెహ్తార్. అద్ గట్కతల్ తాన్ తన్వ రోన్ వోసి కాస అవన్ దాత్ సూడ్తార్.

యేసు తన్వ పరన్ సుటి కియ్యల్

²⁸ అద్ ఆత పెజె, తన వాత కామ్ సమ్మె మార్త ఇంజెర్ కరి కీసి, దర్మ-గ్రంతనగ లిహి కీత అద్ జర్గితె, “నాకున్ వట్కు వస్త”# ఇంజెర్ యేసు ఇత్తార్. ²⁹ అగ పులిత ఆంగుర్ రస నిహి ఉంది బుడ్డి మత్త. తె వూర్ తాన్గ దూది నహి, హిస్సాప్ మరత కాందతగ తటుస్తెర్ అని యేసున తొడ్డగ అందుస్తెర్. ³⁰ అస్కె యేసు, అద్ రసత సవద్ సూడ్సి, “నన వాత కామ్ మహ్తాన్” ఇంజెర్ తల వరుసి, తన్వ పరన్ సుటి కీతార్.

³¹ అద్ పస్క సడ్డ తయరి కియ్యల్ దివోస్ ఆంద్. దుస్రా నేటి, బెయ్ నేకిత ఆరమ్మ దివోస్* మత్త కాడ్కి, అవ్ మేందొల్క్ మొద్దున్ పొరొ టాంగె మాసి మన్వల్ యూదుల్కున్ ఇస్టమ్ సెలె. అదెన్ సాటి, “వూరంగ్ కాల్క్ ఉరుసి,* అవ్ మేందొల్కున్ బూడ్ రెహుస” ఇంజెర్ పిలాతున్ పూసి కీతెర్. ³² తె సిపాయిర్ వాసి, యేసున్ బరొబర్ మొద్క్నగ టాంగి కీసి మన్వలిర్ ఇవిరంగై కాల్క్ ఉరుస్తెర్. ³³ బతి వూర్ యేసునగ వాసి, అదెన్ మునెనె వోర్ సాసి మత్త సూడ్సి, వోనంగ్ కాల్క్ ఉరుస్మకి. ³⁴ బతి వూర్గటల్ వారొర్ సిపాయి యేసున డొకతున్ గొర్కతె కొట్తార్. యెంటనె నెతుర్ అరిక్ యేర్ పొంగ్. ³⁵ మిరట్ గిర్ బరొస ఇర్వల్, ఇద్ సూడ్తార్ వోర్ గవ వెహ్తార్. వోన గవ కరల్ ఆంద్. వోర్ సతెమ్ వెహ్చార్ మంతార్ ఇంజెర్ వోన్ టావ. ³⁶⁻³⁷ “వోనంగ్ బొకనల్ ఉంది బొక గిర్ ఉర్నొంగ్”# అని ఉండె ఉంది జాగ, “వోన్ కొట్టూర్ వూర్ వోన్ బాజ్ సూడంతె”# ఇంజెర్ దర్మ-గ్రంతనగ లిహి కీసి మత్తంగ్ అవ్, గొస్టింగ్ పూరి మాయ్లెనె ఇహిన్ జర్గిత.

యేసున కూర్దున్ నారిత బండత బుయరితగ ఇర్వల్

³⁸ అరిమతయ చహర్తార్ యోసెప్ ఇన్వల్ యూదుల్కన వెరెతె, యేసున బక్తి మక్తికె కీందుర్. బతి ఇంకె పిలాతునగ సొంజి, “యేసున కూర్దున్ వోయ సీమ్” ఇంజెర్ పూసి కీతార్. తె పిలాతు వొప్త కాడ్కి, యేసున కూర్దున్ వోతార్. ³⁹ వేర్ యోసెపున్ సంగ ఉంది దియ రాత్నె యేసునగ వాసి, బేటె మాయ్వల్ నికొదేమ్ గిర్ మత్తార్. నికొదేమ్ తన్వ సంగ లగ్-బగ్ తీస సియుంగ్ (35) కిలొంగ్ బోలమ్ అని అగర్ ఇన్వలిక్ గమ గమ గాడి సియ్యలిక్ చీజ్క్ కూర్దున్ సోక్తె

* 19:23 తొలె ఈతంగ్ లామ్ కమిస్కున్ కొట్టక్నె తయర్ కీందిర్. * 19:31 ఆరమ్మ దివోస్ యూదుల్కన ఆరమ్మ దివోస్ సుకుర్ వార్ పొడెక్నల్ సురు ఆంత అని సన్వర్ పొడెక్ మారంత. తె వూర నేకితున్ పియ్ని అద్ దివొన్నగ బోనయ్ కూర్ మాతి కియ్యక్నె బహి మన్వ. అదెన్ సాటి అద్ కామ్ వెయ్యె కియ్యల్ మత్త. * 19:31 మొద్దుగ మోలనె పాసి టాంగె మాసి మన్వల్ తన్వంగ్ కాల్కున్ అహ్ని నేస్క పరంతార్. బతి బస్కతె వోనంగ్ కాల్క్ ఉరుసంతెరొ, అస్కె నేస్క వాయ్ కాడ్కి, వెయ్యె పరన్ సుటి కీంతార్.

19:24 కీర్తన్స్ 22:18 # 19:28 కీర్తన్స్ 69:21 # 19:36-37 బహి పెసివల్ 12:46; ఇసాబ్బ 9:12; కీర్తన్స్ 34:20
19:36-37 జెకర్వ 12:10

తత్తార్. ⁴⁰ ఇవ్ చీజ్కన్ వూర్ ఇవిర్ ఆసి, యూదుల్కన నేకి తీర్ యేసున కూర్దున్ సోక్తర్ అని అద్ కూర్దున్ బారిత పూన కాది కపిడె గూండి కీతెర్. ⁴¹ యేసున్ మొద్దుగ మోలెన్ పాసి టాంగి కీత జాగతగ ఉంది వాడి మత్త. అగ ఉంది నార్కుసీత బండత పూన వీచ్చ బుయిరి మత్త. అస్కె వేరి, అదెనగ బదె కూర్దున్ ఇర్మకి. ⁴² అద్ నేటి యూదుల్కన పస్క సడ్డ తయిరి కియ్యల్ మత్త కాడ్కి, లహ్క వర్సి యేసున కూర్దున్ అద్ కరుమ్ మన్వల్ బుయిరితగన్ ఇర్తెర్.*

యేసు సాసి-నేండ్యల్

20 వారమ్మ మొదొడ దివోస్ ఆయ్త్వర్తున్ నేటి సక్రె బయ్ బయ్ ఆనెకెన్ మగ్దలేనె నాట్న మరియల్ యేసున కూర్ ఇర్త బుయిరితగ సొత్త. తె అద్ బుయిరితున్ అడ్డమ్ ఇర్త బండ కూడుసి దిస్త. ² అదెన్ సాటి, అద్ మరియల్, సీమోన్-పేతుర్తగ అని యేసు లాడ్ కియ్యల్ ఉండె వొరొర్ సిస్యనగ విచ్చెర్ సొంజి, “పర్బున కూర్దున్ అద్ వీచ్చ బుయిరితల్ బూరెయ్ వోసి, బగ ఇర్తెరెయ్ మాకున్ టావ సెలె” ఇంజెర్ వెప్తా. ³ తె పేతురు అని వోన్ సంగ మన్వల్ సిస్యల్ బుయిరితగ సూడ్లె పెసితెర్. ⁴ వూర్ ఇవిర్ మీరె మాసి విచ్చెర్ మనెకె, వోర్ సిస్యల్ పేతుర్తున్ తెర్ మునె విచ్చెర్ సొంజి, వీచ్చ బుయిరితగ యెవ్తార్. ⁵ అని బహిడలె వరిసి సూడ్లార్. తె అగ సిరిప్ కూర్దున్ గూండి కీతంగ్ కష్టింగ్ వోన్ దిస్తంగ్. బతి వోర్ రొపా నేంగ్కె. ⁶⁻⁷ అస్కెన్ సీమోన్-పేతురు అగ యెచ్చి, రొపా వీచ్చ బుయిరితగ నేంగ్కార్. కూర్దున్ గూండి కీతంగ్ కష్టింగ్ అగ మత్తంగ్. యేసున తలతున్ గూండి కీత కష్టి గడి కీసి, మెయ్త్తంగ్ కష్టినల్ అలది మన్వల్ సూడ్లార్. ⁸ అస్కె వీచ్చగ మొదొల్ యెవ్తార్ వోర్ సిస్యల్ రొపా నేంగ్కి, సూడ్సి బరొస కీతార్. ⁹ అస్కె గిర్, “కిరిస్తు సాసి తప్పక్ నేండంతోర్” ఇంజెర్ దర్మ-గ్రంత్నగ మన్వల్ గొస్తి వూర్కున్ అర్తమ్ ఆయ్లెకె మత్త. ¹⁰ అస్కె వూర్ ఇవిర్ మల్సి, తమ్మింగ సొత్తెర్.

యేసు మగ్దలేనె నాట్న మరియన్ దిస్వల్

¹¹ బతి మగ్దలేనె నాట్న మరియల్ బుయిరితున్ బహి నిల్సి ఆడ్సెర్ మత్త. అహన్ ఆడ్సెర్ బహిడలె వరిసి సూడ్ల. ¹² అస్కె బెయ్ ద్రవలిక్ కష్టింగ్ పోండ్తుర్ ఇవిర్ బగవంతనుర్ దూతలిర్ దిస్తెర్. వూర్ యేసున కూర్ మత్త అద్ జాగతగ తలవడ్డ వొరొర్ అని కాల్యడ వొరొర్ ఉచ్చి మత్తెర్. ¹³ వూర్, “బాయి! బారి ఆడంతి?” ఇంజెర్ తాన్ పూసి కీతెర్. తె అద్, “పర్బున కూర్దున్ బుయిరితల్ బూరెయ్ వోసి, బగ ఇర్తెరెయ్ నాకున్ టావ సెలె” ఇంజెర్ మరియల్ వెప్తా. ¹⁴ అహన్ వెచ్చి, పెజె తిరిత. అస్కె యేసు నిల్సి మన్వల్ సూడ్ల బతి, వోరె యేసు ఇంజెర్ వొడ్కె మాయ్మకి. ¹⁵ అస్కె యేసు, “బాయి బారి ఆడంతి? అని బోన్ సాటి మహ్మసెర్ మంతి?” ఇంజెర్ పూసి కీతార్. తె మరియల్, వోన్ వాడితగ మన్వల్ గడియల్ ఇంజెర్ సమ్మె మాసి, “దాద! నిమె పర్బున కూర్దున్ వోసి మంద్కితె, బగ ఇర్తియో వెహ. నన సొంజి కూర్దున్ వోంతోన్” ఇంజెర్ పూసి కీత. ¹⁶ తె యేసు, “మరియ!” ఇంజెర్ తాన్ కేయ్త్తెర్. అస్కె మరియల్ వోన్ బాజున్ మల్సి హెత్రి బాసతె, “రబుని!” ఇంజెర్ కేయ్త్తె. «బోద గురు» ఇంజెర్ ఇదెన అర్తమ్. ¹⁷ యేసు తాన్ సంగ, “నన పొరొ బాబొనగ సొంద లాగర్. నాకున్ పియ్సి మన్మ. బతి నా తమ్ముక్కుగ సొంజి, ‘నా బాబొయె మీ బాబొ ఆందుర్. నా బగవంతలె మీ బగవంతల్ ఆందుర్. పొరొ బగవంతనగ నన సొంజెర్ మంతోన్’ ఇంజెర్ వూర్కున్ వెహ” ఇంజి తాన్ వెహ్తార్. ¹⁸ తె మగ్దలేనె నాట్న మరియల్ సిస్యలింగ సొంజి, “నన పర్బున్ సూడ్లెన్. పర్బు మీకున్ ఇవ్ గొస్టింగ్ వెహ ఇత్తోర్” ఇంజెర్ సిస్యలిర్కున్ వెహ్తా.

¹⁹ అంటిత్తె.* పోద్రెక్ సిస్యలిర్ యూదుల్కనుర్ అదికారిర్కున్ వెరిసి, తమె మీరె మాసి మత్త రోతంగ్ కావక్ కెచ్చి, గొల్స్ వాట్సి రొపా మత్తెర్. అస్కె యేసు వూర్ నడ్డుమ్ పావె మాసి, “మీకున్ సొంతి వాయి” ఇంజెర్ వెహ్తార్. ²⁰ అహన్ వెహ్తా పెజె, తన్వంగ్ కెయ్త్తున్ అని డొకతున్ తొహ్తార్. తె వూర్ సిస్యలిర్ పర్బున్ వొడ్కి పియ్సి, వెలె ఆనంద్

* 19:42 యూదుల్కన ఆరమ్మ దివోస్ సుకుర్ వార్ పోద్రెక్నల్ సురు ఆంత అని సన్వర్ పోద్రెక్ మారంత. తె వూర్ నేకితున్ పియ్సి అద్ దివోస్కుగ బోనయ్ కూర్ మాతి కియ్యకెనె బహి మన్వ. అదెన్ సాటి అద్ కామ్ వెయ్లె కియ్యల్ మత్త. * 20:19 యూద దర్మత నేకితున్ పియ్సి, సనివార్తున్ ఆరమ్మ దివోస్ ఇంతెర్. అద్ వారమున్ అద్ సనివార్ ఆక్రిత దివోస్. ఆయ్త్వర్ పూన వారమ్మ మొదొడ దియ్ ఆంత.

యేత్తైర్. ²¹ అస్కె యేసు ఉండె ఉంది జోక, “మీకున్ సాంతి వాయి! బాబొ నాకున్ దునియతగ రొహ్తా తీర్, నన గిర్ మీకున్ దునియతె రొహంతోన్” ఇంజెర్ సిస్యలిర్కున్ వెహ్తార్. ²² ఇహిన్ వెహ్చి, “పవిత్ర ఆత్మ యేతట్” ఇంజెర్ వూర్ పొరొ హూకుర్ ఉహ్కొత్తార్. ^{# 23} అని “మిరట్ బోనంగ్ పామ్కెతె మాపి కీంతిటొ, వూర్కున్ మాపి పుటంత. బోనంగ్ పామ్కెతె మాపి కియ్యిటొ, వూర్కున్ మాపి పుటొ” ఇంజెర్ వెహ్తార్.

యేసు తోమన్ దిస్వల్

²⁴ యేసు వాసి మత్తార్ అస్కె, బార జన్క్ సిస్యలిర్గటల్ యేమల్ ఇన్వల్ తోమల్ సెలె మత్తార్. ²⁵ అదెన్ సాటి సిస్యలిర్, “మమెట్ పర్బున్ సూడ్తామ్!” ఇంజెర్ తోమన్ వెహ్తార్. బతి తోమల్, “నన కుద్ పర్బునంగ్ కెయ్కెనగ మోలనె పాతంగ్ అవ్ గద్దెన్ సూడ్చి, అవెనగ బొటనె ఇట బీగర్ అని గొర్కతె కొట్ట డొకతగ కెయ్ ఇర బీగర్, నన నమ్మెన్ ఇత్తెకె నమ్మెన్” ఇంజెర్ ఇత్తార్.

²⁶ అహన్ ఇంజి ఆట్ రోజ్క్ ఆత పెజె, తోమల్ అని మెయ్తర్ సిస్యలిర్ ఉంది రోన్ కావడ్ కెహ్చి, గొల్చ వాట్చి మత్తార్. తెర్ బతి, యేసు వూర్గ పావె మాతార్. అని “మీకున్ సాంతి వాయి!” ఇంజెర్ ఇత్తార్. ²⁷ అహన్ ఇత్త పెజె తోమన్, “నీవంగ్ బొటనె నా కెయ్కున్ ఇట్చి సూడ. అని నీవ కెయ్ చహ్చి, నా డొకతగ ఇర్చి, బరొస సెలొర్ వోన్ మోడి ఆయ్కెనె, బరొస వాలెని ఆసి మన్” ఇంజెర్ వెహ్తార్. ²⁸ అస్కె తోమల్, “హో, నా బగవంత! నా పర్బు!” ఇంజెర్ యేసున్ జవబ్ సీతార్. ²⁹ తె యేసు, “నిమె నాకున్ సూడ్చి బరొస కీతి. సూడ్చెనె బరొస కియ్కెలిర్కున్ వెలె ఆసిర్వాద్కొ పుటంతంగ్” ఇంజెర్ తోమన్ వెహ్తార్.

ఇద్ పుస్తకెన బావ్

³⁰ ఇవె ఆయ్చ, యేసు సిస్యలిర్ మునె దుస్రాక్ వెలె మయ్మతంగ్ కామ్కె కీతార్. అవెన్ ఇద్ పుస్తకెనగ లిహి కియ్కె. ³¹ బతి యేసుయె, బచి కియ్కెల్ కిరిస్తు* అని వోరె బగవంతనొర్ మరి ఆందుర్ ఇంజి నమ్మిట్తె, బస్కెట్ పిస్వల్ జిన్గి మీకున్ పుటన ఇంజెరెన్, ఇవ్ గొస్టింగ్ లిహి కియ్కెల్ జర్తె.

యేసు యేడ్వర్ సిస్యలిర్కున్ దిస్వల్

21 అద్ ఆత పెజె, యేసు ఉండె ఉంది జోక గలిలయ సమ్మర్త* డర్దితగ సిస్యలిర్కున్ ఇద్ తరికతె దిస్తార్. ² సీమెన్-పేతురు, యేమల్ ఇన్వల్ తోమల్, గలిలయ యేరియత కాన చహర్తార్ నతనియేల్, జెబెదయినుర్ మర్క్ అని యేసునుర్ సిస్యలిర్గటల్ ఉండె ఇవిర్ మీరె మాసి మత్తార్. ³ అస్కె సీమెన్-పేతురు, “నన మీన్క్ పియ్లె దాంతోన్” ఇంజెర్ వూర్కున్ వెహ్తార్. తె వూర్, “మమెట్ గిర్ నీ సంగ వాంతామ్” ఇంజెర్ ఇత్తార్. అని సాంజి రూకతగ ఉడతెర్ బతి, అద్ రాతున్ వూర్ బతంగె పియ్కె.

⁴ పోడ్డె పెసినెకె, యేసు డర్దితె నిల్చి మత్తార్ బతి, వూర్ సిస్యలిర్ వోన్ వొడ్కె మాయ్కె. ⁵ అస్కె యేసు, “దాదలిర్చిట్! తిన్లె మీన్క్ పియ్లె కి?” ఇంజెర్ వూసి కీతార్. తె వూర్ “పియ్కె” ఇంజెర్ వెహ్తార్. ⁶ తె యేసు, “రూకత తిన బగ్గ మీవ జార్ వాటట్. అస్కె మీన్క్ అరంతంగ్” ఇంజెర్ వెహ్తార్. తె వోర్ వెహ్తా తీర్ జార్ వాడ్తెర్. అస్కె బెయ్ వెలె మీన్క్ అర్తంగ్. తె అద్ జార్దున్ రూకత్ పొరొ తహ పర్కె. ⁷ అస్కె యేసు లాడ్ కియ్కెల్ సిస్యల్, “వోర్ పర్బు ఆందుర్!” ఇంజెర్ పేతుర్తున్ వెహ్తార్. తె అద్ గొస్టి కేంజ్ బరొబర్, వోర్ డూండ్కొల మత్త కాడ్కి, ఆంగ్ కెర్తార్ అని

* 20:31 బచి కియ్కెల్ కిరిస్తు హెబ్రి బాసతె మెసయల్ ఇంతెర్. ఇదెన అర్తమ్ పర్తతున్ బచి కియ్కె, బగవంతల్ నేమి కీసి, సారి కియ్కెల్ రాజల్. వేన్ సాటి యూదుల్క్ సూడ్చెర్ మత్తార్. * 21:1 తిబెరియ సమ్మర్ ఇంజెర్ గిర్ కేయంతెర్.

20:22 పుట్గడ్చి 2:7

డర్జితె సొన్లె సమ్మర్తగ డెయ్యెర్. ⁸మెయ్యర్ సిస్యలిర్ డర్జితల్ రండ్ నుహ్కా (200) కూటంగ్ లంగ్ మత్త కాడ్కి, మీన్స్ అర్చి మన్వల్ జార్ ఊమ్మెర్ అదె రూకతె వాతెర్.

⁹రూక డర్జితె యెవ్త పెజె, వూర్ రెయ్యెర్. అస్కె వూర్కున్ ఇచుంగ్ సారింగ్ అని గొకన్ పొరొ వాట్టి మన్వలిక్ మీన్స్ దిస్తంగ్. ¹⁰అస్కె యేసు, “మిరట్ ఇంకె పియ్యంగ్ మీన్స్ నగటల్ ఇచుంగ్ పియ్యి వరట్” ఇంజెర్ ఇత్తొర్. ¹¹తె సీమెన్-పేతురు రూకతగ సొంజి, నోడె పియ్యి యేతల్ జార్జున్ డర్జితె ఊమ్మెర్. అద్ జార్ నూట పనన్ మూంద్ (153) డగుక్ మీన్స్ నె నించి మత్త. తెర్ బతి అద్ జార్ సర్మకి. ¹²అస్కె యేసు, “వాసి తింట్!” ఇంజెర్ సిస్యలిర్ కున్ కేయ్యెర్. తె వోర్ పర్బు ఇంజి కరె మాత కాడ్కి, «నిమె బోని ఆంది?» ఇంజెర్ బోరె వోన్ పూసి కియ్యకి. ¹³తె యేసు సారింగ్ అని మీన్స్ వూర్కున్ తూసి సీతొర్. ¹⁴యేసు సాసి-నేండ్ర పెజె సిస్యలిర్ కున్ దిస్వల్ ఇద్ మూడవ జోక ఆంద్.

పేతుర్త బహ్కా మాత బరొసతున్ యేసు సుద్రి కియ్యల్

¹⁵వూర తిన్వల్ ఆత పెజె యేసు, “యోహాన్తొర్ మరి సీమెన్! వీర్గటల్ తెర్ అదిక్ నాకున్ పెర్మ కీంతి కి?” ఇంజెర్ సీమెన్-పేతుర్తన్ పూసి కీతొర్. తె “హో పర్బు! నన పెర్మ కీంతొన్ ఇంజి నీకున్ టావయె” ఇంజెర్ పేతురు ఇత్తొర్. తె యేసు, “నా గొరె పిలన చొకొట్-వాయుట్ సూడ”# ఇంజెర్ వెహ్తొర్. ¹⁶ఉండె ఉంది జోక యేసు, “యోహాన్తొర్ మరి సీమెన్! నాకున్ కరల్ పెర్మ కీంతి కి?” ఇంజెర్ పూసి కీతొర్. తె, “హో పర్బు! నన పెర్మ కీంతొన్ ఇంజి నీకున్ టావయె” ఇంజెర్ పేతురు ఇత్తొర్. తె యేసు, “నా గొరెన చొకొట్-వాయుట్ సూడ” ఇంజెర్ వెహ్తొర్. ¹⁷మూడవ జోక యేసు, “యోహాన్తొర్ మరి సీమెన్! నాకున్ కరల్ పెర్మ కీంతి కి?” ఇంజెర్ పూసి కీతొర్. «నాకున్ పెర్మ కీంతి కి?» ఇంజెర్ మూడవ జోక పూసి కీత కాడ్కి, పేతురు దుక్సతె, “హో పర్బు! మీకున్ సమ్మి టావయె. నన నీకున్ పెర్మ కీంతొన్ ఇంజెర్ గిర్ టావయె” ఇంజెర్ ఇత్తొర్. తె యేసు, “నా గొరెన చొకొట్-వాయుట్ సూడ” ఇంజెర్ పేతుర్తన్ వెహ్తొర్. ¹⁸అని “ఇద్ సతెమ్ ఆంద్. డియెని మనెకె నీవ నిమె నడి అబ్రి కీసి, నీకున్ పసంద్ వాత జాగతగ దాంతి. బతి బుడియని ఆత పెజె, నిమె కెయ్య్ చప్పి మనెకె, ఉండె వొరార్ నీకున్ దొప్పి, పసంద్ సెలె అద్ జాగతె వోంతొర్” ఇంజెర్ యేసు వెహ్తొర్. ¹⁹పేతురు బాతల్ మరన్ ఆసి, బగవంతన్ మయ్య తరంతొర్ ఇన్వల్ తొహ్లా, యేసు ఇహిన్ వెహ్తొర్. అహన్ వెహ్తొ పెజె, “నా బక్తి పియ్యి తాక” ఇంజెర్ ఇత్తొర్.

²⁰పస్క సడ్డ జేవున్ కీనెకె, పర్బునగ ఉండె ఇచుర్ కరుమ్ ఉర్నగె మాసెర్, «పర్బు! వోర్ బోర్ ఆందుర్?» ఇంజెర్ పూసి కీతొర్ వోర్, యేసు లాడ్ కియ్యల్ సిస్యల్, తమ్మ పెజెయ్ వాసెర్ పేతుర్తన్ దిస్తొర్. ²¹తె వోన్ సూడ్చి పేతురు, “పర్బు! వేన్ బతల్ జర్గంత?” ఇంజెర్ యేసున్ పూసి కీతొర్. ²²తె యేసు, “నన ఉందుంది జోక వానల్ వేరి, వోర్ మన్వల్ నాకున్ పసంద్ మత్తెకె, వోన్ బారెతె నీక్ బతల్ ఆయి. సిరిప్ నిమె నా బక్తి పియ్యి తాక” ఇంజెర్ పేతుర్తన్ వెహ్తొర్. ²³అదెన్ హిందల్, వోర్ సిస్యన మరన్ ఆయె ఇన్వల్ గొస్తి బక్తలిర్ నడ్డుమ్ కప్త. బతి యేసు లాడ్ కియ్యల్ సిస్యన్ బారెతె, అహన్ వెహ్కకి. సిరిప్, “నన ఉందుంది జోక వానల్ వేరి, వోర్ మన్వల్ నాకున్ పసంద్ మత్తెకె, వోన్ బారెతె నీక్ బతల్ ఆయి” ఇంజెర్ వెహ్తొర్.

ఆక్రిత గొస్తి

²⁴యేసు లాడ్ కియ్యల్ వేర్ సిస్యలె ఇవ్ గట్నన్ సూడ్చి, గవ వెహ్లా, ఇవ్ సమ్మెన్ లిహి కీతొర్. వేన గవ సతెమ్ ఇంజెర్ మాకున్ టావ. ²⁵యేసు బొమిత్ పొరొ కీతంగ్ కామ్మ ఉండె వెలె మంతంగ్. అవెనల్ హర్ ఉందితున్ పోడి కీసి లిహి కీతెకె, అవ్ పుస్తకున్ ఇర్లె, ఇద్ దునియత జాగ యెవొ ఇంజెర్ నన సోంచ్ కీంతొన్.

యాకొబ్

యాకొబ్ లిహి కీత చిటి

ఇద్ చిటితున్ బారెత గొస్తి

లిహి కీతాన పొరొల్: యాకొబ్

లిహి కీత సాల్: కిరిస్తు సకమ్ లగ్-బగ్ చాలిస్ సియునలై పనస్ (45-50) సాల్కున్ నడ్డుమ్ లిహి కియ్యల్ జర్గత. ముకె గొస్తి: అద్ గట్కతె యాకొబ్ ఇన్వల్ పొరొల్ వెలెటిర్కున్ మత్త. వీర్గటల్ వేర్ యాకొబ్ యేసునార్ తముర్ ఆందుర్. యేసు పిసి మనెకె, వేర్ యాకొబ్ వొన్ బరొస ఇర్మకి బతి, సాసి-నేండ్త పెజె, వోర్ యేసు కరలెన్ బగవంతనార్ మరి ఆందుర్ ఇంజెర్ సూడ్చి, కరి కీసి బరొస ఇర్మార్.

మరట్ తక్లిబ్కనంగ్ పరిక్సన్ వోర్చి మునె తాకైకె, బగవంతన్ పొరొ కరల్ బరొస మంత ఇన్వల్ దుస్రుర్కున్ కరె మాంత. చర్చితుర్ సంగ అని బహిడుర్ లోకుర్ సంగ మన్వల్ తరిక సూడ్చి, కరల్ బరొసతున్ బారెతె కరి కియ వచా. కియ్యలిక్ కామ్మ అని వడ్కెవలిక్ గొస్తిన్ హిందల్, కరల్ బరొస మంత కి సెలె ఇంజెర్ మాకున్ కరె మాంత. కరల్ బరొసతున్ బహన్ కరి కియన ఇన్వడున్ బారెతె ఇద్ చిటితగ మంత.

1 బగవంతల్ అని యేసు కిరిస్తు పర్బునార్ సేవ్కల్ యాకొబ్బ ఆందున్. దునియ పూరొ పగై మాసి మన్వలిర్ బగవంతనుర్ బక్తలిర్కున్* దండొస్ దొసి, ఇద్ చిటి లిహి కీసెర్ మంతొన్.

బరొస అని బుది-గియన్

²⁻³ నాపుర్ దాదలిర్-బాయిక్సిట్! మీకున్ తక్లిబ్క అని దుక్సంగ్ వాతెకె గిర్ మిరట్ వెలె ఆనందై మంట్. బరొసతె అవ్ తక్లిబ్క అని దుక్సన్ మెయ్యి మునె సొత్తెకె, మీకున్ ఉండె ఇచుర్ వోర్చవల్ గున్ అబ్బంత ఇంజెర్ మీకున్ టావయె. ⁴ మిరట్ వోర్చవల్ గున్తగ బడె మాసి గట్ ఆతెకెన్, చొకొటె బరొసతగ గట్ ఆసెర్ బే-కసుర్ వాలిర్ ఆయ పరంతిట్.

⁵ మిహ్గటల్ బోనె బుది-గియన్ సెల్వెకె వోర్ బగవంతన్ కోరన. అహన్ కోర్తార్ వోన్, రాంగి సియ్యక్నె కోర్తతున్ తెర్ అదిక్ సియ్యల్ బగవంతల్ ఆందుర్. ⁶ బతి బగవంతన్ కోర్వెకె, సీంతొరొ సియ్యెరొ ఇంజెర్ అనుమానమ్మ బరొసతె తల్ క్కట్. అనుమానమ్మె తల్కవల్ సమ్మర్తంగ్ హెల్వంగ్ బహన్ వడిదె తేదంతంగ్ అహన్ మందంతార్. ⁷⁻⁸ ఆతొర్ రండ్ తీర్కెనె సోంచ్ కియ్యల్ మాయ్తల్ తన్వ సర్దగ బస్కెన్ బరొబర్ తాక పరొర్. అదెన్ సాటి పర్బునగటల్ తనకున్ ఉండె బతయ్ పుట్టుడ్ మందర్ ఇంజెర్ ఆతొర్ ఆస కియ్య.

గరిబ్ అని దనెవంతల్

⁹ గరిబ్ బక్తలిర్ తమకున్ బగవంతల్ సీత డగుర్-పొన్దున్ పియ్యి, ఆనందై మంద లాగర్. ¹⁰ బతి దనెవంతలిర్ బక్తలిర్ తమకున్ బగవంతల్ సీత చుడుర్-పొన్దున్ పియ్యి, ఆనందై మంద లాగర్. బారితెకె పూర్ గిర్ జాడిత పుంగడున్

* 1:1 బగవంతనుర్ బక్తలిర్కున్ ఇత్తెకె, బార కాందనుర్ యూదుల్కన జాతితుర్ లోకుర్ ఇంజెర్ గ్రీకు బాసతె మంత.

దాత్ సాయ లాగర్. ¹¹ పోడ్డ్ పెసియంత, అద్ యెదితె జాడి వతంత ఇన్వల్ మాకున్ టావయె. జాడి పుంగడ సోబత రూప్ కరబ్ అంత. అహ్నె దనెవంతలిర్ బక్తలిర్ గిర్ తమ్వంగ్ కామ్మ కీసెర్, మనెకెన్ నాసెడమ్ అంతెర్.

కరబ్ గున్క్ బగవంతనల్ వాయెంగ్

¹² దుక్సంగ్ వానెకె అవెన్ వోర్చి మెయ్యి, మునె సొన్వలిర్ బక్తలిర్ ఆసిర్వాద్ యేతంతెర్. తనకున్ పెర్మ కియ్యలిర్కున్ బగవంతల్ వాగ్దన్ సీతార్ అద్ జీవత కిరిట్* దుక్సంగ్ వానెకె, బరొసతగ గట్ నిల్తుర్కున్ పుటంత. ¹³ బోనయ్ ఆయి కసుర్ కియన్ సాటి మన్ విత్తెకె, బగవంతలె నావ మన్దున్ వితుసెర్ మంతార్ ఇంజెర్ ఇన్వ. బారితెకె బగవంతల్ తన్వ మన్దున్ కసుర్ కియన్ సాటి వితుసార్ అని మీవ మన్దున్ ఆతల్ బుది పుటుసార్. ¹⁴ బతి హర్ మాయ్ తన్వ కసుర్ కియన్ ఇన్వల్ బుదితె, నియతున్ బహ్క మాసి కరబ్ అసతగ కోండె మాంతార్. ¹⁵ ఆతల్ కరబ్ అస పిండమున్ దాత్ బడె మాసి, పాప్ ఇన్వడున్ జల్మ సీంత. అద్ పాప్ బెర్సనచార్ బెర్సి, ఆత్మత సావ్దున్ జల్మ సీంత.

¹⁶ నావుర్ లాడ్దుర్ దాదలిర్-బాయిక్లిట్! మిరట్ పసె మాయ్. ¹⁷ హర్ ఉంది చొకొట్ అని పూరొ బర్పుర్ వాలె వస్తు, స్వర్గనగ మన్వల్ బగవంతనల్ వాసెర్ మంత. వోరె బాబొ హోబడగ వేడ్చి సియ్యలికున్ నిద్ది కీతార్. అవ్ వస్తున వేడ్చితె దడ్చి మారియంత, బతి బగవంతల్ బస్కెట్కె మారియెర్. ¹⁸ బగవంతల్ తన్వ సతె గొస్తితున్ హిందల్ తన నిద్ది కీత కలితగ మరట్ పంటత మొదొడ ఈసతున్ దాత్* మందన ఇంజెర్ మియెర్.

సతె గొస్తితున్ కేంచి అద్ గొస్తి తీర్ కామ్ కియ్యల్

¹⁹ నావుర్ లాడ్దుర్ దాదలిర్-బాయిక్లిట్! ఇద్ గొస్తితున్ కరి కీమ్. హర్ మాయ్ కేంజె తయర్ మందన అని వడ్కెనెకె సోంచ్ కీసి జోక్చి వడ్కన. వెయ్యె సోంగున్ వాయ్. ²⁰ బారితెకె మాయ్ సోంగ్ బగవంతల్ ఇచ కియ్యల్, నియత్త సరి తాకుస పరొ. ²¹ అదెన్ సాటినె మిహ్గ మన్వల్ కరబ్-పాన్దున్ అని బగడ్-నియతున్ సుటి కీసి తాకట్. మీవ మన్-దిల్తున్ రొపా బగవంతల్ ఇర్త అద్ గొస్తితున్ పియ్యి తాకట్. ఇద్ గొస్తి మీకున్ బచి కియ పరంత.

²² బగవంతన వచన్ సిరిప్ కేంజ్యలె ఆయె బతి, అద్ వచన్ వెహ్త తీర్ తాకన. అహన్ తాక్వెకె మీవ మిరట్ మోసెమ్ కీతుర్ అంతిట్. ²³⁻²⁴ బగవంతన గొస్తి కేంచి, అద్ గొస్తి తీర్ కియెర్ వోర్ మాయ్ ఆర్పతగ తన్వ మొకొమ్ సూడ్చి, తన బహన్ మంతారొ ఇన్వల్ బహి సాంజి, యెంటనె మరుంగ్వన్ దాత్ మందంతార్. ²⁵ బతి బగవంతన వచన్తున్ దిహన్తె సూడ్తెకె తాన్గ బతయ్ కమి సెలె. పర్జతున్ అద్ మోక్కొ సుటి కియ్యస పరంత. అదెన్ సాటి బోర్తె మాయ్ అద్ వచన్తున్ కేంచి, అద్ వెహ్త తీర్ కీంతారొ, అద్ వచన్తున్ వోర్ బస్కెన్ మర్చిగోర్. బతి అద్ వెహ్త తీర్ పిసంతార్. ఆతార్ మాయ్ బద్ కామ్ కీతెకె గిర్ బగవంతల్ వోన్ ఆసిర్వాద్ సీంతార్. ²⁶ బోర్తె తన్వ తనయ్ బక్తన ఇంజెర్ వెహ్చెర్, తన్వ వెంజెడున్ జరబ్బె ఇర పరొరొ, వోర్ తన్వ తనకున్ మోసెమ్ కియ్యల్ అంతార్. వోన బక్తి బతతునె కామి సియె. ²⁷ రాండె వెయ్యెకున్ అని పోసటి మరి-మియడున్ తక్లిబ్ మనెకె, వూర్కున్ మదత్ కియ్యల్ బక్తితునె బగవంతల్ కోర్సెర్ మంతార్. అహ్నె ఇద్ దునియత పాప్ తనకున్ తుండ్యక్నె సుదుడ్ మన్వల్ బక్తితున్ గిర్ బగవంతల్ కోర్సెర్ మంతార్. ఇహిన్ కల్లి సెల్వక్నె మన్వల్ బక్తియె కరల్ బక్తి అంద్.

మడుర్-పాన్దె సూడ్చ

2 నావుర్ దాదలిర్-బాయిక్లిట్! మయ్యతె జగ జగ మిడ్చెర్ మన్వల్, యేసు కిరిస్తు పర్బున్ పారొ బరొస ఇర్వలిర్ మిరట్, బోనె బేద్-బాన్దె సూడ్చట్. ² నమునతున్ వొరొర్ మాయ్ సోనెతంగ్ ముదంగ్ అని బారితంగ్ కష్టింగ్ కెర్చి అని ఉండె వొరొర్ మాక్తె మాతంగ్ కష్టింగ్ కెర్చి, మిరట్ మీరె మాయ్ రోతగ వాతెర్ ఇంటు. ³⁻⁴ అస్కె మిరట్

* 1:12 జీవత కిరిట్ ఇత్తెకె స్వర్గనగ బస్కెట్ మన్వల్ జీవ సెలెకె మోక్సెమ్. బగవంతనయ్ అంద్.

* 1:18 యూదుల్క్ పండుస్త పంటత మొదొడ ఈస

బారితంగ్ కష్టింగ్ కెర్చి సజె మాసి వాతొన్ సంగ, “దాద! నిమె ఇద్ చొకొట్టు కుర్చితగ ఉద” ఇంజెర్ వెప్పి, గరిబున్ సంగ, “నిమె అగ నిల సెలెకె ఇగె బూడ్ ఉద” ఇంజెర్ వెప్తాకె, మిరట్ బేద్-బావ్ తొప్పి, కరబ్ బుదితె తస్వ కీతుర్ ఆంతిట్.

⁵ నాపుర్ లాడ్సుర్ దాదలిర్-బాయిక్సిట్! ఇద్ గొస్టి కేంజట్. ఇదెన్ మునెన్ తనకున్ పెర్మతె బక్తి కియ్యలిర్కున్ తస్వ రాజ్ సీంతొన్ ఇంజెర్ బగవంతల్ వాగ్దన్ సీతొర్. అదెన్ సాటి బగవంతలె దునియతుర నదుడున్ మునె గరిబ్ మన్వలిర్కున్ బరొసతగ దనెవంతలిర్ కీంతొర్. అని వోరె తస్వ రాజ్ ఈస యేతన ఇంజెర్ పూర్కున్ నేమి కీతొర్. ⁶ మిరట్ వీర్ గరిబ్ లోకుర హిజత్ వోసెర్ మంతిట్. బతి మీ పొరొ అదికార్ తాకుసెర్, మీకున్ కోట్కొనగ* హల్లి కియ్యలిర్ వీర్ దనెవంతలిరె ఆందిర్ కి ఆయుర్? ఒహో, వీరె ఆందిర్! ⁷ మిరట్ బక్తి కియ్యల్ కిరిస్తున చొకొట్టు పొరొడున్ రెప్పి వడ్కొవలిర్ వీరె దనెవంతలిర్ ఆందిర్ కి ఆయుర్? ఒహో, వీరె ఆందిర్!

⁸ “నీవ నీకున్ పెర్మ కీతపె నీ ఆజు-బాజుతుర్కున్ గిర్ పెర్మ కియన” ఇన్వల్ దర్మ-గ్రంత్న ముకె హుకుమున్ మిరట్ పియ్యి తాక్తె, అద్ చొకొట్టుయ్ గొస్టి ఆంద్. ⁹ బతి ఉంది మోక మిరట్ బేద్-బావ్ తొప్పిట్తె, దర్మత కానున్తంగ్ హుకుమున్ పియ్యి బయ్యున్ ఆసి పాపిర్ ఆంతిట్. ¹⁰ బారితెకె బోరె ఆయి అద్ కానున్తగ మన్వలిక్ సమ్మె హుకుమున్ పియ్యి తాక్సెర్, ఉంది హుకుమున్ టూటి కీసి తాక్తె గిర్, వోర్ పూరొ దర్మత కానున్తంగ్ హుకుమున్ పియ్యి తాక్కి ఇన్వల్ బద్నమ్ ఆంతొర్. ¹¹ బారితెకె “పీర్ కియ్య” ఇంజెర్ వెహార్ వోరె, “బోనయ్ జీవ గిర్ యేత్వ” ఇంజెర్ వెహార్. అదెన్ సాటి వొరొర్ మాయ్నల్ పీర్ కియ్యెకె గిర్ ఉంది మోక బోనయ్ జీవ యేత్తెకె, వోర్ అద్ కానున్తంగ్ హుకుమున్ బయ్యున్ ఆసి తాక్తొర్ ఆంతొర్.

¹² అదెన్ సాటి మాకున్ మోక్తా సుటి కియ్యల్ కానున్తన్ పియ్యి, వడ్కొతతున్ హిందల్ అని కామ్ కీతతున్ హిందల్ బగవంతల్ తస్వ కియ్యల్ మంతొర్ ఇంజెర్ దిహన్తె తాకన. ¹³ బారితెకె దుస్రుర్ పొరొ దయ తొహుర్ పూర్కున్ బగవంతల్ తస్వ కీనెకె, వూర్ పొరొ గిర్ దయ తొహూర్. బతి బూరె దుస్రుర్ పొరొ దయ తొహంతెరొ, బగవంతల్ తస్వ కియన్ నేటి వూర్ వెలె సంతొస్ అని ఆనంద్మె మందంతెర్.

బరొస అని కామ్ కీసి తొహ్వాల్

¹⁴ నాపుర్ దాదలిర్-బాయిక్సిట్! “నాకున్ యేసు కిరిస్తున్ పొరొ బరొస మంత” ఇంజెర్ వొరొర్ మాయ్నల్ వెహార్ ఇంటు బతి, అద్ బరొస మత్త తీర్ కామ్ కియ్యెకె, ఆతల్ బరొస బతతునె కామి సియె. ఆతల్ బరొస మాయ్నన్ బచి కియ పరంత కి బతల్? బచి కియ పరొ. ¹⁵ నమునతున్ వొరొర్ దాదలె ఆయి, సెలెకె ఉంది బాయియ్ ఆయి, తిన్లె తిండి సెల్వక్ సెలెకె, పొండె కష్టింగ్ సెల్వక్ మత్తెర్ ఇంట్. ¹⁶ అస్కె మిరట్ వోర్ దాదన్ సెలెకె, అద్ బాయిన్ బతయ్ మదత్ కియ్యక్నె, వూర్ సంగ, “సాంతితె సాంజి, పెటిమెన్ తింటు అని మేందొల్-మెన్ కష్టింగ్ పొండట్. అస్కె మీకున్ గర్మి వాంత. ఇవ్ సమ్మె మీకున్ బగవంతల్ సీంతొర్” ఇంజెర్ సిరిప్ గొస్టినెన్ వెప్తాకె బతయ్ పాయ్ పుటొ. ¹⁷ అదె తీర్దె బరొస మంత ఇంజెర్ వెప్పి, బరొస మత్త తీర్ కామ్ కియ్యెకె గిర్ ఆతల్ బరొస వొంటరి ఆసి సాంత.

¹⁸ బతి నమునతున్ బోరె నా సంగ, «నాకున్ యేసున్ పొరొ బరొస మంత» ఇందనురై, అస్కె నన, «నావ బరొసతున్ చొకొట్టుంగ్ కామ్మ కీసి తొహంతొన్» ఇంజెర్ వోన్ వెప్పి, «నీవ బరొసతున్ కామ్ కియ్యక్నె తొహ పర్కి కి బతల్?» ఇంజెర్ పూసి కీంతొన్. ¹⁹ బగవంతల్ వొరొరె మంతొర్ ఇంజెర్ నిమె బరొస కియ్యల్ చొకొటె బతి, బతల్ పాయ్? అహన్ బూత్క్ గిరె బరొస కీసెర్, వెరిసి తర తర ఆసెర్ మంతంగ్.

²⁰ ఎహ పిసటి! కామ్ కీసి తొహ్వాక్నె మన్వల్ బరొస బతతునె కామి సియె ఇన్వడున్ గవ పహె కి బతల్? ²¹ మా తొత్తొర్ బాబొ అబ్రాహమున్ హేతు కీమ్. వోర్ తన్వొర్ మరి ఇసకున్ బలిదాన్ సియ్యల్ బొప్లత్ పొరొ బలి సియ్యె ఆనెకెతె, బగవంతల్ వోన కార్యతున్ సూడ్సి, వోన్ నియత్నొర్ ఇంజెర్ వొప్తొర్ కి సెలె? ²² వోన బరొసతున్ కెయ్యె కీసి తొహ్వాల్ మిరట్ కరి కీంతిట్ కి సెలె? వోర్ తస్వ బరొస బాతల్ ఇన్వల్ కెయ్యె తొహ్చొర్. ²³ “అబ్రాహమ్ బగవంతన్

పొరొ బరొస ఇర్తొర్. అదెన్ హిందలె వోన్ నియత్వొర్ ఇంజి బగవంతల్ వొప్తొర్” ఇన్వల్ దర్మ-గ్రంత్ న వచన్ పూరె మాత. అద్ తరికతె అబ్రాహామున్ బగవంతనొర్ సోప్తల్ ఇన్వల్ పొరొల్ వాత. ²⁴ ఇద్ సూడ్సి, మాయ్నల్ సిరిప్ తన్వ బరొసతున్ హిందల్ ఆయె బతి, తన్వంగ్ కామున్ హిందలె, నియత్వొర్ ఇంజెర్ బగవంతల్ వొప్తొర్ ఇన్వల్ మిరట్ కరి కీంతిట్.

²⁵ అదె తీర్తె, రాహాబు# ఇన్వల్ లంజె వెయ్యె ఇజయేల్ దేస్సర్ కబ్రియలిర్కున్ తన్వ రోన్ మకుసి, సమ్మె మాన్-మర్దద కీసి దుస్రా సరియ్ సారి కీత. అద్ చొకొట్టు కామున్ హిందల్, «నియత్వ వెయ్యె» ఇంజెర్ బగవంతల్ వొప్తొర్. ²⁶ బహన్తె పరన్ సెలె అద్ మేందొల్ సాత లెకతె వాంతయె, అహ్నె చొకొట్టు కామ్ కీసి తొహుర్ వూర బరొస గిరె సాత లెకతెన్ వాంత.

మీవ వెంజెడున్ జరబ్బె మనల్ కరుసట్

3 నావుర్ దాదలిర్-బాయిక్సిట్! మిహ్గట్ వెలెటిర్ బోద వెహ్వలిర్ ఆయ్మట్. బారితెకె బోద వెహ్వలిర్ మాకున్ వెలె కటింత తన్వ మందంత ఇన్వల్ మీకున్ టావయె. ² మరట్ సమ్మిర్ గిరె బచొంగొ గల్తింగ్ కీంతట్. తన వడ్కేవలిక్ గొస్టింగ ఉంది గిర్ తప్ కియెర్ వోర్ బర్పుర్ గున్ వాలె మాయ్నల్ ఆంతొర్. ఆతొర్ మాయ్నల్ తన్వ పూరొ మేందొడున్ జరబ్బె ఇర పరంతొర్. ³ మరట్ తాకుస్త తీర్ తాకన అని మావ జరబ్బె మందన ఇంజెరెంతె కోందన్* వేసుని దొహంతట్. ⁴ అహ్నె డగుర్ రూకత నమున యేత్తెకె గిర్, బెయ్ జోర్తె వడి వాసి తాన్ దుర్సెర్ వోంత. బతి తాన్ తాకుస్వల్ మాయ్నల్ అద్ రూకతున్ పెజె మన్వల్ చుడుసి కటెతున్* తిరుస్తెకె, తన బేకె సొందన ఇత్తెకె హకె తాన్ మలుస పరంతొర్. ⁵ అహ్నె వెంజెర్ మావ మేందొడగ చుడుసి బాగమ్ ఆంద్. బతి అద్ బెయ్ డగుక్ డగుక్ గొస్టింగ్ వడ్కంత. అదె తీర్తె, చుడుసి మిన్గుల్ డగుర్ కేడతున్ బచొర్-బహన్ డుండుసంతయె సోంచ్ కీమ్మె.

⁶ మావ వెంజెర్ గిరె ఉంది తడ్మిత్ దాత్నయ్ ఆంద్. కరబ్బె నించి మన్వల్ మావ మేందొడగ ఉంది బాగమ్ ఆసి మంత. అద్ వెంజెర్ కరబున్ పూరొ మేందొడగ పగి కీసి, మాయ్నన జిన్గితున్ తడ్మిత్ దాత్ లావి కీంత. అహన్ లావి కియ్యల్ సక్తితున్ అద్ వెంజెర్ పాతడ్డల్* యేతంత. ⁷ సమ్మి జన్వర్కున్, పిటె-పురడున్, పుర్గ్-బుసితున్, సమ్మర్తగ మన్వలిక్ జిప్రస్ సమ్మెతున్ ఇదెన్ మునె అని ఇంకె గిర్ మాయ్నల్ జరబ్బె ఇర్సెరెన్ మంతొర్. ⁸ బతి వెంజెడున్ ఇంకె వేరి బోరె తన్వ జరబ్బె ఇర పర్మకి. అద్ వెంజెర్ జీవ తెండ్యల్ విత్తె నించి అవివత్తె కరబ్ కీసెరెన్ మందంత.

⁹ ఇద్ వెంజెడెన్ మరట్ పర్పు ఆయ్మల్ బాబొ బగవంతన్ డగుర్-పాన్ సీంతట్. ఇదె వెంజెడె బగవంతన రూప్పె పుట్టొర్ మాయ్నన్ సాపెన సీంతట్. ¹⁰ ఆసిర్వాద్ అని సాపెన ఉందియ్ తొడ్డల్ బహ్రి వాసెర్ మంతంగ్. నావుర్ దాదలిర్-బాయిక్సిట్! అహన్ మరట్ మన్వ. ¹¹ సొవార్ యేర్ అని చొకొట్టు యేర్ బస్కెట్కె ఉంది జలతల్ పూటె మాయెంగ్. ¹² నావుర్ దాదలిర్-బాయిక్సిట్! అంజురి మరతున్ మర్క పండింగ్* బస్కెట్కె సాదొంగ్. అహ్నె ఆంగుర్ వేలితున్ అంజురి పండింగ్ బస్కెట్కె సాదొంగ్. అదె తరికతె, సొవార్ యేత జలతల్ చొకొట్టు యేర్ పూటె మాయె.

బుది-గియన్ వాలిర్

¹³ బుది-గియన్ వాలిర్ అని సమజ్దార్క్ మీ రొపొ బోరె మంతెర్ కి? అహన్ మత్తెకె వూర్ సతె-పాన్దె తాక్సెర్, బుది-గియన్ సీత అద్ చుడుర్-పాన్దెన్ పియ్య, వూరంగ్ కార్యన్ తొహట్ ఇంట్. ¹⁴ ఉంది మోక మీవ దిల్లగ కుట కుట అని లాల్నల్ గున్తె మంజి, డగుక్ డగుక్ గొస్టింగ్ వెప్చార్ సతున్ మకుసియ్మట్. ¹⁵ మిహ్గ మన్వల్ ఈతల్ బుది-గియన్ స్వర్గన్ రెయ్యి వాయ్మకి. ఇద్ మీకున్ దునియతల్ వాత బుది-గియన్ ఆంద్. ఈతడగ బావ్-బక్తి సెలె. ఇద్ సయ్నద

* 3:3 గ్రీకు బాసతె ఇహిన్ లిహి కీసి మంత: కోడత ముస్కరితున్ లగమ్ దొహంతట్. * 3:4 తెలుగుతె అద్ చుడుసి కటెతున్ «మక్కాని» ఇంతెర్. * 3:6 పాతడ్డల్ సెలెకె సయ్నదల్ ఇంజెర్ మందంత. * 3:12 గ్రీకు బాసతె ఒలివ పండింగ్ ఇంజెర్ మంత.

2:25 యెహోసువ 2:11

బుది-గియన్ ఆండ్. ¹⁶ బహన్ ఇత్తెకె బగతె కుట కుట అని లాల్పలిక్ గున్స్ మందంతంగొ, అగ జగడంగ్ లొలింగ్ అని సమ్మె తీర్కనంగ్ కరబ్ కామ్మ మందంతంగ్.

¹⁷ బతి స్వర్గనల్ వాయ్యల్ బుది-గియన్ వెలె పవిత్ర ఆండ్. అద్ బుది-గియన్ సాంతితున్ పెర్మ కీంత. అద్ బోనె బతయ్ ఇన్వక్ సాదు ఆసి మందంత. అద్ బుది-గియన్ వెహ్త తీర్ కేంజంత అని దయతె సూడంత. అని అద్ చొకొట్టుంగ్ కామ్మ కీసెర్ బేద్-బావ్ తొహ్వాక్ మందంత. అద్ బుది-గియన్ సతెమున్ పియ్యి తాకంత. ¹⁸ సతె-పాన్దె అని సాంతితె తాక్వలిర్ అద్ విజతున్ వీచ్ చి, సత్తు అని సాంతిత పంటతున్ కొయంతెర్.

బగవంతన్ కరుమ్ వరట్

4 మిహ్ జగ్గంగ్ అని లడెయ్ బతతున్ హిందల్ జర్గసెర్ మంతంగ్? మీవ దిల్లగ పుట్టలిక్ ఆసన్ ఉందితున్ ఉంది అర్చి వాయ్య సాంజెనె ఇవ్ జర్గసెర్ మంతంగ్. ² మిరట్ ఆస కీకిట్ బతి, అద్ మీకున్ పుటొ. అద్ కుట కుట గున్త ఆసతున్ సాటి మాయ్ జకంతిట్. జగ్గంగ్ అని లడెయ్ కీంతిట్ బతి, ఆస కీకిట్ అద్ మీకున్ పుటొ. మిరట్ కోర్త అద్ మిహ్ మనొ. బారితెకె బగవంతన్ మిరట్ తల్క్విట్. ³ మిరట్ బగవంతన్ తల్క్వెకె గిరె అద్ మీకున్ పుటొ. బారితెకె మీవ సుక్-బోగున్ సాటి కర్చి కియ్లె కరబ్బ ఆసతె తల్కంతిట్.

⁴ ఇద్ దునియతంగ్ సుక్-బోగున్ సంగ దోస్తన్ కీతెకె, బగవంతన్ పెర్మ కీతప్ ఆయె బతి, పీర్ కీతప్ ఆంత ఇన్వల్ టావ సెలె కి బతల్? ఇద్ దునియతుర్ సంగ దోస్తన్ కీక ఇన్వల్, బగవంతన్ పగ-దారల్ ఆంతొర్. ⁵ “బగవంతల్ మా సమ్మిర్కున్ సీత, అద్ ఆత్మతె మరట్ తన్వయ్ బక్తి కీయన్” ఇంజెర్ దర్మ-గ్రంత్ నగ, వటి ఆగమె లిహి కీసి మంత ఇంతిట్ కి బతల్? ⁶ బగవంతల్ మాకున్ వెలె పెర్మత-దయతె సూడెర్ మంతొర్. అదెన్ సాటినె దర్మ-గ్రంత్ నగ,

“బగవంతల్ గర్వతె మన్వలిర్కున్ ఉల్ల తిరియంతొర్.

బతి కమి-పాన్దె మన్వలిర్ పొరొ పెర్మత-దయ తొహంతొర్”#

ఇంజెర్ లిహి కీసి మంత.

⁷ అదెన్ సాటి, బగవంతన్ మునె చుడుర్-పాన్ కీసి మంట్. సయ్న్దున్ ఉల్ల తిరియట్. అస్కె వోర్ సయ్న్ మిహ్టల్ పరర్ ఆంతొర్. ⁸ బగవంతన్ కరుమ్ వరట్. అస్కె బగవంతల్ మీ కరుమ్ వాంతొర్. పాపెస్తలిర్నిట్! మీవంగ్ పాప్పున్ నొరట్. బహ్కా మాతుర్నిట్! మీవంగ్ దిల్కున్ సుదుడ్-పాన్ కీమ్మ. ⁹ పాపెస్తలిర్నిట్! విచరై అని దుక్పతె మంట్. జోరై ఆడట్. కవ్ వడున్ బద్లి ఆడెర్ అని ఆనందున్ బద్లి దుక్పతె మంట్. ¹⁰ పర్బున నదుడున్ మునె మీవ మిరట్ చుడుర్-పాన్ కీసి మంట్. అస్కె పర్బు మీకున్ డగుర్-పాన్ సీంతొర్. ¹¹ దాదలిర్-బాయిక్కిట్! మీవ మిరట్ వొరొన్ వొరొర్ బయ్మన్తె రాంగ్మట్. తన్వొర్ సోప్తన్ రాంగి సీతెకె ఆయి సెలెకె వోన్ పొరొ తస్వ కీతెకె ఆయి, వోర్ మాయ్ల దర్మత కానున్తున్ బయ్మన్ ఆతొన లెకతె వాంతొర్. మీవ కామ్ సిరిప్ అద్ కానున్తున్ పియ్యి తాకన. అద్ కానున్ చొకొట్టు సెలెకె వాయుట్టు ఇంజెర్ తస్వ కియ్యల్ మీకున్ హక్ సెలె. ¹² పర్జతున్ పొరొ నాయ్ తస్వ కియ్యల్ అని దర్మత కానున్తుగ హుకుమ్మ లిహి కియుస్వల్ వొరొరె బగవంతల్ ఆందుర్. పర్జతున్ బచి కియ్యల్ అని నాసెడమ్ కియ్యల్ గిర్ వోరె ఆందుర్. తె ఆజు-బాజుతుర్ పొరొ సిక్స వాటట్ ఇంజెర్ వెహ్లా నీకున్ బోర్ అదికార్ సీతొర్?

డగుక్ డగుక్ గొస్టింగ్ వెహ్లాట్

¹³ కేంజట్! “నేండ్ సెలెకె నాడి బత్తెర్ ఉంది చహరై సాంజి, అగ ఉంది సాల్ వేరి మందంతొమ్. వరట్! అగ బేపరి కీసి కొతంగ్ వెలె కమయ్ కీకట్” ఇంజెర్ వెహ్లిర్నిట్ కరి కీమ్మ. ¹⁴ నాడి బతల్ జర్గంతయె మీకున్ టావ సెలె. మీవ జీవతున్ బారెకె సోంచ్ కీమ్మ. మిరట్ జులుక్ దిసి ఉండె జులుక్సె మయడ్ ఆసి సాన్వల్, పోయత దుహర్తున్ దాత్తుర్ ఆందిట్. ¹⁵ అహన్ ఇన్వడున్ బద్లి మిరట్, “పర్బు జీవతె ఇరైకె, ఇద్ కీకొమ్ అద్ కీకొమ్” ఇంజెర్ వెహన. ¹⁶ బతి మిరట్

అహాన్ కియ్యిట్. లాండి-లబడ్ డగుక్ డగుక్ గొప్పింగ్ వెహ్చర్ గల్తింగ్ కీంతిట్. ¹⁷ అదెన్ సాటి చొకాట్ కియన ఇన్వల్, టావ మంజి గిర్ చొకాట్ కియెర్ వోన్ పాప్ లాగంత.

దనెవంతలిర్కున్ దమ్మి సియ్యల్

5 యే దనెవంతలిర్కిట్, కేంజట్! మిరట్ దుక్కుతె ఆడ్సెర్ కిలియట్. బారితెకె మీకున్ గాచర్-గండల్క్ వాయ్యలిక్ మంతంగ్. ² మీవ దన్-దప్లత్ కడియంత అని మీవంగ్ పాంగుక్ వెలుమ్ పియంతంగ్. ³ మిహ్గ మన్వల్ సోనె అని కూర చిలిమ్ పియంత. అద్ చిలిమ్ మీ పొరా ఉల్ల గవ వెహ్చ, మీవంగ్ మేందొల్కున్ తడ్మిత్ దాత్ డుండుసంత. ఇవ్ ఆక్రితంగ్ దిహ్స్కెనె గిరె మిరట్ వెలె దన్-దప్లత్ న డీగ్ వాడ్సెర్ మంతిట్. ⁴ కేంజట్! మీ వహుక్కుగ కామ్ కియ్యలిర్ బూయ్యలిర్కున్, మిరట్ బూతి సియ్యక్ నె పసి కీతిట్. వూరంగ్ బూతింగ్ మీ పొరా పిరది కీసెర్ మంతంగ్. వూర్ బూయ్యలిర ఆడ్వల్ స్వర్గ్ న దలమ్మెర్ పర్బునంగ్* కెప్పున్ కేంజ వాత. ⁵ బొమిత్ పొరా మీకున్ పసంద్ వాత తీర్ సుక్-బోగ్నె పిసెర్, కొయ్యల్ దినమున్ సాటి, మీవంగ్ దిల్కున్ కొడ్మసి తయర్ కీసెర్ మంతిట్. ⁶ మిరట్ నియత్తె తాక్వలిర్కున్ సిక్స వాట్సి, వూర్కున్ జక్తిట్ బతి, వూర్ మీకున్ మర్ల బడ్మకి.

సమ్మెతున్ వోర్చి మునె దాయన

⁷ అదెన్ సాటి దాదలిర్-బాయిక్సిట్! పర్బు మల్సి వానల్ వేరి, మిరట్ వోర్చి చొకాటె సూడ్సెర్ మంట్. బహన్ ఇత్తెకె, వొరార్ కేతిదారల్ తన్వ బొమితగ వాట్వల్ చొకాట్ పంటతున్ సాటి, బహన్ సూడ్సెర్ మందంతొరా దిహ్నై కరి కీమ్మ. వోర్ కేతిదారల్ మొదొడ పిర్ వాసి* పంట పిరంత అగటల్తె బెర్సి, పంట కొయ్యె వానల్ వేరి వోర్చికున్ చొకాటె సూడ్సెర్ మందంతొర్. ⁸ మిరట్ గిర్ మన్దున్ గట్ కీసి, వోర్చి సూడ్సెర్ మంట్. బారితెకె పర్బున మల్సి వాయ్యల్ వకత్ కరుమ్ వాసెర్ మంత. ⁹ నావుర్ దాదలిర్-బాయిక్సిట్! వొరాన్ పొరా వొరార్ చహ్లాంగ్ వెహ్మాట్. అహన్ వెహ్చర్కున్ పర్బు సిక్స వాటంతొర్. కేంజట్! వోర్ నాయ్ తన్వ కియ్యల్ అదికారి వెయ్యె వాయ్యల్ మంతొర్.

¹⁰ నావుర్ దాదలిర్-బాయిక్సిట్! పర్బున్ బారెకె వెహ్చర్ పర్వక్తిలిర్ తక్లిట్ బోగ్ మాతెర్. వూర్ పర్వక్తిలిర నమున యేచ్చి మిరట్ తాకట్. ¹¹ తక్లిట్ వోర్చి బరోసతె తాక్తుర్కున్ ఆసీర్వాద్ యేత్తుర్ ఇంతట్. యోబున వోర్చివల్ గున్తున్ బారెకె కేంచి మంతిట్. పర్బు వోన్ ఆక్రిత్ బాతల్ ఇనమ్ సీతొర్ ఇన్వల్ మిరట్ సూడ్డిట్. పర్బు వెలె దయ అని కిపుల్ వాలె ఆందుర్. ¹² నావుర్ దాదలిర్-బాయిక్సిట్! సమ్మిన్ తెర్ ముకె బతల్ ఇత్తెకె, స్వర్గ్ న పొరాడెన్ ఆయి, బొమిత పొరాడెన్ ఆయి, ఉండె దుస్రా బతతయ్ పొరాడెన్ ఆయి, మిరట్ వోట్ వాట్వ. సిరిప్ బతల్ మంత అద్ వెహట్. అహన్ మత్త తీర్ వెహ్చెన్ బగవంతల్ మీకున్ సిక్స వాటొర్.

¹³ మిహ్గటల్ బోరె ఆయి తక్లిట్ నగ అర్చి మత్తెకె, వోర్ పార్తన కియన. ఆనంద్ మత్తొర్ వోర్, బగవంతన్ పార్తన-వింతి కీసెర్ పాటంగ్ వారన. ¹⁴ మిహ్గటల్ బోరె ఆయి యెడ్కి-దుక్తె మత్తెకె, చర్చితుర్ పెదొల్కున్ వోర్ కేయుసన. వూర్ వాసి పర్బున పొరాడె నియ్ సోక్సి, వోన్ సాటి పార్తన కియన. ¹⁵ అహన్ బరోసతె వూర్ పార్తన కీతెకె, వోర్ దుకెలల్ చొకాట్ ఆంతొర్. పర్బు వోన్ చొకాట్ కీంతొర్. ఉంది మోక వోర్ పాప్ కీసి మత్తెకె, వోనంగ్ పాపున్ పర్బు మాపి కీంతొర్. ¹⁶ అదెన్ సాటి బవె పాప్ కీసి మన్కిట్తె, బోనంగ్ వొహ్ పాప్ మీ నడ్మమ్ మిరట్ వొపట్ అని వొరాన్ సాటి వొరార్ పార్తన కీమ్మ. ఇదెన్ హిందల్, మీవ తబియత్ చొకాట్ ఆంత. నియత్తొన పార్తన వెలె సక్తితె మంజి బచొరా చొకాట్ కియ పరంత.

* 5:4 స్వర్గ్ న దలమ్మెర్ పర్బునంగ్ ఇత్తెకె సక్తి వాలె బగవంతల్.

* 5:7 అద్ జాగతగ ఉర్చన్ వకత్తె జరసి పిర్ వాంత అని పంట కొయన్ మునె బెయ్ పిర్ వాంత.

¹⁷ యేలియల్ మా దాతొరె సాదరన్ మాయ్నల్ ఆందుర్. పిర్ అర్వ ఇంజెర్ తన్వ మన్దె పార్తన కీతోర్. తె సడె మూంద్ సాల్క్ వేరి, బొమిత్ పారా పిర్ అర్మకి. ¹⁸ అద్ ఆత పెజె పిర్ అరన ఇంజెర్ మర్ల పార్తన కీతోర్. అస్కె హోబర్ పిర్దన్ అరుస్త అని బొమి తన్ ఉర్పతంగ్ పంటంగ్ పండుస్త.

¹⁹ నావుర్ దాదలిర్-బాయిక్విట్! మిహ్గటల్ బోరె ఆయి సతె సర్దున్ బహ్కె మాతెకె, వోన్ మల్పి సత్తగ తత్తెకె ఇద్ గొస్టితున్ కరి కీప్ట్. ²⁰ పాపెస్తన్ పాప్స సరితల్ సతె సర్దె మలుస్తార్ వోర్, పాపిన ఆత్మతున్ మరన్తల్ తపుసి, బచి కియుస్తార్ ఆంతోర్. ఇదె ఆయ్వు పాపినంగ్ పాప్కున్ బగవంతన కెయ్దె వోర్ మాపి కియుస్తార్ ఆంతోర్.